



ჩემი პირობი


პოეზიის

20 საშუალო 13

ჩემი ჰობი პოეზიაა

# ჩემი ჰობი

## პოეზიაა



ლიტერატურული  
ალმანახი № 8



ჩემი ჰობი პოეზიაა

UDC(უაკ)821.353.1(051.2)  
ჩ-433

რედაქტორები: კლარა  
გელაშვილი  
მაყვალა ხაჩიძე  
მარიამ ნოზაძე

პერიოდული გამოცემა  
გამომცემელი: ლერი ნოზაძე  
ISSN 1512 – 1542

ეკა ბაქრაძე



დაიბადა ქ. ხაშურში. სწავლობდა ხაშურის მე-9 (ყოფილი 25-ე) საშუალო სკოლაში. დაამთავრა ივანე ჯავახიშვილის სახელობის თბილისის სახელმწიფო უნივერსიტეტის ფილოლოგიის ფაკულტეტი. ლექსები იბეჭდება 10 წლიდან. გამოცემული აქვს 4 პოეტური კრებული. მისი ლექსები ითარგმნა რუსულ, უკრაინულ, ებრაულ, თურქულ და ინგლისურ ენებზე.

\*\*\*

გუშინ ქალაქში რომ ბიჭი დადიოდა,  
თხემით ტერფამდე ჩაუქი, ქართველი...  
ღვთისმშობელს სიხარულის ცრემლები სდიოდა,  
სამების სამრეკლოს თავს ადგა ნათელი...  
ქართული ხალხური ზღაპრიდან გადმოსული  
პატარა მზეჭაბუკი ბიჭი დამწღაზრული,  
წმინდა გიორგივით მადლმოსხმული,  
თეთრი მხედარივით აღკაზმული...  
ჩოხის კალთას რომ აიკაპიწებს და  
ცის ტატნობზე, მზეს მზერას თამამად გაუმართავს,  
ტამართან მონაზონი პირჯვარს გადიწერს და :  
-ჰოი, საქართველოს მართლა გაუმართლა!  
-ეს ვინ მოსულაო! - იტყვის დარდიანად,  
ლოცვას საგზალივით უხვად გააყოლებს,  
ისეთი ალერსით და ისე მადლიანად -  
მეტი სასწაული, ღმერთო, გამაგონე!  
-ნეტავ შენს დედასაო! ცის კარი გაიღო  
თუ უფლის ანგელოზი კვლავ ალაპარაკდა?  
აქ რა მოგიყვანდა, ასე რომ არ იყოს -  
ამ მოლოდინივით გადაღლილ ქალაქთან...

## ჩემი ჰობი პოეზიაა

გუშინ ქალაქში რომ ბიჭი დადიოდა,  
ქუჩა თან მოჰქონდა გზა-გზა აკენკილი,  
სიყვარულითა და ნათელი ღიმილით  
სავსე ბოღჩასავით, მზერით დაკემკილი...  
მეტეხს ხერხემალზე ააცოცდა,  
მამა დავითი რომ მოიხილა,  
კარგა გვარიანად მოილხინა,  
როცა დაიღალა, ჩაიძინა...  
ვაჟას რომ ლექსი გაუბედა,  
ილიამ უღვაშებში ჩაიცინა...  
გალაკტიონმა ხომ გულით გაიხარა,  
ბიჭი რომ საფლავთან დაიხარა,  
მთაწმინდამ ჯანღი გადიყარა...  
ცა იყო საოცრად მეწამული...  
-მაგას ვედარაფერს უშველითო -  
სისხლი ლექსით აქვსო მოწამლული -  
გოგლა თავისთვის ხითხითებდა,  
თანაც რაღაცას მითითებდა:  
-ეს ვინ მოსულაო! ეს ვინ მოსულაო?  
თეთრი ანგელოსის სადარიო,  
ბიჭი შფოთავდა და აღარ ისვენებდა:  
-რუსთველის საფლავი სად არიო?  
გუშინ ქალაქში რომ ბიჭი დადიოდა,  
თხემით ტერფამდე ჩაუქი, ქართველი...  
ღვთისმშობელს სიხარულის ცრემლები სდიოდა,  
სამების სამრეკლოს თავს ადგა ნათელი...  
ქართული ხალხური ზღაპრიდან გადმოსული,  
ჩემი უნაზესი დარდია და ...  
ჩემსავით... ჩემზე უფრო მარტოსული.

\* \* \*

მე მათუსალას ასაკს გადავცდი...  
ყოფნა-არყოფნის მიჯნას გადავცდი -  
მრავლის მომსწრე და ყოვლის მნახველი,  
უხსოვარ დღეთა თანამზრახველი.  
გზაჯვარედინზე ვდგავარ და გელი..  
რამდენი რამე მაქვს გასამხელი,  
მაგრამ სათქმელი მეჩოთირება ...

## ჩემი ჰობი პოეზიაა

სიტყვა ყოფივით ყელში გადამცდა,  
არც სახე შემრჩა, აღარც სახელი...  
მე მათუსალას ასაკს გადამცდარს,  
ხომ მომიტევენ ცოდვას გამხელილს?!  
ო, ყოვლისშემწევ, ღმერთო მაღალო,  
უხსოვარ დღეთა ხსოვნის წინაშე  
თავი მიწამდე უნდა დავხარო...  
ვეღარ ცნობ ევას, ვერც ადამის ძეს -  
ჯოჯოხეთის კუპრს ანთხევს სამყარო!..  
სამოთხის ბაღი უწყალოდ ჩეხეს,  
ზურგი აქეიეს ხატს და მაცხოვარს..  
ვინ დაუკოცნის სატანას ფეხებს?  
ვინ უწყალობებს ხურდას მათხოვარს?...  
აჰა, შედეგი!  
ვინ არს შემდეგი?  
ვინ არს შემდეგი?  
ვინ არს შემდეგი!!!  
გზაჯვარედინზე ვდგავარ და გელი..  
და უსასრულო ღამეს ვითენებ..  
ხის კენწეროზე ნებივრობს გველი -  
უზარმაზარი ჭრელი პითონი..  
შემომავლე დღიერი ხელი,  
უფალო ჩემო, გზა გამიმრთელე!  
სულს სამარემდე მაინც მივათრევ,  
არ ჩამდგომია მგლის მუხლში დაღლა!  
მე დიოგენეს ფარანს ვინათებ,  
მე მათუსალას ხნისა ვარ ახლა!!  
მე მათუსალას ასაკს გადავცდი...

### ჩემი ორეული ანუ ავატარი

ხომ შეიძლება ოდესმე, სადმე,  
ანაზადად, გზაში გადაგეყარო?  
რას იზამ მაშინ, სად შენ და სად მე...  
არ გამიკაწრო სული ეკალო.  
ცვრიანი ვარდი და მირიადი  
დარდი უსიტყვოდ აყოვნებს ამ წამს,  
სიჩუმე სულში ხმაურით დადის,

## ჩემი ჰობი პოეზიაა

ცრემლი ყულფივით ეფსკვენება წამწამს...  
წვიმის წვეთებად შეაშრა ღამე  
სუნთქვით დაორთქლილ სარკმელს მინაზე,  
დავრჩით პირისპირ ის ქალი და მე -  
გველის სიბრძნე და ვარდის სინაზე...

\* \* \*

გავყიდი ლერწმის ბწკარისფერ კაბას,  
მერე იმ ფულით გიყიდი ანბანს,  
როცა გადაშლი ცხოვრების დავთარს,  
თავად გარჩევ მტყუანს და მართალს.  
მიხვდები ვინ ხარ, ვისი რა გმართებს,  
გავყიდი მძივებს, ვიყიდი სანთლებს  
და დავუკოცნი ღვთისმშობელს კალთებს  
შენი ამ ქვეყნად მოვლინებისთვის,  
განგებისა და უფლის ნებისთვის  
გავყიდი ბეჭედს და დაგიმშვენებ  
ქართული ჩოხით განიერ ბეჭებს  
ვიცი, რარიგად უხდებათ ბიჭებს,  
ქართული სულის მოხდენის ნიჭი  
და მოგუგუნე დედო ზარების  
ხმა იდუმალი და ახლობელი,  
როგორც ჰაერი, როგორც მშობელი,  
წყალი, საკვები, მთები, ველები  
და მოამაგე თბილი ხელები...  
ჰო, რა თქმა უნდა, ძველთაძველ სკივრსაც  
გავყიდი როგორც ლერწმისფერ კაბას  
და მოვუნათლავთ მეგობარს შვილსაც,  
სახელად ალბათ დავარქმევთ საბას.  
გავყიდი ალბათ (რომ მქონდეს) სახლსაც  
და თავი ქვასაც უნდა ვახალო,  
შენ რომ დაგჭირდეს და გაგიჭირდეს,  
შენს განკაცებას რომ მოვახმარო,  
მაგრამ ვერასდროს მე ვერ გავყიდი -  
სულსა და სინდისს, მშობლიურ მიწას!  
რომ არ დამირჩე როგორც ხიზანი  
შენსავ მამულში, რომ არ დაკარგოს

## ჩემი ჰობი პოეზიაა

სიცოცხლემ აზრი, აზრმა - მიზანი...  
ბოლოს და ბოლოს, გავყიდი წიგნებს  
მათთვის, ვინც ქვეყნად გზას ვეღარ იგნებს...  
მას, ვინც საკუთარ ღირსებას იცავს  
საგულდაგულოდ გადამალული  
გადასარჩენი უფლის შვილებით,  
იმედის ჭიგოდ შევეშველები...  
ის ვინც საკუთარ ღირსებას იცავს,  
იცავს სიცოცხლეს, რწმენას და მიწას...  
ჭირთა დათმენით და მოკრძალებით,  
სულთმოფენობის ღვთიურ ძალებით,  
ვდგავართ სიცოცხლის სადარაჯოზე  
ჩვენ, საქართველოს ამორძალები!  
გავყიდი ლერწმის ბწკარისფერ კაბას,  
და უსათუოდ გიყიდი ანბანს,  
მერე გიამბობ ჯადოსნურ ზღაპარს,  
ლექს წავუკითხავთ კახეთში პაპას...  
ჯერ რას გაიგებ ბარისას, მთისას...  
და იმედებით გამძებგილ ქისას  
ბალიშქვეშ ვმალავ, გისწორებ საბანს,  
ხვალ უსათუოდ მოვნათლავთ საბას...

\* \* \*

ასი ათასი მოწამის სისხლი  
წვეთავს და წვეთავს ... წვეთავს და წვეთავს...  
ჯვრის მონასტერთან საკინძეს იხსნის  
და თვალს არიდებს არაგვი მცხეთას.  
მტკვარი მეწამულ ფერს იცვლის ჩუმად  
და დაინთქმება მწუხრში ყოველი,  
როცა სიონის მორღვეულ გუმბათს  
მისწვდება კვნესა სვეტიცხოველის ...  
ჯვრის მონასტერთან მტკვარსა და არაგვს  
თვალს ვერ უსწორებს ბებერი მნათე,  
ვიდაც ლოცულობს საკურთხეველთან  
და მირონი სდის უძველეს ხატებს...  
ასი ათასი მოწამის სისხლით  
წარსული ჩემში სინათლეს ანთებს!





### ციცინო ბურნაძე

დაიბადა 1943წლის 17 აპრილს, ხაშურში. დაამთავრა ხაშურის პირველი საშუალო სკოლა, შემდეგ კი ივანე ჯავახიშვილის სახელობის თბილისის სახელმწიფო უნივერსიტეტის ისტორიის ფაკულტეტი. სხვადასხვა დროს მუშაობდა მოსწავლე-ახალგაზრდობის სახლის დირექტორის მოადგილედ, ხაშურის ახალგაზრდობის ერთ-ერთი გამორჩეული ლიდერი, ბოლო წლებში მუშაობდა ხცისის საჯარო სკოლის დირექტორად. გარდაცვალებამდე კი დირექტორის მოადგილედ. გარდაიცვალა 2011 წელს.

### ღმერთო დალოცე

უწმინდესს და უნეტარესს,  
კათალიკოს პატრიარქს,  
კელაპტარი უნთია და  
ღვთისნიერი სახე აქვს.  
ლექსო ტკბილად იღიმება:  
„აი, დიდი მამაო“ ...  
სურათს ბებოს უჩვენებს და  
პირჯვარს იწერს თანაო.  
ლოცვას ერთად აღვლენენ,  
მათი სახე ბრწყინდება,  
ორ წლამდეა შვილთაშვილი,  
საუკუნის - დიდედა.  
სწამთ, უფალი მათ წრფელ ლოცვას  
რომ შეისმენს უმაღვე,  
შვილთაშვილი იღიმება,  
თითქოს მზეა მხურვალე.  
დიდედასაც სიხარულის

## ჩემი ჰობი პოეზიაა

ცრემლი დასდის მდუღარე,  
ღმერთო, ღმერთო შეეწიე,  
ულხინე და უხარე.  
საქართველოს, წილადხედომილს  
დედაღვთისმშობლისას,  
არ მოაკლო ყრმა და ჩვილი  
სამრავლებლად ერისა.  
არ მოაკლო დიდებუნი,  
გვარში დიდი პაპები,  
მადლი წმინდა ნინოს ჯვრის და  
სვეტიცხოველ-სამების.  
დაულოცე საქართველოს  
უწმინდესი ილიაც,  
ასი წლისაც, ყველა თოთოც  
მისი წილხედომილია.  
კვლავ გვენახოს სანთლით ხელში  
ლექსო ბიჭის სადარი,  
დიდუდასთან ერთად ლოცვად  
მის წინ მუხლზე დამდგარი.

## ღვთისმშობლისადმი

ო, ღვთისმშობელო,  
უბე-კალთა სავსე გაქვს მადლით  
და ღვთისმორწმუნეთ  
მოწყალე თვალს გვაყოლებ მადლით.  
მართლმადიდებელთ  
ხელთუქმნელი გვიბოძე ხატი,  
ცოდვილ სამყაროს  
ნუგეშს სცემ და იფარავ კალთით.  
მომადლებულო,  
მუხლს გიყრით და აღვავლენთ ლოცვას,  
როდესაც გვილხინს  
მორწმუნეთ და ჭირს გვძლევს როცა.  
დედავ ღვთისაო,  
მოწყალე თვალს გვაყოლებ მადლით  
და კურთხეულო,

## ჩემი ჰობი პოეზიაა

უბე-კალთა სახსე გაქვს მადლით.  
ქრისტიანეთა  
თაყვანი გცეთ, ჩვენი წესია,  
რადგან ქვეყანას  
მოუვლინე შვილი, მესიად...

### საქართველოს

შენ ხარ ყველა ქართველის  
გულის ცხელი წერტილი,  
ფეთქავ ისევ სისხლსავედ,  
განა სისხლდაწრეტილი.  
არ გვქონია არასდროს  
ისტორია წყვეტილი,  
შენ ხარ დედამიწაზე  
ქართველთ ცხელი წერტილი.  
ბევრმა გკადრა ბოროტი,  
ბევრმაც - საქმე კეთილი,  
არ ყოფილხარ არასდროს  
მოყვრებამოწყვეტილი.  
თუმცა კითხვის ნიშანი  
თავსზედ ბევრჯერ გეკიდა,  
როცა ხმალი ან სიტყვა  
მართალ საქმეს ვერ სჭრიდა.  
ღმერთი მაინც გფარავდა,  
ღმერთი კვლავ დაგიფარავს,  
ბნელს მთარღვევ მარადქამს,  
როგორც ხარი წიქარა.  
შენი ერი გიცავდა  
სამოთხეო მიწავ და  
დღესაც ვდგავართ მუხლებზე  
შენთვის ლოცვად, ფიცად და  
შენ ხარ ყველა ქართველის  
გულის ცხელი წერტილი,  
ნურც ენახოს ნურავის  
სულმკვდარ-სისხლდაწრეტილი.

# ჩემი ჰობი პოეზიაა

## ვიდრე ზამთარი

შემოდგომაზე, შემოდგომაზე  
ჰაერი თვრება ღვინის სურნელით,  
ქარის უეცარ ამოსუნთქვაზე  
ისევ მიჩნდება შენი სურვილი.  
გადაფრენილან თუმცა მერცხლები,  
ისევ ოცნების კარებს შევადებ,  
მოდი, ძველებურ დავიფრფლავი,  
მოდი და თმებზე ხელი შემახე.  
შემოდგომაა, ღვინის სურნელი  
ლამის ძილს მიფრთხობს, შენს თავს მახსენებს  
და ავყოლივარ ვიდრემდე სურვილს,  
მოდი და ისევ ენდე ამ ხელებს.  
ჩემს შემოდგომას უწამლე, ვიდრე  
მოვა ზამთარი სითეთრით მშვენი,  
ვიდრე მაჭარი ძარღვებში ჩქეფს და  
ვიდრე დადუღდა სურვილი შენი.

## მცხეთა

დაგას შემოდგომა, სიმსუყით ფერთა.  
მეფეთ საძვალე - ბებერი მცხეთა.  
აქ მე შორენა შემომეფეთა,  
აქ არსაკიმეც შემომეფეთა.  
წარსულზე დარდი სულზე მეკვეთა,  
რომელ მიდია, რომელი ხეთა...  
ქართვლის დიდება - ბებერი მცხეთა...  
დაგას შემოდგომა, სიმსუყით ფერთა.  
ისე, უბრალოდ, არც რამის გამო,  
დაუფლებია გულს მწველი სევდა,  
მომწყურებია არაგვი, მტკვარი,  
სვეტიცხოველი - სავანე ღმერთთა.  
ჯვარი, სამთავრო, სადგომი ბერთა,  
მესაიდუმლე არმაზი წელთა,  
წარსულზე დარდი მავსებს წვეთ-წვეთად  
აღარ ბრიალებს ყაყაჩო ველთა...

## ჩემი ჰობი პოეზიაა

მალე იხუვლებს დუმილი ხევთა,  
განმარცვავს ქარი ფოთლებს ამ ხეთა,  
აქ მე შორენა შემომეფეთა,  
მეფე გიორგიც შემომეფეთა.  
დგას შემოდგომა, სიმსუყით ფერთა...  
რომელ მიდია, რომელი ხეთა...  
ისე, უბრალოდ, არაფრის გამო  
მომნატრებია სატახტო მცხეთა.

### გაზაფხულის მონატრება

მარტი მარტივით მარტივი,  
მოვა წვიმების შოლტებით,  
მერე ვარდისფრად იელვებს  
ატმის და ნუშის ტოტებით.

აპრილს ჩამატოვს ხელებში,  
ცისკენ გაყვება ბილიკებს,  
აპრილიც მინდორს გადირბენს  
და ჩუმად ჩაიქილიკებს.

ვარდობისთვე კი სულ მალე  
იასამნებში ჩაჯდება  
და გაზაფხული ლიცლიციით  
კელაპტარივით გაქრება.

თეთრკაბა, მწვანეჩიქილა  
წვიმის ნაწნავთა შოლტებით  
მატკობს შამვთა და ბულბულთა  
პიანოთი და ფორტეთი.

მარტი, აპრილი, მაისი  
ბრწყინავენ ოქროს ზოდევით,  
წავლენ, დამრჩება ოცნებად  
სხვა გაზაფხულთა ლოდინით.

### ღამის მირაჟი

გადაიწვინეს მკლავებზე მთვარე,  
მშვიდად გასცურეს ცაზე ღრუბლებმა,  
შენ გამოგზავნე მაისის ღამე?!  
ძველ სიყვარულზე მესაუბრება.

## ჩემი ჰობი პოეზიაა

დავას ყორნისფერი ღამე ღამეში,  
თითქოს სიჩუმე უსმენს სიჩუმეს,  
მერე დუმილი მწუხრის კამერში  
ვარდის ხავერდში ამოისუნთქებს.

აღარ მასვენებს ბულბულთა ყეფა,  
დადლილ თვალეზსაც წაგვარეს რული,  
შენი სახელი ამ გულთან ფეთქავს,  
დაბრუნებულა კვლავ სიყვარული.

და ყოველივეს ეხდება ფარდა,  
როცა იჭრება დილის რიჟრაჟი,  
ღამის, მთვარის და ბულბულთა გარდა  
სხვა ყოველივე არის მირაჟი.

### „რატომ არ მოველ წვიმადა...“

შენი ქულა ღრუბელი მშლის,  
შენი ზეცის სიკამკამე.  
ისე ძლიერ მიყვარხარ, რომ  
შიშით გული მიკანკალებს.

ნეტავ, წვიმად მოვსულიყავ,  
გულისგულში ჩაგწვდომოდი,  
მერე წყაროდ ამომსკდარი  
შენს ხევხუვებს გავყოლოდი.

მელიკლიკა, მეჩუხჩუხა,  
ნაკადულის ტკბილი ჰანგით,  
კვლავ შეგესვა ჩემი ჩქერი  
როგორც მათრობელა ბანგი.

მზე თუ ცაში წამიყვანდა,  
ღრუბლად ვიქცეოდი იმწამს,  
რომ კვლავ წვიმით დამენამა  
ჩემი საქართველოს მიწა.

## ჩემი ჰობი პოეზიაა



### ნანი გაჩეჩილაძე

ხაშურის სამუსიკო სკოლის მასწავლებელი, სატელევიზიო გადაცემის „დიადემის“ წამყვანი და რეჟისორი, გამოცემული აქვს ლექსების კრებული

### დამილოცეთ საქართველო

დამილოცეთ მთა და ბარი,  
დამილოცეთ მზე და მთვარე,  
დამილოცეთ ბაღ-ვენახი,  
დამილოცეთ მტერ-მოყვარე.  
დამილოცეთ სამაჩაბლო,  
დამილოცეთ ხევსურეთი,  
დამილოცეთ იმერეთი -  
დამილოცეთ დედუღეთი.  
დამილოცეთ აფხაზეთი,  
ქართლ-კახეთი დამილოცეთ,  
ვარძია და უფლისციხე,  
ბეთანია დამილოცეთ.  
მეტეხი და ანანური,  
ალავერდი და სიონი,  
ჩემი მტკვარი, ჩემი ქსანი,  
ალაზანი და რიონი.  
დამწერლობა დამილოცეთ,  
რომ ცოცხლობს და კვლავ ხმიანებს,

## ჩემი ჰობი პოეზიაა

ანა-ბანას ყველა ბგერა  
უნაზესად დამიკოცნეთ...  
დამილოცეთ სპა-ლაშქარი,  
მეომრები თოროსანნი,  
დამილოცეთ დედა ენა,  
შოთას „ვეფხისტყაოსანი“.  
დამილოცეთ „ჩაკრულო“ და  
„იავენანას“ ნაზი ჰანგი,  
„სამაია“ დამილოცეთ,  
ააჟღერეთ გზნებით ჩანგი.  
მზის სადარი ქალწულები,  
რანდები სანაქებო,  
ყველამ ერთად, სავსე თასით  
დამილოცეთ საქართველო!

## მოიზომე გაზაფხული ტანზე

აპრილია, აყვავილდა ნუში,  
გადაპენტა მთა-ბარი თუ დაბა,  
მოიზომე გაზაფხული ტანზე  
შეიკერე მოჩითული კაბა.  
გაზაფხული მაცდურივით გიხმობს,  
ქალი ხარ და როგორ გამღებ მარტო?  
გული ახალ მელოდიას მღერის,  
საგულედან ამოვარდნას ლამობს.  
რალას უცდი, გულს გაუღე კარი,  
გაახარე გულში ია-ია,  
ფრთოსანივით ცად აფრინდი უფრთოდ,  
აიტეხე სულში „რია-რია“  
ვარდობისთვეც მალე გესტუმრება  
ვარდფურცლებით სამოსს მოგიქარგავს,  
გულის სწორი უსტარს გამოგზავნის,  
პაემანზე გელოდება, ქალავ!



## ჩემი ჰობი პოეზიაა

### გიხმობს მამული!

დემეტრევ, გესმის? - გიხმობს მამული.  
შენი არაგვი, შენი რიონი,  
შენი რუსთველი, ვაჟა, ილია,  
ლექსის გენია - გალაკტიონი.  
გიხმობს, გემახის, გავალებს, გმოდღვრავს,  
დაიცვა მათი ძვალთშესალაგი,  
რომ ვერ ბედავდეს მის აოხრებას  
გადამთიელი მტერი ვერაგი.  
„უფლისციხე“ და „ვარძია“ გიხმობს  
ღვთიური ფრესკა გიხმობს თამარის...  
სვეტიცხოველში ზარი გუგუნებს,  
წარსულ დროების იწყებს ღაღადის...  
მიაყურადე, გიამბობს, უტას  
როგორ მოკვეთეს უღმრთოდ მარჯვენა,  
მემატიანეს ჩაუწერია,  
სინამდვილეა, არა ზმანება.  
დრომ ყველა ტკივილს როგორ გაუძლო,  
ცუდიც და კარგიც ჩაწერილია,  
შენი დრო დადგა, არ ჩაიმუხლო,  
ძველიც, ახალიც მისახედია.  
„პარხალი“, „ბანა“, „ოშკი“, „ხახული“,  
სანამ ნანგრევად გადიქვევიან,  
სვეტად დაუდექ, დრო აღარ ითმენს,  
სულის შებერვით ჩაიშლებიან.  
მიხედე „ზარზმას“, „ჯვარსა“ და „სიონს“,  
„სამების“ მაღლი ყველგან გფარავდეს,  
მიხედე მიწას, გასწიე იგი  
„ნიკოპსიიდან დარუბანდამდე“.  
ხედავ, დემეტრევ, რის პატრონი ხარ,  
განძი, სიმდიდრე, რაც გაზადია,  
სამშობლოს ბედი, მისი სიცოცხლე  
შენს თაობას და შენ გაზარია!

## ჩემი ჰობი პოეზიაა



### კლარა გელაშვილი - კვინიკაძისა

დაიბადა 1964 წლის 27 სექტემბერს, ახალციხის რაიონის სოფელ საყუნეთში. ათი წლისა იყო, ნისლისფერი მუზა რომ ეწვია...პროფესიით ფილოლოგი, მოწოდებით პოეტი, სულით მუამბოხე. ცხოვრობს ქვიშხეთში. დიმიტრი ყიფიანის

სახლ-მუზეუმის ფონდების მცველი. გამოცემული აქვს ერთი პოეტური კრებული. ჰყავს მეუღლე, სამი შვილი და ერთი შვილიშვილი

### ყოფილი.....

„ყოფილი სატრფო, ყოფილი დედა...“

ბელა შალვაშვილი

თუ როსმე გავხდი ყოფილი ქალი,  
თვალს სხივი ჩაცხრა, გულში კი თრთოლვა,  
ვინ შეაჩერა ლამაზი წამი?!-  
ხსოვნით მოგპარგავ, რაც უკვე მქონდა!  
თუ როსმე გავხდი ყოფილი ცოლი,  
ცხოვრების კიდეს შემოვრჩი მარტო,  
მე არ ვიქნები ამგვარი ერთი,  
უფალს საყვედურს შევკადრებ, რატო?  
დე, გავხდე ქალი, დე, გავხდე ცოლი -  
უარყოფილის ცრემლით რომ დნება,  
ცხოვრებას ჩემსას ერთი აქვს აზრი -  
არ მინდა, მერქვას ყოფილი დედა!

\*\*\*

სადაურობას

მკითხავდა ერთი...

(ჯერ საქართველოს

მზეს დავიფიცებ)

მახსოვს, მესხეთში

## ჩემი ჰობი პოეზიაა

დიდილოს ვკრეფდი,  
მერე ქვიშხეთში  
გ ა მ ო ვ ი ღ ვ ი ძ ე.

### ფერეიდანული ელეგია

ასე ნუ მიმზერ, მეგობარო,  
შენი ჯიშის ვარ,  
დრომ თავს რომ ჩალმა მომახვია,  
მე ის ბიჭი ვარ...  
ირანის ქვიშამ დამიხრუკა  
ფეხის გულები,  
ალბათ, ამიტომ, მაგ მიწაზე  
ვეღარ ვბრუნდები.  
ვიცი, არ შეცვლის ეს ყრუ გმინვა  
ახლა არაფერს,  
მზე გაცრეცილა, ღრუბლიანში  
ვადებ დარაბებს.  
რწმენა ვიცვალე, სხვა არ იყო  
გზა და საშველი,  
მაგრამ იცოდე, მაინც მქვია  
ბიჭო, ქართველი!  
იქნებ, გგონია, სპარსული მაქვს  
ზნე და ჩვევები?!  
ქალს არც მათ ვაძლევეთ,  
არც იმათსას არ ვეჩემებით...  
არ გაიკარეს, ვერ იგუეს  
ჩადრი სახეზე,  
საქართველოსკენ წამომსვლელ გზებს  
ისევ დავემბთ...  
კვდება იმედი, მიწის ყვივლს  
ვისმენთ შორიდან,  
ახლა მაგ ცის ქვეშ  
სიკვდილიც კი შვებად მომინდა!  
ფერეიდანში სოფლებს ვარქმევთ  
ქართულ სახელებს,  
მე ეს მარტყოფი  
ჩემი მიწის სურნელს მახსენებს!  
ვით სამშობლოში დაბრუნება

## ჩემი ჰობი პოეზიაა

სხვებს არ ეღირსათ,  
ფერიდან საფლავია  
ჩემი ბედისაც!  
აქ, სიზმარშიც კი ნეტარებას  
ზღუდავს საზღვრები,  
აკაკის ფირუზ ცას გვახარბებს  
მთები ყაზბეგის...  
ასე ნუ მიმზერ, მეგობარო,  
შენი ჯიშის ვარ,  
დრომ თავს რომ ჩალმა მომახვია,  
მე ის ბიჭი ვარ....

## ექვშეთუტანელი სიყვარული

უდროოდ მოვიდა მწუხარება,  
ფრთებზე წამეკიდა ცეცხლი.  
თუმცა გვიანია სინანული,  
რადგან ველარაფერს შევცვლი.  
მამინ შევიგრძენი დედამიწა,  
თავზე რომ დამექცა ბუდე,  
ველარ შემიფარა ცრემლიანი  
დედის გათოშილმა უბემ...  
შვილის შიშამდგარი თვალებისთვის

დღეს ცრემლის დამალვა შევძელ,  
ექვშეთუტანელი სიყვარულის  
მადლი დავკარგე და , ვემებ!...

## მხოლოდ ქართულად...

გადამითარგმნეთ, ცხელი გული გადამითარგმნეთ,  
ატატებული გრძნობა თარგმნოთ იქნებ ჩინურად,  
გადამითარგმნეთ უნაზესი სულის სიმძაფრე  
ან ქართული ცის ცისარტყელა თარგმნეთ ფინურად.  
გადამითარგმნეთ, გთხოვთ, მთაწმინდა გადამითარგმნეთ,  
გადამითარგმნეთ, ბერმუხა და ცეცხლის ღაღარი,  
გადამითარგმნეთ უფლისციხე, მერე ვარძია,  
უცხო პალიტრით მიმოხატეთ ფრესკა თამარის.

## ჩემი ჰობი პოეზიაა

გადამითარგმნეთ დიდოსტატის დიდი მარჯვენა,  
სვეტიცხოველში ცხელი გულის თარგმნეთ საფლავი,  
გადამითარგმნეთ, როგორ იცავს მიწას მადლიანს  
გალაკტიონის იისფერი თოვლის საბანი.  
გადამითარგმნეთ, სიყვარული გადამითარგმნეთ,  
გადამითარგმნეთ „გენაცვალე“, თუნდაც „გეთაყვა“,  
დედაენაში აკინძული ჩვენი ფოლკლორი,  
მითებიტა და ლეგენდებით სახსე ქვეყანა!  
გადამითარგმნეთ, ქარაფები გადამითარგმნეთ,  
მერე მათთვისაც გამოძებნოთ ახსნა, ეგების -  
თუ რად წამოსცდა მოყმის დედას სიტყვა სამძიმრად  
დაე, იცოდნენ: სისხლით სისხლს რომ არ მიეგების!..  
გადამითარგმნეთ, უფლის მაღლი გადამითარგმნეთ,  
ტატოს „მერანი“ - ნახე, როგორ მიჰქრის ზღაპრულად,  
გადამითარგმნეთ, საქართველო გადამითარგმნეთ,  
ვით ათრთოლდები, თუ არ ითქვა იგი ქართულად?!  
გადამითარგმნეთ, მწუხრის ჟამი გადამითარგმნეთ,  
**ღმერთო, თარგმნილი ჩემი გრძნობა როგორ გაკადრეთ?!**  
რა ვქნა, მიყვარხართ თუკი მხოლოდ, მხოლოდ ქართულად  
ამ ცისქვეშეთში ჩემი მიწა რომ არ დაგვკარგო!


### ჟამთა სიავე

ჟამთა სიავემ მერამდენე მსხვერპლად გაქცია,  
უცხო გზის გავლით უნდა ჰპოვო შენი სავანე,  
ცივი გონება ფუჭი ფიქრით დაგიქანცია,  
უფრთოდ შთენილო, ქარიშხალი რაღას წაგართმევს?!

ვიცი, დასმია არსებობას კითხვის ნიშანი,  
საგნადქცეული სული სხეულს ისე გაჰყრია,  
თითქოს არასდროს არ გქონია რამე მიზანი,  
თითქოს სიცოცხლე ერთი ჭიქა ღვინის ფასია!

ჰოი, მერანო, შეგიღებავს შავად ფაფარი,  
დაუჭედავი ტერფი უცხო მიწას ატყვია,  
თავს ნუ იტყუებ, დღეს საშველი არსად არ არის,  
მშობელი მიწა საოცარი ანდამატია!

## ჩემი ჰობი პოეზიაა



### გიორგი გელაშვილი

დაიბადა 1939 წლის 16 სექტემბერს ხაშურის რაიონის სოფელ ქვიშხეთში. პროფესიით ისტორიკოსი. ლექსების წერა 1970-იანი წლებიდან დაიწყო. გამოცემული აქვს ორი პოეტური კრებული. მუშაობს დიმიტრი ყიფიანის სახლ-მუზეუმში.

### ცხენი

თავისუფლებას  
და ლაღად ნავარდს  
დრო ულმოზელი  
ქამანდით სდევდა,  
ბედს შერიგებულს  
თვალეზში უკრთის  
თვალუწვდენელი  
ტრამალის სევდა.

### სახლი

რა საშინელი  
სანახავია  
დაშლილი სახლი -  
კერაჩამქრალი,  
ჩემი სამშობლოს  
და ჩემი ხალხის  
მარადი სევდა  
და ცრემლის კვალი.

## ჩემი ჰობი პოეზიაა

### ნოტი სიყვარულისა

რითაც მოვედი,  
ვიცხოვრე დღემდე  
და ვისაც ვუნთე  
ლოცვით სანთელი,  
ის გულის სითბო  
ვინატრე ბევრჯერ,  
ღმერთო, რამდენი  
დამრჩა სათქმელი!  
როგორ მარტო ვარ, -  
ვჭურჭულე ჩემთვის,  
სად გაიყარა  
ნეტავ ის გზები?!  
რა უიმედოდ,  
რა გულის ფეთქვით  
ვწერე რამდენი  
შენზე - ლექსები!

### დედას

საწოლის თავთან დევს ყავარჯნები...  
ძილში შფოთავ და ჩუმად კვნესი,  
დაწყევლილ ბედის ტიალ ჯამიდან  
ყველა სიმწარე და შხამი შესვი.  
სარკმლიდან უმზერ ქვეყანას და მზეს,  
რისთვის გსჯის ღმერთი, ო, რაღა მწამდეს?!  
არ ვიცი, დედა, რად გერგო ეს გზა,  
უფალოზე მლოცველს და და მართალს ცამდე!  
რით განუგეშო, რით, შენ შემყურემ?!  
სულ წვალებაში, შრომაში დადნი,  
როგორ აკლია ამ ეზო-ყურეს  
შენი ხელების სითბო და მაღლი.  
ვნატრობ ბავშვობის იმ ნეტარ წამებს,  
როს არ მაკრთობდა ჟამის უკუნი  
და ყავარჯნების, სულში წამებად,  
მონოტონური ნელი კაკუნი.  
ნეტავი ის დრო დაბრუნდებოდეს,

## ჩემი ჰობი პოეზიაა

ტკბილად რომ ვთვლემდი შენს ნაჯაფ ხელზე,  
შენ მყავხარ მხოლოდ იმედად, დედა,  
ამ უხარმახარ სამყაროს ველზე!

### ექ, დრო მოვიდა

ექ, დრო მოვიდა  
სადაც, ლაჩრობას  
და ფასი ადევს  
ღრეჭვა-მასხრობას,

ბრძენს, ჭკვიანს, სწავლულს  
ფასი აღარ აქვს,  
ბოლო არ უჩანს  
ტაკიმასხრობას.

### ტამარში

კრტიან ლანდები  
სანთლების აღზე,  
ლოცვაა ჯვარცმა -  
ცოდვილთ მისია.  
შენდობას ითხოვს  
ყველა, უფალო,  
მხოლოდ შენ უწყი,-  
ვინ რის ღირსია.

### მამას

მძინარს მიუხტა გამთენიისას,  
ვინ რას გაუგებს ბედის თამაშებს?  
ნაქეიფარზე უთხრა შამათი, -  
ასე მოუგო ბედმა მამაჩემს.



## ჩემი ჰობი პოეზიაა

\*\*\*

დამუნჯებულან,  
დაყრუებულან,  
აკრძალულია  
ახლა რამის თქმა;  
ქვა-ღორღს აყრიან,  
ვისაც აწუხებს  
სამშობლოს ბედი,  
მისი გულისთქმა.

\*\*\*

რაც დამაბადა  
ზენამ,  
(საით წაუხვალ წილხვედრს)  
მინდა, ამ ტიალ  
გზებზე  
სიკეთის ფასსაც  
მივხვდე.  
ავს ავიც ყოფნის  
სასჯელად,  
ეყოფათ დარდად  
ცოცხლებს,  
ღმერთო,  
მაცხოვრე ისე, რომ  
სიცოცხლე  
მიხაროდეს.

### **სამშობლო**

სამშობლოვ,  
სულ ვეფერები  
შენს ტკივილებს  
და იარებს.  
ამ ტიალ დროში  
მე და შენ  
რა თარსი  
გზებით ვიარეთ.  
ვიარეთ,

## ჩემი ჰობი პოეზიაა

ვერსად ვიპოვეთ  
ამ მიწის  
ერთგული შვილი,  
ვერ ვნახეთ  
ჩვენდა პატრონად  
ერთ კარგი  
მამულიშვილი.

## წლები ჯოჯოხეთის

გადაგვიკეტეს  
ყველა ბილიკი.  
გლოვისფერია  
ჩემი მამული...  
გზებზე პატრული  
ავტომატებით...  
განწირული ვართ,  
მიტოვებულნი.  
კარს მოგვდგომია  
მტერი სატანა,  
ვინ შეგვაჩეჩა  
ეს დამთხვეული,  
ვარდით მოვიდა,  
ეკალი შეგვრჩა,  
ჯოჯოხეთში ვართ  
გამომწყვდეული.

## ჯვარი მოგლიჯეს

ჯვარი მოგლიჯეს  
ქრისტეს ქვეყნიდან -  
ჯვარი რწმენის და  
ჯვარი უფლისა.  
ვიღას შევჩვილოთ  
ჩვენი ვარამი,  
შვილებს ურჯულოდ

ხაშურის გზაგასაყარზე აღმართული  
ჯვარი ვიღაც მაღალი მოხელის ბრძანებით  
ღამით მალულად მოგლიჯეს.

## ჩემი ჰობი პოეზიაა

როცა ნათლავენ,  
როცა ბილწავენ ველურ ხარხართ  
მამა-პაპათა ნაფიც საფლავებს.

### ჰარმონია

ვიწრო ოთახში  
სუფრას ვუსხედით,  
თამადად გვყავდა  
უცვლელი ბოსი,  
ისმოდა ტკბილი  
მუსიკის ჰანგი,  
ხმა ჯადოსნური  
ვიოლინოსი..  
თავი დაგედო  
მეგობრის მხარზე  
ო, თითქოს გქონდა  
სევდა რამ, დარდი,  
გიცქერდი მალვით  
და სიყვარულით,  
რა კარგი იყავ,  
ღმერთო, რა კარგი!

### ჩემო მამულო

იავარქმნილო მამულო,  
ჩემო კვნესავ და  
ტკივილო,  
დაჭრილო ჩვენგან უწყალოდ  
და ჩვენგან  
სიკვდილმისჯილო.  
შენი მტრები და მკვლელები  
დაძრწიან, დაბოგინობენ,  
ეს გველი სისხლისმსმელები  
წყალგაღმა დაქოწინობენ...  
იავარქმნილო  
მამულო, როგორ გაქრი და  
გასხვისდი,

## ჩემი ჰობი პოეზიაა

როგორ გღრღნიან და  
გსანსლავენ,  
გულო, გასკვი და  
გასივდი.



ქვიშხეთი

## ჩემი ჰობი პოეზიაა



### თედორე გოგოლაძე

დაიბადა 1992 წლის 8 აგვისტოს, ქ. ხაშურში. 1998 წელს შევიდა ხაშურის პირველ საჯარო სკოლაში. 2004 წელს ოჯახი თბილისში გადავიდა საცხოვრებლად.

2010 წელს წარჩინებით დამთავრა ინგლისურენოვანი კოლეჯი „ნინო“ . იმავე წელს ჩაირიცხა შოთა რუსთაველის სახელობის თეატრალურ უნივერსიტეტში კინო-საოპერატორო ფაკულტეტზე.

ბავშვობიდან წერს ლექსებს.

### გოს

ჩვენ დავიტიეთ მთელი სამყარო,  
ერთად ვლენწავდით კერპებს,  
ამდენი დარდი სად გადავყარო,  
ან სად გავქეცე დღეებს?!

იყო ბავშვობა, პირველი თოვლი,  
მაგრამ მალევე დაიწყო დნობა,  
ერთად გავლილი წუთები ბროლის  
და სიყვარულით დილამდე თრობა.

შენ მოგელიან დიდი ხნის ძმები  
და საუკუნე იცლება თითქოს.  
იკარგებიან ნისლებში გზები,  
მე მათ ვუტოვებ გაცვეთილ სტრიქონს.!

რამდენ ომსა და ბრძოლას ვუძლებდით,  
მაგრამ რამდენი დავტოვეთ უკან,

## ჩემი ჰობი პოეზიაა

როგორც არასდროს, ისე ვბრუნდებით -  
ყოველი წამი ვაფასოთ უნდა.

ის ოცნებები, უსაზღვრო, ვრცელი  
ამოავსებენ იმ ძველ იარებს.  
ცხოვრება - როგორც ზღვაშია წვეთი,  
ჩვენსკენაც მალე გამოიღარებს.

\*\*\*

მისაუბრია მე ხშირად ღმერთთან,  
ხანაც არასწორ გზებით მივლია,  
შენ თუ მიხვდები, დარჩები ჩემთან -  
ბედნიერება ამოხსნილია.

\*\*\*

ოცნებას დავხატავ ტილოზე,  
მოგიძღვნი უხილავ სამყაროს,  
შენ ჩემი ტკივილი გიწოდე,  
არ მინდა, ფიქრებმა დაგკარგონ,  
ვეწვიე სიცივის სამეფოს...  
გეძახი... შენამდე შორია...  
და გზები, დაღლილი ბავშვივით,  
წარსულის კვალდაკვალ მოდიან.

\*\*\*

შემოაბერდა ხეებს ფოთლები,  
ისევ ვზივარ და ისევ ვღონდები...  
ცაზე იწვიან ჩუმად ღრუბლები,  
თითქოს მივდივარ... თითქოს ვბრუნდები...

\*\*\*

დღე გაირინდა ჩვილის აკვანში  
და უცნაური ჩამოწვა სევდა,  
ეს სიყმაწვილე, ბურთის თამაში,  
მხოლოდ ღამეულ სიზმრებში ჩნდება...  
რაც ავაშენე, დარჩა ნამტვრევი  
იმ იდუმალი კომპკების ნაცვლად,  
ჩემს გულს ლოდებად ადევს თვრამეტი,

## ჩემი ჰობი პოეზიაა

ამდენი ხანი რომ მსჯიდა მკაცრად.

გაშლილ მდელოზე შეენიშნე მუხა,  
მინდოდა, მის ქვეშ შევფარებოდი,

მაგრამ მაშინაც სიკვდილი ქუხდა...

რა იქნებოდა, რომ გყვარებოდი?!

ახლა კი მხოლოდ დამრჩა ლექსებად  
მონატრება და ტკივილი დიდი,  
სხვა როცა სხვისგან ელოდა კარნახს,  
ვიჯექი მარტო და ჩემს ბედს ვთლიდი.

## თქვენ, ქალბატონო!

დამცინეთ, ქალბატონო, დამცინეთ  
თქვენი სიყვარულის გამო,  
გამკიცხეთ, სამუდამოდ გამკიცხეთ,  
მაინც თავზე მეტად გყვარობთ...

თქვენ ხართ, ქალბატონო, ჩემი,  
ჩემი იმედი და ვნება,  
თითქოს ახირებად რჩებით,  
თითქოს აუხდენელ მცნებად.

წამში შემაყვარეთ თავი,  
წამში ამირიეთ თავგზა,  
თქვენი მოტრფიალე გავხდი,  
თქვენი სიყვარული მწვავდა.

ძლიერ მივეძალე სასმელს,  
დროსთან საუკუნეს ვიყოფ...  
და თუ არ იქნებით ჩემი,  
მინდა ბედნიერი იყოთ.

## ... ჩემო...

ჩემო დაკარგულო რწმენავ,  
ჩემო დაკარგულო ღმერთო,  
ჩემო იმედების წყებავ,  
ჩემო სიცოცხლეზე მეტო..

## ჩემი ჰობი პოეზიაა

ჩემო ფიქრებო და ტანჯვაჲ,  
ჩემო ოცნებაო, ერთო,  
შენთვის ავიტანე ჯვარცმა,  
მზად ვარ, კვლავ კელაპრტად გენთო.  
როგორ გადავურჩე, ვფიქრობ,

ზღვაში ლომად ქცეულ ტალღებს,  
როცა შეფეთქება თითო  
ბოლო იმედებსაც ანგრევს.

ჩემო ზამთარო და ყინვაჲ,  
ვისთვის ცხელ ზაფხულში ჩერო,  
ქვეყნად ყველაფერზე წმინდაჲ,  
ჩემო ერთადერთო, ჩემო!..



წრომი



## ჩემი ჰობი პოეზიაა



### ეთერ გონგლაძე-ცხოვრებაშვილი

დაიბადა ქ. ხაშურში. 1982წელს დაამთავრა თბილისის მეორე სამედიცინო სასწავლებელი „ბებია ქალის“ სპეციალობით. ამჟამად დიასახლისია. ჰყავს მეუღლე და სამი შვილი.

### მუხამბაზი

ნეტავ მართლა ჩუმად მყავდე  
არა სხვისა ზიარად,  
შენი სუნთქვა მახელებდეს  
სხვისი სულთქმა კი არა.

შენს ბაგეთა სითბოს ვგრძნობდე  
სხვის ბაგეთა კი არა,  
სიყვარულის ცეცხლი მწვავდეს  
ჯოჯოხეთის კი არა .

შენი მზერა მესალბუნოს  
არა სიო დილისა,  
როგორ მინდა მერქვას შენი  
„პაწაწინა თილისმა“.

გულში სხივად ჩაგისახლდე,  
სიყვარულის შარბათს ვსვამდე,  
ნეტავ მართლა შენთან ვიყო,  
ნეტავ მართლა ჩუმად მყავდე.

\*\*\*

ცაჩამოქცეულ ცივ ღამეს  
დასველებოდა პერანგი,  
შენზე ფიქრები მართობდა  
არა შმაგი და ვერაგი.

## ჩემი ჰობი პოეზიაა

თვალს რული დავიწყებოდა,  
სულში სანძარი ენთო,  
გული ერთს იმეორებდა,  
-რა ვქნა, მიყვარხარ, ერთო.

## ჩვენი არჩევანი

შენ ჩემო ათასნაირო  
ლამის ფიქრო და სიზმარო  
წვეთ-წვეთად მასმევ ცივ ბადაგს  
რა გზა მაქვს?! - უნდა ვიკმარო.  
ვიარებოდი, გემებდი,  
გნახე და ვერა გითხარო,  
მე „არადანი“ ვირჩიე  
შენ? - არჩევანში“ - ვის ხარო?  
დედას გაფიცებ ნუ მომკლავ  
ვიდრე ცოცხალ ვარ, - მითხარო.  
შენი არსობა ჩემს ყოფას შვენი  
შენი ვარ ჩემო, შენი ვარ, შენი!!

## მეც!


ცოტაც და გაიზაფხულებს  
გულს მოიბრუნებს მზეც.  
ეს სუსხიც დაგვავიწყდება  
ყველას, მათ შორის მეც.  
მემახსოვრება უდავოდ  
ყველგან , ღამეც და დღეც,  
როგორი ცეცხლით მათბობდა  
სიტყვა - მიყვარხარ! - მეც!

## ვაგლახ, რომ შენთან არა ვარ

შენს გვერდით ყოფნა შემეძლოს?!  
მოგიკლავ დარდის ჭიასა,  
სულ ბაიათებს გიმღერდი,  
გულს მოგართმევდი ღიასა.

## ჩემი ჰობი პოეზიაა

მზესავით ვაცისკროვნებდი  
ლამეს სევდიანს, ცვრიანსა,  
შეგიშრობ დანამულ თვალებს  
დარდს გავატანდი წიავდა.  
ცივ ზამთარს გიზაფხულებდი,  
თავს განაცვლიდი ტიალსა.  
არ მოგისვენებ ვიდრემდის  
არ გნახავ ბაგემზიანსა.  
მაგრამ, ვაგლახ, რომ უშენოდ  
გული კვნესს წიავ-წიავსა...  
დღენი უკითხავ მიფრენენ,  
ვერ ვკავობ ოხერტიალსა.



## ჩემი ჰობი პოეზიაა



### ლილი გრიგალაშვილი

დაიბადა 1961 წელს ქვიშხეთში. პროფესიით ეკონომისტი. ამჟამად დიასახლისი. ჰყავს მეუღლე და სამი შვილი.

### მონატრება

ნეტავი, ასე რატომ მენატრება  
ჩემი ბავშვობის წლები,  
ჩემი ქვიშხეთი, ჩემი მთაწმინდა  
ჩემი ოცნების მთები...  
მინდა, მოვეფერო მიწას და ბალახს,  
პურის თავთავების კალოს,  
ბავშვით მოვირბინო ეზო-კარმიდამო,  
ჩიტის ბუდეები ვთვალო.  
დედა მენატრება, დედა მიღუული,  
მაინც დედაბოძად მდგარი,  
მუდამ მოფუსფუსე, ღამეგათეული,  
ცხელი თონე და ძარი.  
პურებს მოჩენილი ჩვენი ეზოს ძაღლი,  
ყელყელა სურაში წყაროს ცივი წყალი,  
ჩემი კბილა გოგო - თეთრი მეგობარი  
კალთა აწეული სავსე მწიფე მსხალით...  
ზღაპარ-იყო, - ისე მომენატრა,  
ჩემი ორღობე და ჩიხი .  
ჩემი მეგობრები უნდა ვინახულო  
უნდა მოვირბინო ლიხი...

უნდა ჩავიზნო თეთრი ენძელები  
ბავშვურად აწეწილ თმებში,  
ნიავეს ავედევნო, პეპლებს მოვეფერო,  
მზის სხივს ვეთამაშო სხვენში.  
უნდა შევაგროვო ასკილი და  
ლურჯად შეთვალული კვრინჩხი,  
თორემ გამაგიჟებს მონატრება...

## ჩემი ჰობი პოეზიაა

თორემ გამიჩნდება შიში.

წლები გასულა, დროს გაჰყოლია,  
ვერგავ სევდაში ბედნიერ ღიმილს,  
ჩემი ბავშვობა ისევ მეძახის...  
ისევ ცხელია მზე გაზაფხულის.

## მახილი

აღარ -  
იგი მონატრება,  
აღარ -  
იგი შეხვედრები,  
ზამთრის სუსხი დათარეშობს,  
წლებს გადაჰყვა შარბათები...  
თუ კვლავ მოვა გაზაფხული,  
აპრილი და ყვავილები,  
ქედს მოვიხრი ბედმორჩილი,  
კიდევ ერთხელ ავინთები.  
შენს მომახილს გამოყვები,  
წლებს ჩავმარცვლავ ჭრელი ფერთი,  
მერე თუნდაც მექცეს ცოდვად,  
გამოყვები ზარის რეკვით...  
ცეცხლმოდებულ გულს მოგართმევ.

კვლავ ფერხულში ჩავებმები,  
ვითამაშებ ცოდვილ ევას  
და შენს წილ მზედ გავბრწყინდები.

## ბელურა

ზამთარში, თოვა-ქარბუქში  
ჩიტი მოაწყდა მინას  
და ნისკარტს აკაკუნებდა -  
შემომიშვითო შინა...  
მე ვარო შენი ერთგული,  
შენთან შემოსვლა მინდა,  
დამაპურე და გამათბე,

## ჩემი ჰობი პოეზიაა

სხვა მეტი არა მინდა.  
გულწითელა და უმწეო  
ფრთებს სასაცილოდ შლიდა  
და მარტოობის სუსხში  
თბილ იდილიას ქმნიდა.  
მევედრებოდა შემოსვლას,  
თან სიცივისგან თრთოდა,  
-შემომიშვიო შენთან,  
რა მოხდებაო, - მთხოვდა.

## პაპაჩემი

მე ერთი პაპა მყავდა,  
იყო უბრალო, ქველი,  
გულის კარს ფართოდ აღებდა ,  
ღიმილი ჰქონდა წრფელი.  
იყო გულუხვი, მართალი,  
მოქეიფე და მთქმელი,  
უყვარდა კარგი მოლხენა,  
„ხელის დაბანა ხელით“.  
სისხლში გამჯდარი ჰქონდა  
ნედლი სურნელი მიწის,  
ნიშა ხარივით გამწევი,  
მისი ერთგული ჯიშის.  
ეხერხებოდა ღონივრად  
გუთნით გაყვანა კვალის -  
ოფლით გაპოხილ მიწაზე  
თესვა კეთილი მარცვლის.  
სულაც არ იყო ხარივით  
თვინიერი და მშვიდი,  
მტერს მტრულად შეებმებოდა  
არ ექცეოდა რიდით.  
არ დაუთმობდა ერთ გოჯს,  
მიწას გაჟღენთილს სისხლით,  
„ახლა შენ ხარო პატრონი“ –  
მე დამაფიცა ფიცით.



### მანანა დანგაძე

დაიბადა ხაშურში 1950 წლის 2 მაისს. მუსიკოსი. წერს 12 წლის ასაკიდან. ვაჟა ახარაშვილთან შეუღლებამ გამოიწვია მისი შემოქმედებითი პაუზა., რადგან თვლიდა, ერთერთს უნდა ეწერა. შვილიშვილის გაჩენამ ისევ აამეტყველა...გამოსცა ერთი პოეტური კრებული „სევდის ანარეკლი“. მწერალთა კავშირის წევრი. ასევე ფაზისის საერო აკადემიისა და ჯუმბერ ლეჟავას სახელობის მრავალპროფილიანი აკადემიის წევრი. მიღებული აქვს ჯილდო კონკურსში „წლის საუკეთესო ლექსი“. ჰყავს მეუღლე, ერთი ქალიშვილი და ორი შვილიშვილი.

### ოღონდაც...

არ მინდა ბრენდი, ვისკი, ჯინ-ტონიკი,  
ვერც რომი და ტეკილა გავიტოლე -  
ვენახი მანავით და ოჯალეშით,  
უფალო, გევედრები - დამიტოვე!  
არ მინდა ფურშეტი და პიკნიკ-ფართი .  
ვერც შოუ, შოუმენი გავიტოლე,  
თამადა მჭერმეტყველი ქრისტეს სისხლით,  
უფალო, არ მომაკლო - დამიტოვე!  
არ მინდა ჯიშად გადაგვარებული,  
სხვის ბაგას შეფარებულს ვერ ვიტომებ,  
უფალო, დამილოცე ბიბლია და  
მაცხოვრის სახარება დამიტოვე!  
არ მინდა ურჯულოთა კანონები,  
იუდა ქრისტეს მოსვლით გამოიცე,  
მამაო, გამიხარე სიცოცხლის ხე,  
ლაზარეს ამალეზა დამილოცე...  
მავანი ეკლესიას მედავება,

## ჩემი ჰობი პოეზიაა

მავანი მიწის გოჯსაც არ მიტოვებს,  
უფალო, ყველა ცოდვას ვადიარებ,  
ოდონდაც საქართველო დამიტოვებ!

### ჩემო ქართული მიწავ

კავო, სახნისო, გუთანო,  
ჩემო ქართული მიწავ  
„ღირღიტავ ბანი უთხარო“ ...  
შენს დიდ ილიას ვფიცავ!  
გეემო და გაგეგუთანო,  
შენი ერთგული მიცან,  
მერე კი არ დაინანო  
ერთი მტკაველი მიწა.  
ოშკო, სიონო, ხახულო,  
მტკვარო, რიონო, რიწავ,  
მარანო, ღვინოვ კახურო,  
მამულო, ტკბილო ფიჭავ,  
შნს სადღეგრძელოდ ავენთე,  
შენთვის დამწვარი მიცან,  
მერე კი არ დაინანო  
ერთი მტკაველი მიწა.

\*\*\*

რამდენჯერ შეიძლება ცეცხლად აენთო,  
რამდენჯერ შეიძლება მოკვდე...  
ჯოხი სულ, სულ მაღლა ასწიე , მაცეტრო,  
და ორკესტრს მიანიშნე „ფორტე“.  
ჰიმნი მიუძღვენი დამსხვრეულ სიყვარულს,  
დაფდაფებს არ დაეტყოთ დაღლა,  
არც ერთი „პიანო“ - ხმაური, ხმაური,  
აღმა სვლა, სულ მაღლა და მაღლა...  
მერე წამიერად გაჩერდეს ორკესტრი,  
თითქოს სიყვარული ვარსკვლავებს მოსწყდა,  
თითქოს დაენარცხა მიწაზე კომეტა,  
აფეთქდა, დაიმსხვრა და ... მორჩა...



## ჩემი ჰობი პოეზიაა

მერე დაუკარით მშვიდად რეკვიემი,  
გუნდმა იგალობოს ლოცვა,  
სიცოცხლე გრძელდება, - ამბობს ანგელოზი  
და მაინც... ყველაფერი მორჩა.

\*\*\*

ქარს დაემალე  
კაბას დაგიხვეს,  
მინდვრად მოსულო  
მორცხვო ყაყაჩოვ,  
მეც მომარიდე  
ეგ სილამაზე,  
თორემ მოვალ და  
კოცნით დაგახრჩობ.

### მაინც მოვა ...

მაინც მოვა გაზაფხული,  
ჩამოდნება ყინული,  
გადაიყრის ზეცა ღრუბელს  
სევდით შემოზვინულით.  
აყვავდება ყოჩივარდა ,  
ისევ მოვა მაისი,  
შემომახვევს ფიქრებს დადრად,  
ჩვეულ სიდარბაისლით.  
მაინც მოვა გაზაფხული,  
მოვა , მაგრამ უშენოდ...  
სევდასა და ამ კაემანს  
რალაც უნდა ვუშველო...



### შოთა დარბუაშვილი

დაიბადა 1955 წლის 8 მაისს, ცხინვალში. დაამთავრა ცხინვალის სახელმწიფო პედაგოგიური ინსტიტუტი ისტორია-ფილოლოგიის განხრით. კონფლიქტამდე მუშაობდა ცნობილ ანსამბლ „ბონვარონში“. იყო ამ ჯგუფის ერთერთი დამაარსებელი(1971) და მისი სამხატვრო ხელმძღვანელი 1988-90წლებში. ეწეოდა

აქტიურ ჟურნალისტურ მოღვაწეობას . სხვადასხვა წლებში მუშაობდა : „ლიტერატურული ცხინვალის“, „შიდა ქართლის“ სპეცკორესპონდენტად ცხინვალის და თბილისის ზონაში. გამოცემული აქვს ხუთი პოეტური კრებული. არის საქართველოს მწერალთა კავშირის წევრი. ამჟამად ცხოვრობს კვიშხეთში. მუშაობს დიმიტრი ყიფიანის სახლ-მუზეუმში.

\*\*\*

ჭმუნვით, გალობით, რიდით  
ისევ ავაგე ხიდი.  
გაღმა გადასვლა მინდა,  
გული კი არსად მიდის.  
ახალი დღიდან ხვალის  
შემოქმედების ტვირთი  
მხარზე ხურჯინად მადგა,  
შიგ კი ვერაფერს ვყრიდი...  
გეყო ამდენი ფიქრი,  
მოგონილია სცენა...  
ეს პოეტური სული  
პროზის ციხეში კვდება.

### ქართველის ცრემლი

ახალწლის დილას,  
იანვრის დამდეგს  
თენდება, თოვლში  
ქალაქი მოჩანს,  
ბედყოფნას ჩვენსას

## ჩემი ჰობი პოეზიაა

ვიღაც განაგებს,  
თეთრ სინათლეში  
ვიღაცა გვლოცავს...  
მაგრამ დღე გვიდგას  
ღამეზე შავი,  
ვგრძნობ, საუკუნის  
ცოდვები მტანჯავს  
და თუ გადავრჩი,  
და თუ დამცალდა,  
ბოლომდე ვამხელ  
მტყუნს და მართალს...  
და ვხედავ, ვხედავ ახალწლის ღამეს  
სიზმრად სიკვდილის  
გამოცხადებას,  
ლიახვის თავზე  
ჩამქრალი მთვარე,  
ვის გაუნათებს, ვის დასცალდება...  
ვგრძნობ, უსაშველოდ,  
საშველი არ ჩანს  
და უთენია სანთელს ვავედრებ,  
ღვთისმშობელს შევთხოვ,  
წმინდა მარიამს,  
გადამირჩინოს  
სამშობლო მხარე!  
ბედის სასწორთან  
მომძის ღალატიც  
და მოლოდინიც  
სისხლისფერია,  
ამიცრემლდება  
უეცრად თვალი,  
სამაჩაბლოში ქართველის ცრემლია!...

## მე და დედა

ავგისტოა, ცხინვალში ვარ,...  
კარგს ვერაფერს ვხედავ.  
ასეთი რა დავაშავე  
მე, ქართველმა, ნეტავ,

## ჩემი ჰობი პოეზიაა

რომ ცხინვალში ჩავრჩი ასე  
ავადმყოფი დედით:  
ვინ მარგუნა შხამით სავსე  
დამცინავი ბედი!  
ზარბაზნები ქუხან, ქუხან  
შუალამით, დილით,  
მერე რა, რომ დედას შია -  
ქრუანტელი მივლის.  
შვილო, თევაზი მენატრება -  
კრძალვით მეტყვის დედა,  
ამ სიტყვების გაგონება  
ჩემთვის არის ელდა...  
ფული სად მაქვს, დედაჩემო,  
ჩემთვის ვიტყვი ჩუმად,  
სროლის ხმაზე, უნუგეშოდ  
ტყვიებს ვცლაპავ უმად...  
თავში ლექსი მიტრიალებს,  
სტრიქონს ვაწყობ ხმებში,  
და ყოველი თოთო სიტყვა  
კვლავ მაკვდება ხელში.....  
ზარბაზანი ქუხს და სადღაც  
კვდება ერთი ბიჭი...  
ღმერთო! მიეც ოსს და ქართველს,  
დაფიქრების ნიჭი.

### სად ხარ, ჩემო მამულო...

დილის რძეში ჩამბალი  
მარტის ცივი ღრუბელი,  
ისმის შეპირებული  
მერამდენე ზღაპარი...  
შემოვლითი გზები და  
შემოვლითი ფიქრები,  
არ ავყვები ცდუნებას  
ჩემს ფიქრს მივეფიქრები...  
სად ხარ, ჩემო მამულო...  
ჩემო წყაროვ, მდინარევ  
ეს არაა სამშობლო,

## ჩემი ჰობი პოეზიაა

ფაქტით გამომდინარე:

თუ ეს ბედისწერაა,

ვკრთები ხანძრის ლოდინში,

სამაჩაბლოს ვერ დავთმობ, -რუსო, დიდი ბოდიში!..

### ქვიშხეთი

მომენტრება ჩემი ქვიშხეთი,

ჩემი მარადი ხილვა,

ჩავალ სოფელში, ჩემს დედულეთში,

იქვე დავიდებ ბინას.

მერე ვინატრებ იმ დღეს, რომელსაც

ჩემს ნაზ ხილვებში სძინავს,

კოშკის უბანი, წყარო, მთაწმინდა,

ფიქრი გაჰფანტავს ნაღველს,

ქარი კვლავ გაშლის ფეხადგმულ სტრიქონს,

ანდა მთელ ფურცელს დახევს.

დღეები ისე სწრაფად მიჰქრიან

გინდა ინატრო რამე...

### ღვინობისთვეში

ფოთლებმა მკერდზე გაშალეს დილა,

ჩამოიშალა ნისლები მთებით.

გიჟმაჟი სრბოლა იმ ღამეს შერჩა,

შემოდგომაა, სურნელით ვტკბები.

ავაბილიკებ განდეგილ არეს,

გავყვები ჭორფლით განფენილ მინდორს,

მისთვის ვეწამე და გიერთგულე,

რომ ჩემი გულის სუნთქვა გაუწყო.

მხოლოდ შენ ძალგამს ჩასახლდე ჩემში,

გადამიხუნძლო სული მტუევნებით;

ღვინობისთვეში ქვიშხეთში ვთვრები

ჯამში ჩაღვრილი შენი ცრემლებით.

## ჩემი ჰობი პოეზიაა

### თერხვის ქარი

აქ ნიავიც ცელქია და ფრთიანია,  
თერხვის ქარი აგიმხედრებს სურვილს  
და ცაცხვებთან გარინდული ყიფიანი,

სამშობლოზე ფიქრით იკლავს წყურვილს.  
ქვიშხეთს ახსოვს სულხან-საბა და აკაკი  
აქ მგოსნების შთაგონება ენთო,  
ნინოს ლოცვით ანთებული კელაპტარი  
ამერ-იმერს ავედრებდა სამწყსოს...  
მეც მოგენდე, შენში დარჩა ჩემი გული,  
მთვარეს შერჩა დაღად თეთრი ღამე,  
საქართველოს სულიერო ზენა,  
უკვდავებით შემოსილო მხარე!

### მერე

მე ახლა ვებრძვი ჩემს მარტოობას  
და გავუსწორე თვალები სიზმრებს,  
მერე, ზამთარი სიმღერით მოვა  
და სავსე მთვარე შედგება ცერზე...  
ეს ღამე, ვიცი.. მომისვრის ცისკენ.  
ავალ. მეტყვიან: დაგაგვიანდა....  
ავიქნევ ფრთას და.. ჰაიდა, მზისკენ, -  
აი, ოცნება ადამიანთა.  
ჩემთვის სულერთი იქნება მაშინ  
რაც გაცხადდება ქვის საუფლოდან,  
გადაირევა მონასტრის ზარი  
და ხმები ცის თაღს მოეფინება.

## ჩემი ჰობი პოეზიაა



### იზო ელიაშვილი

დაიბადა 1939 წელს, ქარელის რაიონის სოფელ მოხისში. დაამთავრა გორის ნიკოლოზ ბარათაშვილის სახელობის პედაგოგიური ინსტიტუტი მათემატიკის სპეციალობით. სხვადასხვა დროს ასწავლიდა ძლევისჯვარში, მოხისში, ტკოცაში, სურამში და 25 წლის განმავლობაში იყო სურამის 64-ე პროფტექნიკური სასწავლებლის სასწავლო ნაწილის გამგე. ახალგაზრდობიდანვე წერს ლექსებს. გამოცემული აქვს ლექსების

კრებული. გარდაიცვალა 2012 წელს.

### ღორინამკალზე

ღორინამკალზე ათევდა მთვარე,  
ხეთა ჩრდილები ხევებს ლანდავდა,  
ქარი ძერწავდა ჭინკების დავლურს  
და ვარსკვლავები ზეცას ქარგავდა.

ღორინამკალიდან სამყარო მოჩანს  
და მის პატრონად მიიჩნევ შენს თავს  
და თუ ამდენად კადნიერდები  
ლაპარაკს იწყებ ცაში თვით ღმერთთან.

ღორინამკალიდან მოჩანს ყინწვისი.  
მოჩანს ურბნისი, მოჩანს მთაწმინდა,  
სუმბათაშვილის თავადის ლანდიც,  
გლებთა ხარებს რომ თავებს აცლიდა.

ღორინამკალიდან გორგასალიც ჩანს,  
დავითი, ცოტნე, მეფე თამარი.  
ღორინამკალიდან მოჩანს დიდგორი -  
გულანთებული გმირი მრავალი.

## ჩემი ჰობი პოეზიაა

ღორინამკლიდან არტანუჯიც ჩანს,  
ართვინი, ოშკი, ტაო, უბისი.  
მაგრამ ყველაზე ლამაზად მოჩანს  
ღორინამკლიდან მცხეთა, თბილისი.

ღორინამკალზე ყვივის არწივი,  
როგორც საყვირი ერეკლეს ჯარის,  
ღორინამკალს ხომ ამშვენებს ახლაც  
ზვიადის დროშა და ნინოს ჯვარი.

### ხაშურის ზეცა

აღმატებულან სიმდერად, ქებად  
ბათუმი, გორი და ქუთაისი.  
მათ არ იციან, რომ შენს ზეცაზე  
რა სილამაზით ელავს აისი.

არ გვითქვამს შენთვის მრავალი ლექსი,  
ვერ შემოგბედეთ დიდებულს ქება,  
ხაშურელი ხომ პოეტსა ნიშნავს,  
ყველა მათგანი ფლობს უფლის ენას.

დილის რიჟ-რაჟში ამოწვერილი  
სხვაგვარად კრთება ცაზე ცისკარი  
და უსაშველოდ ამაღლებული  
ლექსს უჩურჩულებს სატრფოს ჩინარი.

მთვარის სხივებით განათებული  
ვერცხლისფრად ბრწყინავს ღორინამკალი,  
მის ერთერთპიკზე გარკვევითა ჩანს  
უზარმაზარი ნაჭედი ჯვარი.

ტაშისკრის ველზე ციცინათელებს  
ცად აუწვდიათ ჭიაკოკონა,  
ოცით, რამდენი სილამაზეა?  
არც ისე ცოტა, სხვებს რომ ეგონათ.

სასიქადულოდ ფესვებმლიერო  
კვლავ მაგ სიმველის მანტია გესხას,  
არსად გვეგულების ასე კამკამა,  
როგორც არის ხაშურის ზეცა.

ისეთი ხიბლით გვიზიდავ შენსკენ,  
ისე კარგი ხარ, ჩვენო ხაშურო,  
რომ შენს შუკებს და ქუჩაბანდებში  
მინდა ნაკურთხი წყალი ვაპკურო.



## ჩემი ჰობი პოეზიაა

ხაშურში ყველა პოეტი არის,  
და შენ, ხაშურო, პოეტთა დედა.  
ცა დაგვილოცეთ ციურ-სხეულნო,  
ლექსები გვინდა გავაკრათ ზეცას.

### თუ ვერ ვხვდებით

თუ ცას კიბე ვერ მივადგით,  
ზღვას ვერ გავდეთ ხიდი,  
ვერ დავკრიფეთ ვარსკვლავები  
უფლის დიდი რიდით,  
თევზებიც ვერ დავითვალეთ  
ზღვის ღმერთების შიშით,  
თუ ვერ მივხვდით რად გვაღელვებს  
ყვავილები ხიბლით,

თუ ვერ ვხვდებით, მზე რად არის  
თბილი, მთვარე - ცივი,  
რად გვიხარის სიყმაწვილე  
და ცის ნამი დილის, -  
მამ, როგორღა ჩავწვდით მტრობის  
საიდუმლო ძაფებს  
და ერთმანეთს რად ვუმზადებთ  
სასიკვდილო აბებს?!  
--მოდით, ერთმანეთის სამტროდ  
ნულარ შევქმნით მითებს,  
ნუ ჩავანგრევთ გულებს შორის  
სიყვარულის ხიდებს.

### სამაჩაბლოს მონატრება

სამაჩაბლოში გაზაფხულობით  
ლამაზად იცის გამოზამთრება  
და დედამიწის ამონასუნთქი  
მსუყე სურნელით თავბრუს დახვევა.

სამაჩაბლოში წაგვართვეს მიწა,  
წაგვართვეს მზე და წაგვართვეს მთვარე,  
მშობელ მიწიდან მოწყვეტილ ხალხს და  
უმანკო ბავშვებს სვე გაუმწარეს.

## ჩემი ჰობი პოეზიაა

იქ დარჩენილი კოხტა ოდები  
გლებკაცმა შრომით, გარჯით აშენა.  
ამ სილამაზის დამანგრეველნო,  
ღირდა კი ქვეყნად თქვენი გაჩენა?

აბორგებულა თვით დედამიწაც,  
გლებკაცი ბელტზე ბელტს რომ არ ყრიდა,  
ღობეს შემუჯდარი კენტი მამალი,  
ალბათ, როგორი სიმწრით აყივლდა!

მე მონატრება მომკლავს იმ მიწის,  
იმ ველ-მინდვრების, იმ კამკამა ცის,  
ობლად დარჩენილ ვერცხლისფერ ფშატის,  
მდინარე ფრონის, სურნელი ცაცხვის.

სხვა მონატრება იცის ქართველმა,  
სხვა სიყვარული ქვეყნისა და ცის.  
სხვა ქვეყანაში განცხრომით მცხოვრებთ  
მოკლავთ სურვილი გუთნის და ფარცხის.



ცხრამუხის ტაძარი

## ჩემი ჰობი პოეზიაა



### დარეჯან თავგამე

დაიბადა 1953 წლის 1 იანვარს, ქარელის რაიონის სოფელ დირბში. დაამთავრა ადიგენის რაიონის სოფელ მოხისის საშუალო სკოლა, შემდეგ, 1974 წელს პუშკინის სახელობის პედაგოგიური ინსტიტუტის ბიბლიოთეკათმცოდნეობის ფაკულტეტი. 1974-79წლებში მუშაობდა თბილისში, ოვანეს თუმანიანის სახელობის საქალაქო ბიბლიოთეკაში, 1980 წლიდან ხაშურის ცენტრალურ ბიბლიოთეკაში, შემდეგ ხაშურის #7 საჯარო სკოლაში ბიბლიოთეკარად. ჰყავს მეუღლე და სამი შვილი

\*\*\*

პოეზია - გაცემა,  
პოეზია - ზღაპარი,  
პოეზია - სიყვარული,  
პოეზია - ლამპარი,  
პოეზია - გაცემა,  
თეთრი ფიქრი საგანთა,  
პოეზია - აზრთა წყება,  
ფიქრი დაუსაბამო...  
პოეზია მრავალთა!

### წამებად ვკვიავ

მამულზე ფიქრი გულის კოვზს ლოკავს,  
„სევდის ანარეკლს“ ვისაგზოლებ აწი.  
ახლა არ ვიცი, თუ რამე მომკლავს,  
წარსულიც, აწმყოც იშლება თვალწინ.  
მომავლის რწმენით დარდის ნისლს ვფანტავ,  
და კრითმავ ლექსებს იის მწკრივებად,

## ჩემი ჰობი პოეზიაა

„სევდის ანარეკლს“ ჩირაღდნად ვანთებ  
და სიხარულით გამეცინება.  
განუშორებლად თან მახლავს გრძნობა,  
ვუგზავნი გზავნილს ზემადალ ზეცას,  
დრო დროობს, უფლის საოცარ ნებით  
ნამომარ დღეებს წამებად ვკეცავ!

## დრო გარბის

დრო გარბის, მიწაც სიარულს აჩქარის  
და გვპარავს წამების მეასედ ნაწილებს.  
დაგროვილ წამების განძს ჩუმიად დამალავს  
და მერე სხვა დროში სხვებს გაუნაწილებს.  
ორიბი მზის სხივი ცის ტატნობს გახედავს,  
კავკასის მთებიდან ათინათს არეკლავს,  
სიხარულს შემატებს, იმედით აავსებს  
მამულის მიწაზე ვინც კრეფდა ნარ-ეკალს.  
დრო გარბის, ქვიშაზე ნაფეხურს დაამჩნევს,  
ყოფნის და არყოფნის ზარებიც დარეკავს  
და საუკუნენი, მკაცრნი და უხმონი  
უკლებლივ ყველას და ყველაფერს წაღეკავს.

## დროის სონატა

მზეც სადღაც გარბის,  
ზღვაც სადღაც ჩქარობს,  
მთვარესაც სადღაც მიეჩქარება,  
დრო დროობს უხმოდ,  
ცა რჩება ცადა.  
ზუზუნით ქრიან სველი ქარები.

# ჩემი ჰობი პოეზიაა

## ეთერ თათარაიძეს

„ფიქრზე ერთგულ არაფერ  
არ გაუჩენავ უფალსა“

### I

შენს ლექსებთან ვბაასობ, ჩუმად, ჩემთვის ვდუმვარ,  
მასპინძელიც კარგ მყავხარ, მიჟიკჟიკებ ბუხარს.  
აჰაი, მთის დედოფალს ჩამოფრენილს ბარად,  
სიტყვა ლექსად შეგკადრე, მეოცნებეს ვგავარ.

### II


გიყურებ, გულ მტკივ, ეთერო! „ქანცვა-ჯაჯანით მავალ“,  
შენს ლექსებს ნაზიარები ფიქრთ ჯარჯოკალის წავალ.  
რად გასაფრენად ემზადებ, ცის ბილიკებსა ზომავ,  
„შიშ-კანკალია ამიტანს“ შენი ლექსებიდ მთოვარს.

### III

„კოწიწ-კოწიწ-კოწიწით“ მომაქვს გული წლობით,  
ხან ცხელ-გულად ნათქვამი, ხან ალაზნებრ მდოვრი.  
არცა იმედს მოვიშლი, არც ვიზაფვრი წამით,  
„მომაქვს ჩემ წუთისოფელ“ და დიდგულ ავარ ამით.



სურამი



### რევაზ თუმანიშვილი

დაიბადა 1929 წლის 18 ივლისს, სოფელ ხცისში. 1948 წელს დაამთავრა საშუალო სკოლა და იმავე წელს ჩაირიცხა გორის პედაგოგიური ინსტიტუტის ქართული ენისა და ლიტერატურის ფაკულტეტზე, რომელიც 1952 წელს დაამთავრა. ამჟამად პენსიაზეა. ჰყავს შვილი მარი, სიმე ზაურ ჭანვოტაძე და შვილიშვილები. გამოცემული აქვს ლექსების სამი კრებული და ნაშრომი „ხცისის ძველი და ახალი ქრონიკები“.

### მადლობა უფალს!

მზის ტახტზე ვიჯექ, მთვარეს დავცქერდი,  
სხივმა გააპო ღამის წყვილიადაი,  
ვთქვი, თუ სამყარო რა ძალამ შექმნა  
ასე ლამაზი, ასე დიადაი?  
დამბლადაცემულ ღამის უკუნი  
სინათლემ შთანთქა, გახდა ხილული,  
სისასტიკეში მყოფმა დრომ ღამის  
დადლილობისგან თვალი მილულა.  
ვთქვი, ღირს იფიქრო სიცოცხლისათვის  
და სამყაროში გქონდეს ადგილი,  
მადლობა უფალს, რომ არც სიცოცხლე  
და არც სიკვდილი არის ადვილი.

### განდეგილო ძმაო...

ძალით დამორჩილებულ  
საოცნებო მხარევ,  
აფხაზეთო, შენი ხილვით  
ბევრჯერ გავიხარე!

## ჩემი ჰობი პოეზიაა

სულ სხვა იყო მაშინ, ძმაო  
შენი მზე და მთვარი!  
სულ სხვა ფერი გედო მაშინ,  
სულ სხვა სიო ქროდა,  
მეგობრობაც იცოდი და  
სიყვარულიც გქონდა!  
მერე სხვა გზა აირჩიე,  
შენც არ იცი, რატომ?  
ამ ვეშაპთან რას გახდები  
თვალაბმული მარტო!  
ახლა ცრემლით შემოგყურებ,  
ძმაო, განწირულო!  
ოკუპანტის ხელქვეითო  
მწირო და ბედკრულო!  
გამოფხიზლდი, იცან თავი,  
მოიბრუნე გული,  
არ დაკარგო საუკუნო  
ძმობის სიყვარული!

### ამაყი მთის შვილი

„ლილეოს“ მღეროდა და ლელოც გაჰქონდა,  
იყო ამაყი და მტრის შიში არ ჰქონდა,  
სტუმრად მიგიღებდა, კარს გაგიღებდა,  
მასპინძლის სინდისზე ხელს არ აიღებდა.  
ძმობას გიცხადებდა და ძმად მიგიღებდა,  
იმ ოჯახის დედა იყო შენი დედაც!  
თუ რამე გააჩნდა, არ ენანებოდა,  
სიძუნწე სტუმრისთვის არ ეზმანებოდა.  
კაცურად გამსახურობდა და ძმობას გაგიწევდა,  
თვალს არ დახუჭავდა და ტვირთს აგიწევდა,  
გაწეულ სიკეთეს არ დაგიკარგავდა,  
ის ადათ-წესებით არავის არ ჰგავდა,  
ნადირს შეებმოდა შენს გადასარჩენად,  
იყო ხერხიანი, უჭრიდა მარჯვენა,  
მთას დალაშქრავდა და არაფერს იტკენდა,  
დალლას და სიცივეს კაცურად ითმენდა.  
ბარში ჩამოსული წელგაშლილი ვიდოდა,

## ჩემი ჰობი პოეზიაა

აშოლტილ ვაჟკაცის ყურება გინდოდა,  
იყო განსაზღვრული ოჯახის წესები,  
ამ ხალხის ტრადიციას ღრმად ჰქონდა ფესვები.  
დროთა სვლამ ისინი ვერაფრით შეცვალა,  
მათ დავიწყებისთვის არავის ეცალა,  
დღემდე ასე დარჩა თავისი ბუნებით.  
და მას ვერ შეარყევ თავისი ცდუნებით.  
ომლერეთ „ლილეო“, გამრავლდით, იხარეთ,  
სამშობლოს მშვენებად ცოცხლობდეს ის მხარე!

### დედაო ენავ!

დედაო ენავ!  
შენ თვალთა ჩენავ!  
ჩემო წუხილო  
და აღმაფრენავ!  
დედაო ენავ!

მზეო ნათელო,  
შენი ხატის წინ  
ლოცვად დამდგარი  
ოცნებობს, იღვწის  
დღეს საქართველო!  
იღვწის, რომ შენი  
სახე და ღვაწლი  
მტერმა არასდროს  
ნახოს სნეული.  
რომ ერთად იყოს  
ქართველი მარად -  
დედის ხატი და  
შენი სხეული!  
დედაო ენავ!  
იმედო, რწმენავ  
ბედნიერი ხარ  
რომ შენთა შვილთა  
სულის სიღრმეში  
დაიდე ბინა



## ჩემი ჰობი პოეზიაა

და ვერვინ შეძლო  
ამოემირკვე მისი სულიდან,  
იქ ჩადულაბდი  
ქვათა და რკინად!  
და ასე მოხველ  
დღემდე, ნათელო,  
გფლობს და ვერ დაგთმობს  
შენ საქართველო!  
დედაო ენავ!  
სიცოცხლე შენი  
მომავლის მჩენი,  
ღმერთის კურთხევით  
არს განძი ჩვენი!  
დრო და დრო გყავდა  
მტერი მგმობელი,  
მაგრამ გიცავდა  
ერი მშობელი!  
ასე დაგიცავს  
აწ და მარადის.  
ვერაფრით დაგთმობს  
კუბოს კარამდის!  
შენი მზეობა  
ერის მხნეობა -  
არს ჩემი ქვეყნის  
განძი მარადი.  
უფალო ღმერთო,  
შენ ერთადერთო!  
ამ განძს ერისას  
მუხლმოყრითა გთხოვ,  
რომ შენი კალთით  
დაიფარავდე!

**მიხეილ თუმანიშვილი**



დაიბადა 1979 წლის 17 სექტემბერს  
ხაშურის რაიონის სოფელ ხცისში.  
მისი ლექსები და „ლექსები პროზად“  
იბეჭდება ჟურნალ-გაზეთებში.  
არის ლიტერატურულ-ფილოსოფიური  
გაზეთის „ათასწლეული მესამის“  
დამფუძნებელი. პოეტური სამეულის -  
„ტრიოლეტის“ წევრი, რომელიც 1999  
წლის 14 სექტემბერს შეიქმნა.

**ნიშნობის შემდეგ**

ცა მიატოვებს, ვით შეშლილ მკითხავს,  
ალვებს, დამდნარი თოვლივით გამხდარს,  
მე ამ მხარეში გეძებდი დიდხანს  
და ბაღში ჩემი წუხილი დამხვდა.

და სიზმარს, გლოვის დღესავით გაცრილს,  
მზემ ლაჟვარდები ჩაგიწნა ხუნდად,  
დამსგავსებული ამ წუხილს მკაცრად,  
ხელს ადნებოდი ვით თოვლის გუნდა.

შორს ჩემს სასახლეს ფარავდა ნისლი  
და ნისლოვანი სითეთრე მთვარის,  
გული დაჭრილი მსუბუქი ისრით  
და სული შენი სიშორით მთვრალი...

ეს იყო ღამე, რომელშიც იშვი,  
ეს იყო ღამის და სივრცის ფარდა,  
სადაც უნანკო შვილების შიშით  
არაფერია სიკვდილის გარდა!

## ჩემი ჰობი პოეზიაა

სადაც მტვრისფერი ღრუბელიც ქარობს,  
როცა ნიავი გადაშლის მთებად,  
სადაც პოეტი ოცნებით ხარობს  
და კაენური ღალატით კვდება!..

შეჩერდი, მაგრამ რას ეტყვი უფალს,  
შენს ოცნებათა სხივების მლესავს,  
სადაც სამყარო ელის დაღუპვას,  
სადაც ბავშვების გაისმის კვნესა!?

## ბელურა

რად არ გაფრინდი უცხო ქვეყნის მზიან მხარეში,  
რად მოწყენილა ანთებული შენთვის პირიმზე?  
ხომ არ გაშინებს ავდრიანი ქარის თარეში  
მარტო დარჩენილს შემოდგომის ბადის ბილიკზე?  
ყვითელ ტირიფებს დღის სინათლე ფერფლად აცვიათ,  
საღამოს ბინდი ტბის სივრცეში ჩაიძირება,  
თითქოს ცეცხლოვან მზის დისკოზე ხელი დაწვია.  
ხედავ, მერცხლები ცაში აღარ ტრიალებენ ვეება გუნდად?  
მათ ხომ დატოვეს მშობლიური არემარე დიდი ხნის წინათ,  
შენს გულში ცივი მშობლის ტრფობა რად არ გახუნდა?  
შენი თვალები სევდიანი ალერსით ბრწყინავს.  
ბადის უდაბნოს რად შემორჩი ჩემო ბელურა,  
ჩემი სარკმლის წინ რად დაფრინავ ყოველთვის კენტად?  
სიკვდილის განცდა ცივ მანტიად შემოგეხურა,  
მტანჯველი ზამთრის მარტოსულო, დიდება შენდა!..

2

დიდება შენდა, მგლოვიარე სამოთხის ჩიტო!  
სიკვდილის როკვა ყველგან ერთია.  
გსურს ცივი ფრთები ერთულებების ჯვარივით ზიდო  
და მზეს განუდგე შემოდგომის პერგამენტთანს.  
ნუ გეშინია! შენც მოგისწრებს ისევ ვარდობა  
ისევ ბეჯითად შეერკინები

თეთრი თოვლის მღელავ ფოლიანტს,  
მზის ფრინველები განა მართლა დანავარდობენ,  
მათ სირცხვილისგან თავი დაბლა დაუწევიათ,

## ჩემი ჰობი პოეზიაა

მათ უძლურ ფრთებზე ბრმა მათხოვრის მელანქოლია  
სიკვდილის აჩრდილს შავი ფანქრით დაუწერია.  
შენ მოდი ჩემთან!..

3

ის ფრინველნი სხვის კარზე დგანან  
და უნდობელნი ძველებურად კრავენ კამარებს,  
ან თეთრი მტრედი საცოდავი არ არის განა,  
თუ ველარ ნახავს შეყვარებულ იასამანებს?  
ყვითელ ფოთლების ხალიჩებში ფრენას სხვა რა სჯობს,  
როცა ღრუბლები ამოზიდავენ ოკეანის ტალღათა შხეფებს,  
ვერცხლის ფიფქები მოგიხვევია საკუთარი გულის დარაჯო,  
შენ ხარ პლანეტის გვირგვინოვან სამყაროს მეფე!  
ბრუნავს პლანეტა და შენ ხედავ

როგორ ეშვება ციდან ფარდები,  
რომ დააშოროს შენი მზერა სადამოს პალმებს,  
შენი უმანკო სიყვარული წარსულს ბარდება  
და ქარიშხლები გიშლიან კარვებს.

მოდი, ბელურა!... ჩემს უღონო მხარზე დადექი,  
მეც არ გეგონო მხრებჩვრიანი მეფისტოფელი,  
რადგან მიყურებ შენებრ შემკრთალს და ძილგატეხილს,  
რადგან მთვარის ქვეშ იდუმალი სევდით მოფენილს  
ხელში მიჭირავს მგლოვიარე ჭადრის ფოთლები.

4

„ ვარ მოფუჭული ჩუმი ტოტზე და ჩვენს მგალობლებს  
მე ვუწყალობებ სიზმრის ბაღნარს.

მიწავ, დამხედე!.. მზეო, დამინდე!...  
შენც სიყვარულს მგალობელი სევდით მწყალობდე  
და გადავიფრენ ჩემი სულის

თეთრ პირამიდებს.  
მზე როცა ზღვაში ჩაესვენება,  
როდესაც ხევებს შემოეხვევა ქარიშხალი  
ბროლის ხუნდებად,  
მაშინ სჭირდება ხეს მოფერება  
და სიყვარული სხვა სიცოცხლედ ჩემში ბრუნდება

## ჩემი ჰობი პოეზიაა

როცა ვერხვები გაიმარცვება,  
ზამთრის სიყვითლე უსამანო ნისლით ციმციმებს,  
როდესაც ველი დაიფერფლავს კალთებს მწუხარედ  
და ვარდ-ყვავილებს დააწვება თოვლის სიმძიმე,  
მაშინ ავანთებ ჩემს გულს  
ციურ ძალებით რომ შევამკო სამშობლო მკვდარი,  
მე მინდვრის წარსულ სურნელებით დავრჩები მთვრალი,  
რადგან აც მშვიდი მარტოობის დღეები მერგო.  
ვარ მოფუჭული ჩუმი ტოტზე და ჩვენს მგალობლებს  
მე ვუწყალობებ სიზმრის ბაღნარს.

მიწავ, დამხედე!.. მზეო, დამინდე!...  
შენც სიყვარულს მგალობელი სევდით მწყალობდე


და გადავიფრენ ჩემი სულის

თეთრ პირამიდებს..

5

სამყაროს განცდა ჩემში ისევ საშინელია,  
თავზე მეყრება თოვლის მანტია,  
თოვლში ვარდები ჩამოჰკნებიან  
და ვარსკვლავები თეთრ კუბოში ცეცხლად ანთია.  
ხედავ, მერცხლები აღარ ტრიალებენ ვეზა გუნდად?  
შენ არ დამტოვე არასდროს მარტო,  
სამოთხის ვარდო,  
სევდიან გულს ალერსი უნდა!..  
მე შემოგყურებ,  
არ ხარ ჩიტი, -  
ხარ თოვლის გუნდა!

## ჩემი ჰობი პოეზიაა



### ციური ინასარიძე

დაიბადა დაბა ასპინძაში. დაამთავრა პოლოტექნიკური ინსტიტუტი. ლექსებს წერს 10 წლის ასაკიდან.

ჰობი: ქარგვა, ქსოვა, მუსიკა. პედაგოგი. ცხოვრობს ხაშურში. ჰყავს მეუღლე და ორი შვილი. გამოსცა ერთი პოეტური კრებული “ოდეს ვინმეს დავეჭირვო“.

### ჩემო ქვეყანავ

აყვავდი ჩემო ქვეყანავ,  
კვლავ გაზაფხული გეწვია,  
მაგ ნაიარევ გულ-მკერდზე  
სულ ია-ვარდი გფენია,  
გიხდება ჭრელი პირ-ბადე  
და გშვენის დიბა-ატლასი.  
მინდვრად გაისმის გლეხკაცის  
სიმღერა ტკბილი, ხალასი.  
გვესმოდეს ველად გაშლილი,  
ყვავილთ საამო შრიალი,  
ობლად არ დარჩეს შვლის ნუკრი,  
ბარს არ მოადგეს მტირალი,  
ჯეჯილი არ დაისეტყვოს,  
ჩუმად დააჩნდეს ცვარ-ნამი,  
დაშაქრდეს ქარვა-გიშერი,  
ნიავეს გაჰქონდეს ნარ-ნარი.  
ჩემო ქვეყანავ განახლდი,  
ცრემლი შეიშრე, აყვავდი,  
ღრუბელი მოიშორე და  
ხვავით, ბარაქით ამადლდი.

## ჩემი ჰობი პოეზიაა

\* \* \*

არავინ იცის, ხვალ მოგველის რა,  
ანდა ერთმანეთს ვნახავთ თუ არა,  
კაცი -კაცს ხვდებო, მთა -მთას კი არა,  
სიკვდილიმა თუ არა ჩამოიარა.

როცა სიკვდილი მოდის უეცრად,  
ოცნება რჩება ნატვრის ამარა,  
მაშინ ოცნებას ფრთები აღარ აქვს,  
რომ მერცხალივით შეკრას კამარა.

## ნეტავ იმ მოკვდავს

პატარა ფრთებით ჩიტმა პატარამ  
ცხრა მთა და ცხრა ზღვა გადაიარა  
ცრემლი გვადინა ყველა იარამ,  
გულში ტკივილად რომ გაიარა.

დაცემა ჰქვია, დიდება - არა  
სული რომ კვდება, ხორცი კი არა,  
ვინც წაქცეულის ზურგზე იარა,  
უფალს განუდგა, ეშმაკს კი არა.

ნეტავ იმ მოკვდავს, ისე იარა,  
სიხარბეს სძლია, მადლით კია რა,  
ბეწვის ხიდიც კი გამოიარა,  
ღმერთს მიეახლა, დემონდს კი არა.



## ჩემი ჰობი პოეზიაა



### მარია კვინიკაძე

დაიბადა 1991 წლის 25 მარტს. სწავლობს ივანე ჯავახიშვილის სახელობის თბილისის სახელმწიფო უნივერსიტეტში. ბავშვობიდან წერს ლექსებს.

### ამ დიდ ქალაქში

გამიასმაგდა ახლა ფიქრი,  
ფიქრი, - თავნება.  
ფეხი აიდგეს, უნებურად  
თითქოს დარდებმა.  
ხეზე ფოთოლი ჯერ არ მოჩანს,  
მარტი დროს ითვლის,  
ჟამი, მზიანი სიყმაწვილის  
უთქმელად მიდის.  
ამ დიდ ქალაქში დავიკარგე,  
ვგრძნობ, რომ მარტო ვარ.  
დღეა და , თითქოს მწუხარებამ  
გამიმარტოვა!...  
თუმცა, იმედით გამოვყევი  
აქეთ დინებას,  
მაინც უსიტყვოდ გადამყლაპავს  
თუკი ინება...  
არ მეშინია, გარს მარტყია  
სულის სინათლე!  
სულს : შექმელი, ხილვად გახდი,  
მარად ინათე!



## ჩემი ჰობი პოეზიაა

მზეო, ბილიკად გამეფინე,  
როცა მარტო ვარ, -  
ამ დიდ ქალაქში  
სიყვარულმაც თუ მიმატოვა!...

### დრო

დრო სწრაფად მიიწევს,  
მსურს თვალის დახუჭვა,  
ახლა ფრაზებს დავწერ  
და ფურცელს დავკუჭავ.  
ზემოდან გვიყურებს  
სისუსტით ძლიერი,  
უპატიოსნობით  
დანაყრდა მშიერი...  
ახლა ბადის ნაცვლად  
ხავსი და კორძია,  
ხედავ? შემოდგომა  
სულ გაუკორტნიათ!  
დრო სწრაფად მიიწევს,  
მსურს თვალის დახუჭვა,  
ახლა ფრაზებს დავწერ  
და ფურცელს დავკუჭავ.

### იცი?...

იცი? ბავშვობის ნაფეხურებს  
დავეძებ დღესაც,  
რადგან შიშისგან  
დაფლეთილ სულს  
ისღა გაკემსავს...  
თეთრ გვირილებში  
გასრიალდნენ  
ბასრი ფიქრები  
და მიეხვივნენ იმ ხეს, სადაც  
ხშირად ვისხედით.  
გული შეტოვდა, ვერ ვიგრძენი,  
რაც უნდა მეგრძნო, -

## ჩემი ჰობი პოეზიაა

ის ხე, მეხისგან გახლეჩილი  
მიწაზე ეგდო!...  
ჩემი ბავშვობის ანაბეჭდებს  
დავეძებ დღეს აქ.  
მივხვდი, დამტოვეს  
სამუდამოდ...  
ვერ ვპოვებ ვერსად.



## ჩემი ჰობი პოეზიაა



### ერეკლე კორკოტაშვილი

დაიბადა თბილისში, 17 წლის. ჰყავს მშობლები და ძმა. სწავლობს ილია ჭავჭავაძის სახელობის უნივერსიტეტში, პირველ კურსზე.

ბავშვობიდან წერს ჩანახატებს, ლექსებს, მოთხრობებს და მინიატურებს, იტაცებს მუსიკა და დიდ პატივს სცემს ხელოვან ადამიანებს. თავისუფალ დროს ძირითადად მეგობრებთან ერთად ატარებს ან ჯერ კიდევ უცნობი მწერლების შემოქმედებას ეცნობა.

„ბრძნად მეტყველები ვერცხლი არს წმიდაი ხოლო დუმილი ოქროი რჩეული“  
ჯობს ამ ფრაზას დავეყრდნო, რადგან

ჯერჯერობით ჩემი ავტობიოგრაფია ბევრს არაფერს ამბობს, მაგრამ ყველაფერი წინაა - ამბობს ერეკლე.

### დაცემული ადამი

ჯერ მე ვიყავი, უცებ შენ გაჩნდი  
ჩემი ნეკნისგან ამ ქვეყანაზე,  
კანმა გუშინ აბელი მოკლა,  
ცოდვა გამეფდა...სისხლი დანაზე...  
გახსოვს?!დავეციტ ჩვენც ცოდვით ძველად,  
ვიმყოფებოდით ედემში, ველად,  
რომ შემოგვიძვრა ეშმაკი თავში  
და შთაგონებით გვაჭამა ვაშლი.  
ვინანეთ, მაგრამ უკვეა გვიან,  
სამოთხის კარი, არ არის ღია,  
რომ დავინახე შენი სხეული,  
ღმერთი განმშორდა, დავრჩი ეული.  
ორფეხა კაცი, გავხდი-ცხოველი,  
ღმერთის მეორედ ნახვას მოველი,  
დაე, დაწყევლოს გველი, სატანა,

## ჩემი ჰობი პოეზიაა

ჩვენი სიწმინდე - ქარს გაატანა.  
და ანათემით დასაჯა ღმერთმა,  
ყოველი საჭისმპყრობელმა, ერთმა,  
რომ მან იხოხოს მიწაზე მუცლით,  
ჩვენ კი უფალის ნახვას დავუცდით.

### გალაკტიონი

მთვარის კაბადონს გადავამრე  
ხალათი თეთრი,  
სწორედ იმ ღამეს მე ვიგრძენი  
ღალატი, კეთრი.  
სამების ზარებს დავუარე,  
დავრეკე მარდად,  
გალაკტიონი მეცხადება  
ზეცაზე ღანდად.  
თითქოს დამათრო იმ წარსულმა,  
მიბრუნის თავი,  
მე დღეს ჟამთასვლას მეგობრობის  
დავუდე ზავი.  
თითქოს დამემებს, თან დამყვება  
გიგანტი ღამე,  
თუ ამბობს სიტყვებს, ნუ აყოვნებ,  
მიტხარი რამე.  
მე ახლა გიმხელ გულისნადებს,  
ჩემს გულისტკივილს,  
რომ პანთეონში მარტო მდგარი  
დავიწყებ ყვირილს.  
მაწვება სევდა, დიდი ნატვრით  
სევდიან ტირილს,  
სულით ავადმყოფს ახლო მთვარე  
შვილივით მივლის.  
ბაქანზე ვდგავართ მე და  
დიდი გალაკტიონი,  
შორიდან მოჩანს ნარიყალა,  
მეტეხ-სიონი.  
რომ დავიბადე, მგონი მაცხეს

## ჩემი ჰობი პოეზიაა

წმინდა მირონი,  
მახსოვს იუდა, პეტრე, ლუკა,  
მათე, სიმონი.  
შუა წერტილი გავხდი მე  
დღეს ამ სამყაროსთვის,  
მსხვერპლი გავიღე უკვდავების  
ლამაზ წყაროსთვის.  
სამარადისოდ ჩემი ლექსი  
ვიცი დარჩება,  
ცაზე ვარსკვლავი, მოწყვეტილი,  
რომ გადარჩება.

## ილია მოკლეს

მგონი იკმარა ქართველმა ძილი,  
როსლა გვედირსოს ჩვენ გაღვიძება?!  
წმინდა ილიას დასწამეს ცილი,  
მისი ხსოვნა კი მარად იქნება.

ვაი, ქართველო, ვტირი სირცხვილით,  
ტყვია ესროლე შენ ერის მამას,  
გამარჯვებული მშვიდად იცინი  
და ნამდვილ სახეს ნიღაბში მალავ.  
ვერ ვიპოვნე მე ვერც ერთი მარჯვენითი ავაზაკი,  
ვინც ითხოვდა პატიებას - თვალში ცრემლით, გულში დარდით,  
სამშობლოზე შეყვარებულ კაცს დავემებ მბჟუტავ სანთლით,  
თუ ვიპოვნე არ გაგიმხელთ , მასაც ხომ სიკვდილით დასჯით ?!

## მარტოობა

მარტოობა, მარტოობა, მარტოობა ისევ მტანჯავს,  
უშენობით დაკარგული ყოველი დღე ძლიერ მქანცავს,  
მე ჭურჭლისთვის არ ვშობილვარ, არ არსებობს ჩემთვის მიწა,  
ღმერთთან იყოს ყველას სული, ვინც კი ხორცი ყორნებს მისცა.

უშენობა, უშენობა, უშენობით გული დელავს,  
ბატონი ხომ ბალახიდან უნაყოფოს გადასცელავს,

## ჩემი ჰობი პოეზიაა

ეპოქაა ბედისწერა, სწრაფი როგორც ქარიშხალი,  
მე კი ვწერ და ის მადარდებს, რომ ვიპოვნო ჩემი ქალი.

ჩემი ნატვრა, ჩემი ბგერა,  
ჩემი სულის ამობერვა,  
რაც კი ლექსი მიწერია,  
დღეს მისია ეს სულყველა.

რაც მიხატავს, რაც ვიმღერე,  
რაც კი რამე შემიქმნია,  
მე მას ვჩუქნი და არ ვიტყვი  
სანანებლად - რა მიქნია...

მარტოობის ასი წელი...  
მარტოობის ჟამი ბნელი..  
მეთერთმეტე ის მუშაკი...  
და სიკეთის საძირკველი...

## შემოდგომის მოგონება

იცი, ლამაზი ჩემი გაცნდები  
პლანეტებს ჭარბობს, ისე ბევრია,  
ბედისგან ნასროლ ტყვიას ავცდები  
მუდამ მახსოვს, რომ ჩემი მტერია.

მე შემოდგომის ზღვა მოგონება  
მაგიჟებს ძლიერ და თითქოს მათრობს,  
მახსენებს შენ თავს და ეს გონება  
დღეს შენზე ფიქრებს ინახავს, არ თმობს.

აწ გარდაცვლილი ჩემი წარსული  
მე ისევ მიხმობს, მაგრამ შორია,  
ჩემი ფიქრები კოსმოსს გასული-  
დაფრინავს, როგორც თეთრი თოლია .

## ჩემი ჰობი პოეზიაა

### მიყვარხარ

მინდა გითხრა რომ მაქვს გრძნობა,  
ია-ვარდით მოქარგული,  
ყრუ და ბრმაც კი ალბათ იგრძნობს-  
ვისაც გვაშში უდგას სული.  
ახლა გიმხელ მე ამ განცდას,

რომ მიყვარხარ სიგიჟემდე,  
ხელს მოგკიდებ ხელზე ნაზად და  
აგაფრენ ცის კიდემდე..  
როცა..შენც...შეგიყვარდები.....

### გზა

მზის ჩასვლას ვხედავ მე , შენს თვალებში,  
რომ მოგეფერო დამიშლი ნეტა?  
უკვე ყელამდე ვცურავ ვალებში,  
შენ ჩემი შვილის იქნები დედა.

მაგრამ შენ გინდა ამაზე მეტი,  
ისეთი რაც კი არ გაბადია,  
მარტის დილაა,ცივი,ცამეტი,  
თურმე ცოდვები არ გაპატია.

და ჩვენ ვიქნებით ქვეყნად მარადის,  
ვიდრე სიცოცხლე არ დასრულდება,  
მატარებელი გულზე დამადის,  
ვიღაცის წყევლა მგონი სრულდება

### პოსტ-ინდუსტრიული სიყვარული

სიყვარული - ორი ერთში,  
გრძნობა - დიდი, საზარელი,  
რწმენა ცამდე, მხოლოდ ღმერთში,  
ამ გრძნობების უხვი ველი.  
მე მიყვარხარ სხვანაირად,

## ჩემი ჰობი პოეზიაა

როგორც შოთას - თამარ მეფე,  
მინდა ვიყოთ ჩვენ სულ ერთად,  
შენ - პატარძალი, მე - ნეფე.  
გვეყვდეს ბევრი შვილი...ლადი..  
მეყვარები მე - უაზროდ,  
რომ დამედოს შენი დადი,  
გიყვარვარ და თანაც ბრაზობ.  
გიგალობ „ავე მარიას“  
დაგხატავ მუხის მოლბერტზე,  
ვიცეკვებთ ჩვენ გიჟ წვიმაში,  
სიცოცხლის ახალ ფურცელზე...  
არ გეწყინოს, რომ გწერ ამას,  
უკვე ბევრი მოვითმინე,  
არ ვაპირებ შენთან თამაშს,  
შენს გარდა არ მინდა ვინმე.

## სასიყვარულო ბარათები

სასიყვარულო ბარათებში ჩავდე ვარდები,  
უხვი გრძნობების დიდ მორევში გადავვარდები,  
სასოწარკვეთით მარტო მდგარი ზეცას გავეყვრი,  
ანგლოზებმა მოიმარჯვეს ცეცხლის საყვირი.  
დიდ ლაბირინთის ქვაკუთხედში გამომამწყვდიეს,

შენმა აზრება ეს ფიქრები მონად აქციეს,  
მაგრამ მე მოვკვდი, ჩემი სული საზვერეს გადის,  
ბნელ სასახლეში სქელი მატლი ჩემს ლეშზე დადის.  
კითხულობ ამ ლექსს და შენს გულში იღვიძებს სევდა,  
იმ სიცოცხლეში სიყვარული მუდამ თან მდევდა,  
და თუ გავიგე შეიყვარე შენ ჩემზე კარგი,  
სამოთხეშიც რომ ვიყო, მაინც მექნება დარდი.

## მე - კრავი

ვიცი უნდა გამიმეტო მოსაკლავად,  
სადღაც მთაში, ღმერთს შემწირო მე - საკლავად,  
ავირჩიე დიდი ზეცა - სამალავად,  
ვულკანიდან სიყვარული ხეთქავს ლავად.




## ჩემი ჰობი პოეზიაა

ვიცი, ვიცი, არ მპატიობ მე არაფერს,  
გთხოვ შემინდე, ვიდრე სადღაც შორს გამაფრენს,  
გეფიცები ჩემს თვალეზზე ცრემლს დანაფენს,  
ზამთრის ბოლოს გადავვლიჯავ თეთრ სარაფნებს.  
როგორც შენი, ჩემიც ფეთქავს გული,  
დამეხუთა უშენობით სული,  
ამას ქვია წრფელი სიყვარული,  
შინაგანად რომ ხარ დადაგული.  
მაპატიე, გაწყენინე ბევრი,  
და აივსო ამ გრძობების ქვევრი,  
თუ გავხდები მაღალ ზეცის წევრი,  
გთხოვ შემინდე, ნუ ხარ ჩემი მტერი...

## ჩვენ, ანუ როგორ შემიყვარდი

წითელი ფრანი ცაში ავუშვი,  
ქარვის წვეთები გულში ჩავუშვი,  
მე მამინ ყველა მიყვარდა, ყველა,  
რომ მომაკყარი ნანატრი მზერა.  
მე მახსოვს წვიმის მუქი წვეთები,  
და მოსაკლავად არ მემეტები,  
მზიდან გაჩერდნენ სხივის სვეტები,  
ქუჩაში სიძვის დიაცს ვედები.  
დავლიე, ბევრი დავლიე...მთვრალი...  
უკვე გამიჩნდა მესამე თვალი,  
მგონი მაქვს შენთან მე დიდი ვალი,  
ღმერთამდე კიდევ გზაა სავალი.  
ლექსებს ვწერ, არ მაქვს მე დრო და ჟამი,  
დავლიე ორი, ჭიქა, თუ სამი,  
ფიქროთ გამისკდა ეს ჩემი თავი,  
მივდივარ სადღაც, მიცურავს ნავი...  
გავიზარდე და თან მაინც ვერ ვარ,  
ახლაც კი ისევ მაგრად მაკლია,  
მთვარის კალთებზე მდუმარედ ვწევარ,  
გამომაფხიზლეთ ვინმემ, მაღლია !



### რევაზ კოშკაძე

დაიბადა 1949 წლის 28 მაისს დაბა სურამში. 1977 წელს დაამთავრა ივანე ჯავახიშვილის სახელობის თბილისის სახელმწიფო უნივერსიტეტის ისტორიის ფაკულტეტი, ხოლო 1988 წელს - თბილისის პატენტმცოდნეობისა და ეკონომიკის ინსტიტუტის ეკონომიკის ფაკულტეტი. ლექსების წერა მოგვიანებით დაიწყო.

### ჩემო დედიკო

ფიქრი წავა და წამოვა,  
ყველგან შენს ღიმილს ვხვდები,  
ნეტავი, კიდევ მაჩვენა  
ეგ შენი სახე, დედი.  
ჩემს სულში დაისადგურა  
მწუხარებამ და სევდამ  
და ახლა, მოგვიანებით,  
ბოდიშის მოხდას ვბედავ.  
რამდენჯერ გული გატკინე,  
ჩემო ძვირფასო დედავ,  
როგორმე მომიტევებდე,  
მაპატიებდე, ნეტავ...  
უკვე თორმეტი წელია, ეგ გული აღარ ფეთქავს,  
როგორ მაკლიხარ, იცოდე,  
რომ ველარ გხედავ ღმერთქალს.  
ვიხსენებ ბოლო შეხვედრებს,  
ავადმყოფურად ფერმკრთალს,

## ჩემი ჰობი პოეზიაა

ჩემს მოხუცებულ დედიკოს,  
სიკვდილის შიშით შემკრთალს.  
ფიქრი წავა და წამოვა  
და კვლავ გიხსენებ, დედავ,  
დღისით რომ შენთან ვსაუბრობ,  
ღამით სიზმრებში გხედავ.

## მენატრე ქალს

წარსულში, როცა იყო ჟინი, ხალისი,  
გიტარის გარდა ფუნჯიც მქონდა, რას არ ვხატავდი,  
მაგრამ როდესაც ტრაგედიად მექცა მაისი,  
მე გაღიმებულს, დიდხანს, დიდხანს, ველარ მნახავდით.  
წლები გარბიან, რაღაც რჩება, რაღაცა ქრება,  
დიდმა ტკივილმა მახსოვრობა მაინც დაღარა.  
ის ტრაგედია დღესაც ისევ დამყვება ყველგან,  
თუმცა ამდენი შემრევია თმაში ჭადარა.  
ამ სიბერის ჟამს, მყისიერად გაჩნდა სურვილი,  
ლექსები ვწერო, ვუჯდე მოლბერტს, ვხატო და ვხატო.  
მინდა მოვიკლა რაღაც ჟინი, რაღაც წყურვილი,  
მოზრმანდი ჩემთან ანგელოზო, ლამაზო ხატო.  
და ნუ შეგრცხვება, თუ , - ნატურიდან დავიწყებ ხატვას,  
შენს შიშველ სხეულს თუ თვალებით ვეამბორები,  
მე შედევრსა ვქმნი ამ ტილოზე, ვისრულებ ნატვრას,  
შევქმნი შედევრს და კმაყოფილი გავიზმორები.  
სიამოვნებას მომგვრის ჩემი შრომის შედეგი,  
ათმაგად კიდევ სიახლოვე შენთან ყოფნისა.  
და დავაპირებ, კიდევ შევქმნა ტილო შემდეგი,  
ბოლოს და ბოლოს გამოცხვება კვერი ობლისა.  
შენ კი მითხარი, რასა ფიქრობ, ან რა გაღელვებს,  
მე მოგწონვარ, თუ უფრო მეტად ჩემი ნაშრომი,  
გამოგიგონებ საფერებლად ათას სახელებს  
და სიყვარულიც გამოჩნდება ახლადნაშობი.

## ჩემი ჰობი პოეზიაა



### ფატი კურტანიძე

დაიბადა 1957წელს, 1982 წელს დაამთავრა ივანე ჯავახიშვილის სახელობის თბილისის სახელმწიფო უნივერსიტეტის ფილოლოგიური ფაკულტეტი. მუშაობს ხაშური ს პირველ საჯარო სკოლის ქართული ენისა და ლიტერატურის მასწავლებლად. ლექსებს წერს ბავშვობიდან.

### მამას...

შენ გცივა, გცივა, თოვლი გახურავს,  
ძვლებამდე გატანს ცივი ქარონი..  
ისე ჩქარობდი ყველაფრის ზრუნვას,  
თითქოს ზეცისკენ მიიხაროდი...  
ჩამოქოჩრილან ხეები თეთრად,  
გულს ჯავრი აწევთ სპეტაკ ტოტებზე...  
და მოწყენილან ჩიტები ობლად  
ისე, ვით სული ხორცსა ტოვებდეს.  
შენ გცივა, რადგან თოვლი გახურავს  
და აღარ გინდობს ცივი ქარონი..  
ისე უეცრად დაგვტოვე, მამა,  
თითქოს ზეცისკენ მიიხაროდი...

### ჩემი ღმერთის ანაბარა

აღარავინ აღარ შემხვდა,  
დარდის გზა რომ ჩამოვქეცი,  
ყველგან მკაცრი ქარი მცემდა,  
ბილიკს ჯავრით ამოვყევი.  
ვარსკვლავები ჩამქრალიყო,  
თეთრი მთებიც არსად ჩანდა,  
მაინც ურჩად მოვდიოდი  
ჩემი ღმერთის ანაბარა.

## ჩემი ჰობი პოეზიაა

### მგზავრი

წვიმა - გაუნელებელი,  
დარდი - დაუნელებელი,  
საწუთროს ტკბილ-მწარე გზაზე  
მგზავრი აუნელებელი.  
-სად მიმიყვან, ჩემო გზაო?  
-რავი, სადაც შენ ინებებ.  
-უფლის გზაზე დამაყენე!-  
აქ ვერაფერს ვერ ვიჩემებ.  
წვიმა - გაუნელებელი,  
დარდი - დაუნელებელი,  
საწუთროს ტკბილ-მწარე გზაზე  
მგზავრი აუნელებელი.

### იქნებ, თეთრი გვირილების დროა!...

დროა, მოვრჩე საწუთროზე ქვითინს,  
დროა, ფიქრი გავაყოლო ნიაგს,  
იქნებ, დროა გაზაფხულის მოსვლის,  
იქნებ, თეთრი გვირილების დროა!...  
მალე სურნელს შეიძენენ მთები,  
მალე თოვლი დაადნება კალთებს,  
ჩამირბენენ გარდასული წლები -

დამე ფიქრებს ჩემთან ერთად ათევს,  
შეიჭმუნხნა მწვერვალების შუბლი,  
ნაოჭები დააჩნდებათ თვალთან,  
შევეყარე გაზაფხულის სურვილს,  
როცა დავრჩი ჩემს საკუთარ თავთან.

### ნიჟარა

აღარ გჭირდება განცდა გრძნობების,  
ისედაც შიშველი ნერვი ხარ,  
რადგან  
დაგჯაბნა

## ჩემი ჰობი პოეზიაა

ყოველდღე იმის გაფიქრებამ,  
რომ დედამიწა  
შენი გულივით ნამცეცა  
ყოფილა -  
ნამცეცა აზრებით,  
ნამცეცა ფიქრებით,  
ნამცეცა გრძნობებით...  
რას იზამ, ვერსად იმალები,  
ლოკოკინასავით  
ნიჟარაში შემძვრალი  
შიშით ცახცახებ  
და გულისფანცქალით  
იმას ელოდები -  
როდის მოგაგნებენ...



იტრია



### მზია მაღალდამე

დაიბადა 1949 წლის 18 მაისს, ხაშურის რაიონის სოფელ ზემო ოსიაურში. დამთავრა ივანე ჯავახიშვილის სახელობის თბილისის სახელმწიფო უნივერსიტეტის ისტორიული და ფერწერის ფაკულტეტები. ბავშვობიდან წერს ლექსებს და ხატავს. პირველად დაიბეჭდა რაიონულ გაზეთში. 1978 წელს - ჟურნალებში „ცისკარი“ და „საქართველოს ქალი“. აგრეთვე, გორის ლიტერატურულ გაზეთ „შემოქმედში“. არის ისტორიის, ხატვის და ხელოვნების პედაგოგი.

\*\*\*

თიხის ქვებზე დავწერ ლექსებს,  
ქაღალდს დავიწყების სული ახლავს,  
მზუის მოფართქუნე ფრთებზე,  
სიტყვას ავიწყდება დაღლა.  
იქნებ კომპიუტერს ვანდო  
ლექსი მომავლისთვის თქმული,  
რადაც არ მგონია სანდო,  
სულ სხვაა თიხის სული.  
ცივილიზაციების ექო,  
დროის უნდობლობას ბაწრავს,  
მაგრამ კითხვის ნიშნებს გვაწვდის  
და გულს დაუნდობლად კაწრავს.  
უკან ლაბირინთის კვალით  
ვაწყდებით ირონიულ მზერას...  
და იდუმალი და მკაცრი  
გვიზიდავს ღვთიური ენა,  
თიხის ქვებზე დავწერ ლექსებს,  
ვედარ ვანდობ ქაღალდს ფიქრებს,  
მომავალში მზეს გავხედავ,

## ჩემი ჰობი პოეზიაა

აღარ მოგვკვდე ასე, იქნებ...  
ცრემლსაცა და სიხარულსაც,  
ალბათ სულ სხვა საზომებით  
ასწონიან, დასწონიან  
უცხო დროის აზროვნებით.  
გაოცების გაოცებით,  
უღმერთობით ჩვენი დროის  
კიდევ ერთხელ გადაშლიან,  
თიხის ფურცელს, სასოებით.  
თიხის ქვებზე დაწვერ ლექსებს,  
ქარი ფიქრებს ვედარ წაშლის,  
ხოლო ღრუბლებს ტკივილების  
ძველებურად ველზე გაშლილს  
ახალ დროის უცხო თვალის  
დასანახად მიმოფანტავს.

\*\*\*

თუ ჩამთვლი შენი  
ნეკნის ნაწილად,  
თუ მომერევა შენი სიცილი,  
შენს დღეთა რემას  
გავინაწილებ  
და მერე მზესთან  
ერთად ვიწვიმებ.

\*\*\*

ობობასავით ყველა თავის  
დასასრულს იქსოვს, როგორც დასაწყისს...  
სანამ საკუთარ ტკივილებში  
თავს ჩამოიხრჩობ,  
იქნებ, შენ ირგვლივ კიდევ ერთხელ მიმოიხედო,  
გაქცევას მუდამ მოახერხებ,  
რა გეჩქარება?...

\*\*\*

დრო გარბის ცივად  
დრო გარბის ცივად  
და მე რომ მკითხოთ,  
და მე რომ მკითხოთ,



## ჩემი ჰობი პოეზიაა

სული სულია და  
ცისფრად ბრწყინავს,  
ხორცი ხორცია...  
თავისას ითხოვს.

### იმერეთი

მაგონდება სიზმარივით  
მთები ნისლეbs ჩახვეულნი,  
ბილიკები, გზაწვრილები  
ახვეულ-გადახვეულნი.  
ჩანჩქერები თმაგაშლილნი,  
კლდენი კალთაჩახეულნი,  
ყვავილები მთვარეულნი,  
ტრფობის ალში გახვეულნი.  
საურმე გზა, გზაზე მგზავრი  
ხურჯინგადაკიდებული,  
ცაში სიოს მოტანილი  
მომახილი დიდებული,  
ზევით ტყე-ტყე მოწანწალე,  
მოზუტუტე ავი ქარი,  
ხევში წყაროს ლიკლიკი და  
კოკით მხარზე ტურფა ქალი.  
წყავის წვერზე ღრუბლის ფთილა,  
მთვარე სევდაგარეული,  
ვაზი ცრემლებშეუმშრალი,  
თმაქოჩორა ყანეული.  
მოჩურჩულე საკრალა,  
თხილნარებში გაბაწრული,  
ცერზე მდგარი ოდები და  
ეზოებში ღობეწნული,  
სიზმარივით მაგონდება  
მთები ნისლეbs ჩახვეულნი,  
ბილიკები ტყედმავალნი,  
ახვეულნი, ჩახვეულნი.

## ჩემი ჰობი პოეზიაა

\*\*\*

გზა გამიგრძელდა...  
სადღაც სულ ახლოს  
მეგულებოდი ნუგეშად ჩემდა,  
ყაყაჩოების ფერით ვთვრებოდი,  
მჯეროდა, ლოცვა გადამარჩენდა.  
რწმენის ტაძრებში ანთებულ სანთლებს

მეც შევუერთე ჩემი სანთლები,  
მთვარის ჩრდილებთან დაჩოქილ ლოდინს  
მუდამ შენს ლამაზ სახელს ვარქმევდი.  
გზა გამიგრძელდა...მოულოდნელად  
გამოჩნდა სევდის მწუხარე სახე,  
შენც იქვე ახლოს ყელმოღერებით  
იელვე, მაგრამ ვერ დამინახე.  
გზა გამიგრძელდა...  
სადღაც სულ ახლოს  
კვლავ მეგულები  
ნუგეშად ჩემდა...

\*\*\*

ამ ხუმრობა-ხუმრობაში  
გაივლიან წლები,  
ამ ხუმრობა-ხუმრობაში  
გავჰალარავდები,  
ამ ხუმრობა-ხუმრობაში  
გადამავიწყდები...  
მერე ქარი გამაცილებს  
თეთრი ბილიკებით...  
მერე სევდად დამირჩება  
გაფრენილი წლები,  
მერე წავალ, მოგშორდები,  
გადავიკარგები,  
მერე ველარ გაგიხსენებ  
მზეს შევუერთდები.



### გიორგი მეტრეველი

დაიბადა ხაშურის რაიონის სოფელ ოსიაურში. დაამთავრა გორის პედაგოგიური ინსტიტუტი.

პედაგოგი, სპორტსმენი, საზოგადო მოღვაწე, პოეტი.

გამოცემული აქვს 14 კრებული.

ჰყავს ორი შვილი და ერთი შვილიშვილი.

### ისევ გამობრწყინდება

უსუსურმა დროებამ სისხლი არივ-დარია,  
სისხლმწოველ მტერს ჰგონია საქართველო მკვდარია!  
მაგრამ, აგერ მოდიან მხრებგაშლილი ბიჭები,  
ფოთლებივით გაფანტეს დარდები და იჭვები!  
ვინ თქვა, თითქოს დაკნინდა ჩემი დედა-სამშობლო?  
მაშინ, როცა მარადი სიყვარულით აქ ვცხოვრობ!  
ნაქურდალით კი არა, ნაღვაწით ვარ გაზრდილი,  
დავდივარ და დამყვება სააკაძის აჩრდილი!  
თუ არ ეტრფი ბალღივით ბალახს ფეხით გათელილს,  
არ გწამს დედის მანდილი, მაშინ არ ხარ ქართველი!  
მარიამ-ღვთისმშობელის უნდა გედგას ნათელი  
და ბამავდე ილიას, თუ ხარ ნაღდი ქართველი!  
ვინ თქვა, არ გვაქვს სამშობლო? - ჩემთვის გასაკვირია!  
ყველა ნაღდი ქართველი დღეს ნამდვილი გმირია!  
როცა უჭირს ქვეყანას, მაშინ უნდა ივარგო,  
ცრემლისდენით, ვაებით არსად გადაიკარგო!  
მტერი შენი ყმობისთვის არსაკადრისს იკადრებს...  
დაჩაგრული ქვეყანა უფრო უნდა გიყვარდეს!  
მითხარ, - კაცი ისეთი რატომ უნდა დავინდოთ,  
ვინც ყვარყვარე არის და თავის ჭკუით, -დავითობს.

## ჩემი ჰობი პოეზიაა

მე არ მინდა ვიცხოვრო ვაი-ვიშით, გოდებით!  
მე თევდორეს სისხლი მაქვს და ამ სისხლით მოვკვდები.  
მოდით, ერთად ვიართო ჩვენი მტრების ჯინაზე...  
სიმართლე ვაღიაროთ ყველამ უფლის წინაშე!  
როცა ყველა სანთელი ერთ სანთლად აინთება,  
საქართველო დიდებით ისევ გამოზრწყინდება!  
ისევ აღორძინდება გენი მამა-პაპანის  
და ისევ გადირწევა რუსთაველის აკვანი!

## რა ხმები მესმის

რა ხმები მესმის, რა ხმები მესმის!...  
მოდის ყიჟინით, მოდის გუგუნით...  
ჰა, ხოხობივით აფრინდა ლექსი,  
სჭექს დასაწყისი ამ საუკუნის.  
თავისუფლება, თავისუფლება!  
ყველა ტამარში ზარივით რეკავს,  
ღმერთო, ახარე ქართველი ერი  
და ნულარ მისცემ შამბსა და ეკალს!  
რა ხმები მესმის, რა ხმები მესმის!  
აღარ ეტევა სხეული კანში...  
თავისუფლების გაღვივდა თესლი,  
ქართველნო, ერთურთს დავუდგეთ მხარში!  
ყური მიუგდეთ, გამოდით გარეთ  
და მოისმინეთ, რა ხმები მესმის...  
დამუხტულია მშობელი მხარე  
და ხოხობივით აფრინდა ლექსი.

## ლიტერატურულ შხამით

„გათენებამდე ვწუხვარ  
ლიტერატურულ შხამით!“

ყოველდღე ვეძებ რითმებს,  
კიდევ ვამაყოფ ამით.  
მერე აღვმართავ ფიქრებს  
„ლიტერატურულ შხამით!“  
გალაღებული გული

## ჩემი ჰობი პოეზიაა

ბევრჯარ დავატკებ კალმით  
და გავუჩინე წყლული  
„ლიტერატურულ შხამით!“  
როს ვეფიცხები ბუხარს,  
მფარავს სიზმრების შლამი...  
გათენებამდე ვწუხვარ  
„ლიტერატურულ შხამით!“  
მე გავათეთრე ღამე  
განა ორი და სამი,  
ცრემლით ვალბობდი წამებს  
„ლიტერატურულ შხამით!“  
ყოველდღე ველი სიკვდილს,  
ვდგავარ ქიჩოზე ხრამის  
და გადავრჩები ისევ  
„ლიტერატურულ შხამით!“  
ნელა მივყვები დაღმართს  
თვალსველი დილის ნამით...  
გულზე მატყვია დამლა  
„ლიტერატურულ შხამის!“  
მზით დასიცხული ხშირად  
დამფარა ჩრდილმა პალმის  
და დაწყნარება შვებელ  
„ლიტერატურულ შხამით!“  
არ მომეკაროთ ახლო  
არც დღისით, არცა ღამით  
თორემ დაგგესლავთ, ხალხო  
„ლიტერატურულ შხამით!“  
ვიცი, ბოლოს და ბოლოს  
გაფერმკრთალდება წამი  
და მე მოვკვდები მხოლოდ  
„ლიტერატურულ შხამით!“

## ნეტავი, კიდევ მანახა

ნეტავი, კიდევ მანახა  
სოფლის ჭაროში ცხენები.  
გაბრაზებული მეველე  
რო მოდის ხველებ-ხველებით...

## ჩემი ჰობი პოეზიაა

მამის დაღლილი მარჯვენა  
და დაკოჟრილი ხელები!  
შეჯიბრი ჭიდაობაში,  
იქ - ისინი, აქ- ჩვენები...  
ქალები - ჩითის კაბებში,  
ჩვენს სოფლის დამამშვენები!  
ამღერებული ჯჯეჯილი,  
ანწვანებული ველები!

ბიჭი დამტკბარი ფაშატის  
უუნაგრო ჭენებით  
ნეტავი, კიდევ მანახა  
სოფლის ჭაროში ცხენები.



ხცისი

## ჩემი ჰობი პოეზიაა



### ნინო მეყანწიშვილი

დაიბადა ქარელის რაიონის სოფ. ბრეძაში. წერს 13 წლის ასაკიდან. მისი შემოქმედების ძირითადი თემა სიყვარულია. ცხოვრობს ხაშურში. ჰყავს მეუღლე, ორი შვილი და ერთი შვილიშვილი

### შენი სიყვარული ისე ძლიერია

დედას

შენი სიყვარული ისე ძლიერია,  
ისე სათუთი და სათნო,  
ზის ყოჩივარდას კაბის ფურცლებზე  
და, თვით დედამიწას ათბობს.  
შენი სიყვარული თეთრი საყდარია,  
წმინდა და უფლის მადლით სავსე,  
შენი სიყვარული ჩვენი წამალია  
ზღვა სურვილებით გვავესებს.  
შენი თვალებიდან სითბო იღიმება,  
უსიტყვო სიყვარული დაგაქვს,  
შენი არსებობა დარდით იბინდება,  
როცა ჩვენ სევდიანს გვნახავს.  
შენი სიყვარული ისე ძლიერია,  
ყველა სიბოროტეს დაძლევს,  
შენს თმებს ჭადარების ბლუჯა ურევია,  
ცხოვრება ბებიას გარქმევს...  
გარეთ მარტიანი თოვა-ავდარია,  
მე შენთან სიყვარული მომაქვს,

## ჩემი ჰობი პოეზიაა

შენს გულს ჩვენი დიდი სითბო აბარია  
და ქარიც ამ სიყვარულს მოთქვამს....  
შენი სიყვარული ისე ძლიერია,  
ისე სათუთი და სათნო,  
ზის ყოჩივარდას კაბის ფურცლებზე  
და, თვით დედამიწას ათბობს.

\*\*\*

ცხელი შანთებით წამებას მოვრჩით,  
ახლა იარებს ვიშუშებთ, გჯერა?  
სული ამალდა, ძირს დარჩა ხორცი,  
გაყინულ თვალებს შეახმა მზერა...  
გადახსნილ ტერფებს წვეთი სდის სისხლის,  
ასე სისხლებად იტირა ცრემლმაც...  
შორიდან ეშმა მოკითხვას მითვლის,  
გზაგასაყართან მე ვხედავ ღმერთსაც...  
იქა ვარ, მაინც მიწიერს ვხედავ,  
აქეთ დარჩენილს მოვტირი ცოდვებს,  
ცრემლებით სველი, მუდარას ვხედავ,  
შემინდეს, ჩუმად, მოვეყვები ღამეს.  
მზად ვარ, წამებით დავშანთო სული,  
მზად ვარ, ცოდვების ვზიდო ტიარა,  
მე უშენობა მაშინებს იქით,  
სულის და ხორცის გაყრა კი არა!!!

\*\*\*

დამნაშავე ხარ,  
როცა ამბობ, რომ დაიღალე.  
როცა ხარ დედა  
და შვილების გემძიმა ტვირთი.  
უნდა შეგეძლოს  
ჩუმად, წყნარად ითმინო სევდა,  
საკუთარ მკერდთ  
შეაჩერო დარდების ზვირთი!  
დამნაშავე ხარ,  
როცა ღამეს სიჩუმით აკრთობ,  
როცა ლოდინით გაბეზრებულს  
გერევა ძილი.  
როცა საკუთარს არად არ თმობ,



## ჩემი ჰობი პოეზიაა

თავგანწირვაში  
როცა ხარ ფრთხილი.  
დამნაშავე ხარ,  
თუ დედობის გემშიმა ტვირთი.  
შენი ვალია , დაითმინო  
დარდების ზვირთი!

## ჩემს შვილებს

ნუ გაგაოცებთ სიმუხთლე კაცთა,  
ნურც პირფერობით აივსებთ უბეს,  
ცხოვრების წესი ღალატით გაცვდა  
მავანმა წყაროს არჩია წუმპე.  
ნუ გაგაკვირვებთ ქლესა ღიმილი.  
ბოროტი უზის უამრავს მრჩევლად.  
ყველას გერჩიოს გულის ტკივილი,  
რომ გაგიჩინა მეგობრის სევდამ.

\*\*\*

ჩემი დაკარგვა წამია,  
მერე პოვნაა მნელი,  
შენი ღალატი შხამია,  
სიკვდილი იცის ნელი.  
ერთგულებაში რა ყრია,  
სჯობს იყო ჭრელი გველი,  
ცოცხლად გულს მიწა მაყრია,  
მიწა, ჯერ კიდევ სველი.  
ცხოვრება დიდი ფარსია,  
ტრაგედიაა მთელი,  
ახლა კაპიკის ფასია  
ეგ გამოწვდილი ხელი.  
შენი ღალატი შხამია,  
სიკვდილი იცის ნელი,  
ჩემი დაკარგვა წამია,  
მერე პოვნაა მნელი!



### მურად მთვარელიძე

დაიბადა 1953 წლის 22 ივლისს, ქ. ხაშურში. პოეტი, პროზაიკოსი, ლიტერატურისმცოდნე, ფილოლოგიის მეცნიერებათა დოქტორი, განათლების მეცნიერებათა აკადემიის აკადემიკოსი. მისი ნაწარმოებები თარგმნილია ინგლისურ, ბერძნულ, უკრაინულ ენებზე. არის სომეხი მწერლის ედიშე ჩარენცის პრემიის ლაურეატი. 2011 წელს მონაწილეობდა იუნესკოს მწერალთა, მეცნიერთა და ხელოვნების მუშაკთა კლუბის მიერ გამართულ საერთაშორისო სიმპოზიუმში, საბერძნეთის ქალაქ ატალანტში.

\*\*\*

ცა ჰგავდა ქალწულს, ჯერ მიუკარებს,  
რომელსაც ახლა დაეტყო მკერდი,  
მე კი ზეციდან ვკრეფდი ვარსკვლავებს  
და შენს უძირი თვალეებში ვფენდი...  
მთვარეს, ო, მთვარეს, ამ გადარეულს,  
გულში ვიკრავდი სუნთქვის ალმურით  
და სიყვარულის სხივისფერ ფსალმუნს  
უდარაჯებდა შლეგი ამური.  
მინდოდა, რაღაც ისეთი მეთქვა,  
მაგრამ სანაცვლოდ შევრჩი ქარმხედრებს,  
მე შევაჩერე სამყაროს ფეთქვა  
და შენს ცხელ გულში ჩამოვახედე....  
სხვა რა შემეძლო? ქარს - ცად აფრენილს  
გავუბედავდი როგორმე ამბორს?!  
ღმერთო, მინდოდა, ეს ყველაფერი  
ცას სიბერის ჟამს შენთვის ეამბო...  
აწ, მეყვსეულად წლებმა იქუხეს  
და მეც ვბერდები გარდარეულად,  
თუმც სიყვარულის ბილიკ-ჭიუხი  
ამ გულში მაინც არ დალეულა.  
და ახლა როცა, მთვარეც აქვეა

## ჩემი ჰობი პოეზიაა

და თითქოს ქარსაც არვინ აკავებს,  
მკლავს ერთი კითხვა: ზეცის ბალიდან  
ვინ ჩამოგიკრებს ჩემებრ ვარსკვლავებს?!

### ხაშური

ოცნებათა შრაშუნით  
და დღეებით ბავშვურით,  
იმ შურით და ამ შურით,  
სულით, გულით-დახშულით  
მეფერება ხაშური....

ატეხილი ქარებით,  
მოკასკასე ქალებით,  
ტანკენარი ალვებით,  
პოეზიის ქნარებით  
მეფერება ხაშური....

სულის უდაბნოებით,  
მოშრეტილი რტოებით,  
დამუშტული ტორებით,  
ხშირად - ღვარძლის ტბორებით  
მეფერება ხაშური....  
სიყვარულის ვარდებით,

სიძულვილის ფარდებით,  
მახეების ბარდებით  
და ცრემლების დადენით  
მეფერება ხაშური....

სიზმრებით და ცხადებით,  
მტრობით -გულში ნადებით,  
ახდენილი ზღაპრებით  
და ჩამქრალი ლამპრებით  
მეფერება ხაშური....

მზის სხივების ნაჟურით  
და ეკლების ტყლაშუნით,

## ჩემი ჰობი პოეზიაა

ჭორებით - დაშაშრულით,  
თან - ცინიზმით - საშურით  
მეფერება ხაშური....

მეტყვი: - რად არ წახვედი,  
არ დამტოვე რატომო?  
- იმიტომ, რომ მიყვარხარ  
და ვით უნდა დაგტოვო?!  
იმიტომ, რომ შენს იქით  
სულიც, გულიც მარტოობს,

იმიტომ, რომ მწარე ხარ  
ჩემო დედავ-ბატონო...  
და თუმც მტრობაც ბევრია  
და ის შურიც კვლავ შურობს,  
მე ასეთიც მიყვარხარ,  
ხაშურო!

### უცხოეთიდან

მანდ ვიყავ, თავად ვტიროდი,  
წამოველ - გამომეტირე,  
წყენა არა მაქვს მცირედიც,  
ვარ ისევ შენი მესტვირე.  
მანდ ვიყავ, გულად მზე მენტო,  
აქ ჩემთვის ქარიც არ ქარობს,  
მანდედან ცას გავყურებდი,  
აქ ფეხქვეშ გდია სამყარო...  
ჩამოველ, კვლავ გავამაგრო  
შენი სიმშვიდის სვეტი რომ,  
ხელს ნულარა მკრავ, ოღონდაც,  
რომ აღარ გამომეტირო!

### წუხელ, სიზმარში, დედაჩემი ლოგინს მიგებდა

იქნებ, შენ მითხრა, ტიალო,  
დილავ, ყელ-გულ-მკერდ-შვლიანო,  
ჩვენი ლამაზი დედები

## ჩემი ჰობი პოეზიაა

დღეს ლოგინს ვისთვის შლიანო?  
ცრემლების ფარდებს თვალთაგან  
დღეს ვისთვის ჩამოშლიანო?!  
ლაწვს ვისთვის ჩაიკაწრავენ  
და გლოვას არ მოშლიანო?  
დედის გაშლილო ლოგინო,  
გნამავს ცრემლების წვიმაო,  
ნეტავ, მაგ ცრემლთა სურნელში  
უჩუმრად ჩამაწვინაო...  
განა არ იცით, რად მტანჯავთ  
დარდებო მაღალმთიანო,  
დედის დაგებულ ლოგინში  
ანგელოზები კრთიანო?!

## ნათლისმცემელთან, ხცისში

მთვარეს სხივებით უჭირავს  
ცა - ვარსკვლავების ხონჩა,  
იქ ერთი ციდა ვარსკვლავი  
ნათლისმცემელთან მოჩანს.  
და ვიდრე ქარი გადაშლის  
ღრუბელთა გრძნეულ ზოდჩას,  
ვიდრე ეს დამე დუხჭირი  
მთების წვეროებს ქოჩრავს,  
შევეყურებ ამ ცას უჩუმრად  
კვლავ მოკამკამეს ნორჩად,  
რომ ვინმემ არ ჩამჭურჩულოს  
ყურში უტიფრად: - მორჩა!  
წუთისოფელი ტიალი,  
რა ჩოჩიალით ჩოჩავს,  
ცაზე კი ციდა ვარსკვლავი  
ნათლისმცემელთან მოჩანს.

## მიპატიყება ვერანდაზე

როგორ გელოდა ჩემი ლოცვანი,  
გული, მთვარე და დამის ვერანდა,  
შენ კი არ მოხველ და ეს ოცნებაც  
უცებ დაჭკნა და გამივერანდა...

## ჩემი ჰობი პოეზიაა

ცაზე ვარსკვლავთა სევდა ეყარა,  
მე ჩემიც უხვად მქონდა ჭმუნვა და  
ფეხზე წამოდგა მთელი ქვეყანა,  
რადგან სიზმარი გამიმჭვირვალდა....

ფიქრს მთვარის სხივი მიესალბუნა,  
მაგრამ ვერ გათბა სული ვერადა,  
დამრჩა სიზმრების თავსაბურავი  
და ვარსკვლავებით სავსე ვერანდა...

### და ტიროდა აკაკი

„აკაკი ატირდა და თქვა, უამხანაგოდ ვკვდებიო“  
ნიცა წერეთლის მოგონებიდან

რამ აგატირა ცრემლებით უხვით,  
თავი რად იგრძენ უამხანაგოდ?!  
შენ - პოეზიის ფესვმაგარ მუხას  
თვით ზეცა უნდა მოგექარაგმოს!  
რამ შეაწუხა კაცი-პოეტი,  
რატომ ატირდა ღმერთი ზეციდან?  
რომელ ამხანაგს უნდა მოეძღვნა  
შენთვის ძვირფასი ის ფიც-ვერცხლი და  
ვის უნდა ეთქვა ერთი სიმართლე,  
თუ არ მზეს - მზრწყინავს ქვეყნის ზომონდად,  
სად გაგონილა, ანდა სად თქმულა  
ღმერთს ამხანაგად ვინმე ჰყოლოდა?!  
ცრემლად გადმოღვრილ ვარსკვლავთ აღმასებს  
იმერეთის ცა ჩუმად კვირვობდა  
და იქ - სხვიტორულ მიწის ბაქანზე  
კაცი კი არა, ღმერთი ტიროდა....

## ჩემი ჰობი პოეზიაა



### ლერი ნოზაძე

დაიბადა 1955 წლის 9 თებერვალს. 1972 წელს დაამთავრა ხაშურის მეორე საშუალო სკოლა, ხოლო 1978 წელს - ივანე ჯავახიშვილის სახელობის თბილისის სახელმწიფო უნივერსიტეტის მექანიკა-მათემატიკის და ხელოვნებათმცოდნეობის ფაკულტეტები. დიდი ხნის განმავლობაში მუშაობდა აგრარულ უნივერსიტეტში, დამოუკიდებელ უნივერსიტეტ „ეგრისში“,

ეკონომიკისა და სამართლის ქართულ-ბრიტანულ და სხვა უნივერსიტეტებში. 2011 წლიდან სამცხე-ჯავახეთის სახელმწიფო სასწავლო უნივერსიტეტისა და უნივერსიტეტ „გორგასალის“ ასოცირებული პროფესორია.

ჰყავს მეუღლე და მხოლოდ ორი შვილი. ათი პოეტური კრებულის და რამდენიმე ბიოგრაფიული ესსეს ავტორია.

### სამცხე-ჯავახეთის სახელმწიფო უნივერსიტეტს

გნებავთ, ნურც მკითხავთ ახლა ნურაფერს,  
რადგან შედეგებს ითვლიან გვიან.  
ვფიქრობ, აქ მარჯვედ მოსდევს ყუა ხელს, -  
ისე ჯანსაღად სუნთქვენ და ვვლიან...  
როგორ(ა)ც ამ ვრცელ სივრცეს შეჰფერის,  
მაღალი ჭერის აგუმბათებას;  
ხვალ, აღბათ, დაცულ ძეგლებს ვემთხვევი, -  
თამარის დროშის წილ რომ მმართვედა!  
არა და არა! თავს ვერ ვიკავებ  
არ ვთქვა, - ამ მხარეს როგორ სჭირდებით!  
როგორც ამდიდრებს სიტყვას - სიტყვავე...  
თურმე, დღითიდღე წინ ხართ, მკვიდრდებით!  
რაც შექმნით და ისახავთ მიზნად -  
ლამაზი სიტყვით ჰქვია - მისია!  
ვერ აღასრულებს ბევრი მას სიზმრად.  
თქვენ კი ხელთ გაქვთ და ქების ღირსია!  
მეტს ნულარ მკითხავთ ახლა ნურაფერს.  
მადლს თქვენსას დრო და ...ხალხი მოაფენს!

# ჩემი ჰობი პოეზიაა

## რეკვიემი -2

დედაშვილობა- ადამიანთა ურთიერთობის თავი და თავი

(გ. დოჩანაშვილი, „რაც მახსენდება“, გვ.379)

დედაშვილობა- უკეთესად რა გაქვთ ნათქვამი?  
ნუ გაამღავენებთ, - მის საწყენად ვინ რა იკადრა!  
როდის ილხინა დედამ თქვენით, როდის იავდრა!  
თქვით, - ვით იცდენდით მის კალთისქვეშ ათას განსაცდელს!  
რა არ იღონა, რა არ სცადა, რომ არ დამარცხდეთ!  
როგორ ზომავდა ყველა ნაბიჯს თქვენი წინსვლისას!  
არად აგდებდა ჯანს და ღონეს, ტკივილს სიმწრისას, -  
რომ დაგყოლოდათ შვილთ ცხოვრების შნო და ლაზათი,  
საღად ეაზრათ, რაც ახარეთ და რაც ლაღად თქვით;  
რომ შეგძლებოდათ ტვირთის ზიდვა უშეღავათოდ,  
რომ ძმის იმედად ჩირაღდანი დროზე აანთოთ!  
იყოთ სიცოცხლის შემოქმედი სულით-ხორცამდე!  
თან გდევდეთ ლოცვა, ღორძინებდეთ კვლავ დალოცვამდე!  
რომ იმრავლებდეთ მადლიერთა, სადაც კი წახვალთ,  
ზეიმი ერქვას თქვენს ყველა სვლას და ყველა ზრახვას!  
ცხოვრობდეთ რწმენით, რომ ღირსი ხართ და გწყალობთ ზედი,  
მუდამ გჯეროდეთ რომ მისით ხართ, შვილი ხართ დედის!  
ისიც გახსოვდეთ, რომ არ გეტყვიტ- „შემიბრალო“.  
ვერ გაიხსენებთ, რაც არა აქვს დანაბარები.  
მით უკეთესი, თუ დარწმუნდით, ძირი - მწარეობს.  
ეს დედითაა სამემკვიდროდ გა-ნა-ბა-რე-ბი.

\*\*\*

ფაქტებთან ერთად ვმართლდები და  
ამასთან ისე,  
ლამის წყენად ვთვლი  
გადაწყობებს „კარტის საჩემოდ“.  
ამბავს შევიტყობ და მეჩრება ზვირთებრი, მყისვე: - შემომახეხა - სად ხარ  
მარცხებს გადანაჩვევო!  
თითქოს წინასწარ მიმზადებდეს ვინმე ნიადაგს  
მუდამ მზად ვიყო მწვავე სიგნალს გავცე პასუხი.



## ჩემი ჰობი პოეზიაა

და უცაბედად ვდგები კართან, - სულ მთლად ღიასთან  
როგორც ხატის წინ მორჩილი და კრძალვით თავს ვუხრი.  
ვეჩოთირები შემოტევენს და გულის კარნახს  
აღსრულების ჟამს, - რაც ვისურვე და რაც ჩავუთქვი.

\*\*\*

როგორც ხელზე მოტორტმანე მიმინო  
ამაყი ვარ, ველოდები გამოცდას.  
ნაპრეწკალი კიაფდება მზერამში  
და ვიფერებ გასართობად „არ-მოცლას“.  
მკვრივი სახით დავაფეთებ მხილველებს, -  
და შემართულს ცისკენ შევკრავ კამარას,  
გული მიგრძნობს ისევე ვიპირველებ -

სუნთქვაც არ ღირს, ლიტონ სიტყვის ამარა.  
ღმერთმა ნუ ქნას, - უიმედოდ ჩავქინდრო  
თავი . - ჩამრჩეს შუა მდელოს ბიბინში.  
ახლა რა ვქნა, - ხმის გაღებაც მრცხვენია:  
ვინ - ცხადში კრეფს ტრფობის ნაყოფს, ვინ - ძილში.  
მერიდება დავიჭირო თვალწამი.  
გზას ავმცდარვარ, ბევრი გამომრჩენია.  
მსურს მკვიდრ საქმეს მივუბრუნდე ნაწნავით,  
გამოვფინო, - რაც ბუნებით - ჩემია!  
თითქოს ძალის, - მტაცებელი ნადირის,  
მოზღვავებამ ჩამითრია თამაშში.  
მთვარის შუქი მინავლულა უკვე და  
გვიანია, მაგრამ მაინც არ ვარ “ შინ.“  
მხოლოდ ერთი სატრფიალო სიტყვა და ...  
და .. წარმტაცი ქალის მზერას დავიჭერ,  
როგორც ხელზე მოტორტმანე მიმინო  
მოქნილი ვარ , რომ ჰაერში ავიჭრე.  
ვეჭიდები სასიკვდილო ილეეთებს  
უზოგავად: „აგეთებს „ და „ იგეთებს“.

## ჩემი ჰობი პოეზიაა

\*\*\*

მტაცებლური თვალელები ლივლივებენ ზღვასავით,  
დაფარული გრძნობები უნდათ გასცენ, გაანდონ.  
ნამგალა მთვარისებრმა მზერამ გრძნეულ ფარსმანის  
გამმაგებული პულსის ფეთქვა წამსვე დაადნო.  
ქუთუთოებდახრილმა საიდუმლო დამალა  
საკუთარი განცდების ყურთასმენად ქცეული,  
მიმობნეულ ყვავილთა სურნელების ამალამ  
ქაოტური ძალებით გაააფთრა სხეული.  
წამსვე იგრძნო, გონებას - როგორ ნელ-ნელ  
ჰკარგავდა.

თითქოს გმირი ამალდა და მეტოქე შეაქო!  
მთელი ტანით ცახ-ცახი აღარ ღირდა არად, და... ცხოველმყოფელ  
განცდაზე პასუხი- რამ, ვერ აგო.

## გრემლის მონატრება

...და, ამ საქმესაც მივხედოთ!  
სულაც არ არის მარტივი...  
თვალეებს თუ იმად მიხვევთ, რომ  
უდრტვინვლად გერგოთ პატივი...  
ვერ! ვერ მოგართმევთ შვილოსა!  
უფრო იოლად გიშიშვლებთ!  
თავს შარავანდი ვის-ცს ჰმოსავს,  
ის არად აგდებს შიმშილებს  
და, ...” მხოლოდ მად” სჭამს ლუკმასა,  
რომ ფიზიკურად შერჩეს გზას.  
ესწრაფვის ჟამს სანუკვარსა!  
სვლა დაულოცოს მერმე სხვას.  
ეს განცდა ისე ალაღებს, -  
მზერა აქვს მწველი, სასხვისო...  
ახლა მას ზენა განაგებს,  
კალამი შვებით სახნისობს.  
მიწის სურნელი მოაქვს ბჭვარს,  
ალმური ასდით სტრიქონებს,  
დედის აჩრდილი მოვა წამს!  
ნეტავ თუ... რას... მოიწონებს?

## ჩემი ჰობი პოეზიაა

ალბათ, შეავლებს თვალს მისად  
ისეც კანთიელ ნანახსა -  
ძველ ადგილზე რომ დგას ისევ  
ამბარს, მადლიან ჩანახს, და ...  
დადგება დალოცვის ჯერი:  
გულმა ახლა “უნ-გაუძლოს”!  
რაკი ამდენი იგრძენი,  
შეუძლებელ არს არ გიმძოს  
კაცმაც, სულდგმულმაც, ვენახმაც...  
გაგიბევრდება საგზალი.  
ფონს უამათოდ ვერ გახვალ!  
შესდექ. ადიდე ნამგზავრი!  
მიწის სურნელი მოაქვს ბწყარს,  
ალმური ასდით სტრიქონებს,  
დედის აჩრდილი მოვა წამს...  
ნეტავ თუ... რას... მოიწონებს?

\*\*\*

თითქოს უმაღვე ვერ მოვუველ თვალში ვერავის.  
რომ ასცდენოდნენ გართულებებს, - მსწრაფლ გამაშვილეს.  
მაგრამ, უნებურ მომესყიდა თითქოს მზვერავი -  
გზა მიმანიშნა „საფეხმავლო“ - ვიდრე წამშლიდნენ.  
ოო! მართალია ამ „ზანძ word -ზე“ კვლავ მეცინება,  
მაგრამ რა ვუყო? - აქ ზომამი ჰპოვა ადგილი.  
თუმცა, მე, ყოველ თავშესაფარს ვიჩნევ ბინებად -  
მაინც ხიზნობა არ გამოდის მუდამ ადვილი.  
-რაც შეეხება გაშვილებას, - კი მამშვიდებდა  
ცხოვრება ჩემი, - განფენილი ვიწრო კალოზე.  
უბრალოდ, - ბლინებს ვჯერდებოდი, - სხვა რომ ჩაროზებს  
მიირთმევდა და ... არ იწვევდა ჩემს გაწბილებას.  
უნდა განახვათ, როცა შინ ვარ, - როგორ ხარობენ!  
და თავი მოაქვთ, (არც ნაკლები) დროის გმირებად!  
(კრავად, ბატონო!)

და ვფიქობ, სწორი ავტოგრაფი ახლაც დავტოვე. არ ჩამეძიოთ,  
სად და რატომო!



### ნატო ღონიკიშვილი

დაიბადა 1971 წლის 24 ივნისს ხაშურში, დაამთავრა გორის სამუსიკო სასწავლებელი. მუშაობს ხაშურის დავით კაკიაშვილის სახელობის მეორე საჯარო სკოლაში მუსიკის მასწავლებლად. გამოცემული აქვს ლექსების ორი კრებული. ჰყავს 3 შვილი. ლექსებს წერს 12 წლის ასაკიდან.

### შვილებს

სამი სათნოებით ავმადლდი...  
სამი მიზეზით ვარ ამ ქვეყნად.  
მათი არსებობით გავლადდი,  
თუნდაც ჩამეთვალოს კვებნად.  
როგორც იდუმალი ორგია,  
ფიქრით შორს დაფრინავს ლაშა,  
ცეკვავს თვალხატულა გიორგი,  
წყვილი სანაშენო ვაჟი.  
ერთიც მოციმციმე ლამპარი,  
თაროს ანგელოზი ჩვენი,  
დედისნებიერა ბარბარე  
მღერის და სიმორცხვე შვენის.  
სამი სისუსტე მჭირს და მათი  
ძალა არაერთხელ მითქვამს...  
წმინდა კანდელები დავანთე,  
ღმერთო, ნუ ჩააქრობ დიდხანს.

## ჩემი ჰობი პოეზიაა

### ჩემო ქალაქო

მე შემეყვარდა ჩემი ხაშურის  
გრძელი ზამთარი, მოკლე ქუჩები.  
აწმყო უმეცარ წარსულს მაშორებს,  
ხსოვნას ვღალატობ და ვეურჩები.  
მე მენატრება ბოლო სიზმარი  
და ღამ-ღამობით ლექსთან ჭიდილი  
და როგორც შვება ყოველ ცისმარე  
სტრიქონი რითმით გამოჭედილი.  
ჩემი ქალაქის ბაცი რიჯრაჟი  
დღეს ასე ნაზად ჩემთვის ინთება...  
შემოვირიგე მუზა გიჟმაჟი  
აწ ვერასოდეს გამიფრინდება.  
და შენგან თაყვანს მონატრებული,  
ჩემო ქალაქო, ტრიუმფს გაირდები...  
მახელებს ჟინი აღმოდებული  
და შენი გრილი სიო მჭირდება!

### ლოგოსი

წვიმა შეგრძნებებს ასველებს...  
ფიქრი ცასავით მძიმდება...  
ლოგოსი ისევ მახელებს  
და მისით თრობა მინდება.  
საწყისი სათქმელს მიშინებს,  
სათქმელი სიტყვებს აწამებს,  
ვნება მტვერით შიშინებს,  
ვფლანგავ წამებს და რა წამებს.  
ნათქვამი ყველაფერია  
და არაფერი გამომდის,  
ზღვარზე ცხოვრება მნელია,  
ლექსი სულივით ამომდის.

### კვლავ მაყრუებენ შთაგონებანი

შორ და იდუმალ მიუვალ ცხრა მთას  
და შარშან ნანახ შავ-თეთრ ზმანებას  
განვიცდი, როგორც უთოვლო ზამთარს

## ჩემი ჰობი პოეზიაა

და უმიზეზო აღფრთოვანებას...  
ქვეცნობიერი უჩემოდ იბრძვის,  
მე კი ჩემსავე ტყავში ვლივლივებ...  
-ფიქრი მაოკებს ვით კბილი სიბრძნის  
და ვიდრე რვა მთას გადავივლიდე,  
გადაივლიან მძაფრი ვნებანი...  
ქარი ერთადერთ ფოთოლს აწვალებს..  
კვლავ მაყრუებენ შთაგონებანი,  
კვლავ შენი ლანდი წერას მაძალებს....

### მე-ფანდის პატრონი

ფერადი წიგნის უფერო არსით  
გამყდვენებულა შავ-თეთრი ყოფა...  
მაწვალებს ნამყო-მკაფიო ფარსი  
და საკითხავი „ყოფნა-არყოფნა“...  
დრო უკან რჩება ყველაზე მკაცრი  
და საბოლოო კვდება შიოლა...

დღეს სივრცეებში მიწვევს ზეკაცი...  
სულს სულიერი საზრდო შიოდა...  
ხანმა უნდობმა მაინც დამინდო,  
შემომპარა ტკბილი საგზალი.  
ბედმა ხელეზში ფანდი ჩამიგდო  
და ცხრა მთას იქით შენთან მაგზავნის.



სურამის ციხე

## ჩემი ჰობი პოეზიაა



### მარინა ღონღაძე

დაიბადა ხარაგაულის რაიონის სოფელ ნებომირში. დაამთავრა ა.ს. პუშკინის სახელობის პედაგოგიური ინსტიტუტი. ლექსებს წერს ბავშვობიდან. გამოცემული აქვს პოეტური კრებული „ფიქრი და ფიქრი“.

ხაშურის პირველი საბავშვო ბაღის დირექტორი. ჰყავს მეუღლე და ორი შვილი.

### თავისუფლება

თუ არ მექნება ჩემი თავის  
მართვის უფლება  
და სამართალიც ცივ ბორკილებს  
დამადებს ხელზე,  
მე მირჩევნია შევეწირო  
თავისუფლებას  
თუნდ ცოტნესავით ვაჟკაცურად  
დავიწვა მზეზე...  
ჩემში კოდია ჩადებული  
თავისუფლების,  
დამონებული, უუფლებო  
ვერ გავძლებ ქვეყნად,  
თვალით მინახავს ნაწამები  
სიმართლისათვის  
და ქვეყნისათვის თავგანწირვის  
კეთილი ნება...  
თუ არ მექნება ჩემი თავის  
მართვის უფლება  
მეც მათებრ მზად ვარ შევეწირო  
თავისუფლებას!...

## ჩემი ჰობი პოეზიაა

### ზაფხულში

მინდა გადავეშვა ზღვაში,  
მინდა შემოვხეხე პალმას,  
მინდა მთის მდინარეს ავყვე,  
ქვის ქვეშ შევეჭიდო კალმახს.

დავკრიფო ნიყვი,  
იქვე ნაკვერჩხალზე შევწვა,  
ფეხშველი ავუყვე ბილიკს,  
მთის ანკარა წყარო შევსვა.

ზაფხული მინდა ვიგრძნო,  
გალაზე ვაცვა მარწყვი,  
გვიმრის, ნემოს სუნი ვიცნო,  
ქუსლით ვსრისო ანწლი.

ჩემი ბავშვობა მინდა,  
სირბილი, სიცილი, ხტუნვა,  
ჩქარა არატომ გარბის დრო,  
არასდროს ბრნდება უკან?!

### ნუ გეშინია

ნუ გეშინია, ეს ცხოვრება სავსეა მადლით,  
ქვეყნად სიცოცხლე, სიყვარული, სიკეთე მეფობს,  
ნუ გეშინია, არასოდეს დარჩები მარტო  
განსაცდელისას დახმარებას უფალს თუ შეთხოვ.

ნუ გეშინია, ისეთ განცდას არ მოგცემს ღმერთი,  
რისი დამღევა, გადალახვა არ შეგძლია,  
სხვაში კი არა, შენს სხეულში ეძიე ძალა  
უძლურებიდან გამოხსნის და ... ნუ გეშინია!

### თუ გეყვარება

წმინდა მარიამს დავუჩოქებ,  
ცრემლებით შევთხოვ,  
ყველა წმინდანთან მუხლმოდრეკით  
ავანთებ სანთლებს,  
რომ სიყვარულით ქორწინება



## ჩემი ჰობი პოეზიაა

წილად შენც გერგოს,  
როგორც შენ გიყვარს  
იმასაც რომ ისე უყვარდე.  
ცხოვრების აზრი  
მანინც მხოლოდ სიყვარულშია,  
ბედნიერებაც მას მოაქვს და  
უბედურებაც,  
ყველაფერს შეძლებ, გადალახავ,  
თავსაც გაწირავ  
თუ გეყვარება, თავზე მეტად  
თუ გეყვარება.  
ამიტომ შევთხოვ ყოველ წმინდანს,  
ყველა სალოცავს,  
რომ სიყვარულში გამართლება  
გარგუნოს წილად,  
თუ გეყვარება, თავზე მეტად  
თუ გეყვარება,  
გაუძლებ ტანჯვას, ტკივილს,  
სეტყვას, თოვას და წვიმას.

### როდემდე...

რა პატარა ხარ, რა უძლური ჩემო ქვეყანავ!  
ერთ დროს ძლიერი, მუხლმაგარი, ფესვებგადგმული,  
რუსი ეზოში წყალს არ მასმევს, შვილებს მიტყვევებს,  
უფლებააყრილს, ცოცხლეულად მიკვდება გული.  
როდემდე უნდა ითარეშოს უსამართლობამ,  
როდემდე უნდა ისაკუთრონ ტამარნი ჩვენი,  
როდემდე უნდა ბოგინებდეს გაუტანლობის  
უზნეობის და უსულობის გამხრწნელი სენი?!

-როგორ მწყურია, მენატრება სამშობლო ძველი,  
დიდი დავითი, უძლეველი თამარი ბრძენი,  
ღმერთო! - შეგვინდევე უსჯულობა,  
ცოდვანი ჩვენი  
და დაგვიბრუნე საქართველო  
ძლიერი, მრთელი!...

## ჩემი ჰობი პოეზიაა



### ალიკო ღონღაძე

დაიბადა ქვიშხეთში 1953 წელს.  
დამთავრებული აქვს თბილისის სამხატვრო  
აკადემია. ლექსების წერა გვიან,  
ორმოცდახუთი წლის ასაკიდან დაიწყო.  
ამჟამად მუშაობს ქვიშხეთის კულტურის  
სახლის მენეჯერად. ჰყავს მეუღლე, ორი  
შვილი და ერთი შვილიშვილი.

\*\*\*

შენი ხსოვნა ახლა უფრო მტანჯავს,  
როს დამთოვა სუფსარქისმა თმებში,  
ახლა, როცა მივკუსკუსებ დაღმა,  
როცა ლამის გამითავდეს ლექსი.  
ახლა უფრო მენატრები, კარგო  
ლამის სიზმრებს როს სინაზე ახლავს,  
ახლა უფრო, ახლა უფრო გნატრობ,  
როცა გულში სიყვარული გაქრა.

### მთვარის ნარქენი

ბულულზე ვიწექ გულადმა,  
ჭოტი გულმკვდარი კიოდა,  
პირველ სიყვარულს ვტიროდი,  
მთვარის ნარქენი მტკიოდა.  
ცრიატ ვარსკვლავებს ვმწყემსავდი,  
ცა მადგა დიადოსანი,  
სამყარო ხელში მეჭირა,  
ვით აკვნის კრიალოსანი.

## ჩემი ჰობი პოეზიაა

### მხატვარი პოეტი

ვიშლები ვედრებად და ყოფის მინდორზე  
ატყვია სიცოცხლეს ნასროლი ნიშანი,  
მე ვიცი, სულ მალე იოლად მოგძვრებათ  
მაგ აფთრის სახეზე ეგ ნუკრის ნიღაბი.  
და სულის სიშიშვლე შეგაკრთობთ ბავშვივით,  
ნაჩვევი იყავით სხვის სახით ცხოვრებას,  
რას იზამთ, გვამები მიწაში ლპებიან,  
სული კი ღრუბლებთან ზეცაში ცხონდება.  
ზღვის ტალღებს ქვიშაზე გამოაქვთ ნანთხევი,  
ვერ გუოხს სიწმინდე ჭუჭყსა და ლიანგებს,  
მდუღარე ცრემლები ჩამოსდით პირფერად  
შვლის ხორცით გამამდარ ნილოსის ნიანგებს.  
შეშლილებს დორბლები გადმოსდით ქაფივით,  
გრიალებს, მაგდაგებს დაღლილი სამყარო,  
რამდენი ტკივილი, ცრემლი და ვედრება  
თოვლივით მოახშო მათ ალმა ბახმარომ.  
თქვენ შეკრთით, მაგრამ მე სუსხივით მკაცრი ვარ  
და ხედებით, ცხელ გულზე არავის არ ვინდობ.  
თებერვლის თოვლ ჭყაპი შლეგივით მაშფოთებს,  
-სადა ხარ, მიშვილე, ჯრიალა ამინდო,  
ვერ ვიტან სიშიშვლეს შუახნის დიაცის,  
ყველაფერს თავისი დრო აქვს და ადგილი,  
თქვენ ალბათ გგონიათ რომ კაცის ანთება  
არც ისე მნელია და არც ისე ადვილი.  
თქვენ ახლა მიცქერით ზიზღიან თვალებით,  
მე კი, თქვენ რას ფიქრობთ, სულ ფეხზე მკიდია,  
არ მოგწონთ? მიბრძანდით, არავინ არ გიჭერთ,  
სხვა ვინმე მოძებნეთ, ქვეყანა დიდია.  
სულ ცოტაც და მალე გავქრები თოვლივით,  
არა ვარ ტუტუცი, ყვავობა ვიწამო,  
მაგარი ფოლადიც ნაგდები დიდი ხნით, -  
უთქვამთ, რომ შეჭამა წლებმა და მიწამო.  
ღალატი და შური მძვინვარებს მიწაზე,  
არ შველის გულწრფელი ლოცვა და ნათელი,  
სიწმინდე, ზნეობა ობოლო ნერგია,  
ვერ გვინთებს სიბნელეს პატარა სანთელი.

## ჩემი ჰობი პოეზიაა

შორია შენამდე და გადის რაც ხანი,  
უფრორე ახლდება ის ძველი ტკივილი,  
ვის ესმის - ყრუ ძილით დაყრუვდა ქვეყანა,  
არავის აღელვებს ეგ შენი კივილი.  
მომშორდი, ვერ გიტან, მაშფოთებს ეგ სახე,  
თუმც ერთ დროს მათრობდა იმედი-მსახური,  
გამარცვულ თვალეზით თანდათან იშლება  
ღვთისმშობლის სავანე-კარედი ხახულის.  
აენტო ცისკარი ოცნების ვარსკვლავად,  
მეც ბუმბულს ვისწორებ გაფრენის მოსურნე,  
თუმც, ვიცი, ვთავხედობ, არა მაქვს იმედი,  
არ წყალობს უფალი მიწიდან მოსულებს.  
ჰა, ვრჩები მიწაზე, უეცრად ვიღვიძებ,  
სიზმარი ყოფილა ეს მიეთ-მოეთი,  
სულგრძელად შემინდეთ, თუ რამე შევცოდე,  
გულწრფელად ქედს გიხრით მხატვარი - პოეტი.

### სტუმარი

ვიყავ... მტანჯველი ფიქრები  
გადადი-გადმოდიოდა,  
ბუხართან თვლემდა ცინდალი,  
გარეთ ნამქერი კიოდა.  
უცებ მომესმა მახილი,  
მოვყვები უცხო ნაპირებს,  
კარი გამიღე, - ამ ღამეს  
შენთან გათევას ვაპირებ...  
ავდექი, მივლაგ-მოვლაგდი,  
თან მქონდა სტუმრის სირცხვილი,  
გავაღე... ჰაი, დედასა!  
კარებში იდგა სიკვდილი.

\*\*\*

მომავალი ეჭვის თვალით უმზერს წარსულს სისხლიანს,  
ახლაც მზარავს შემახილი: -ილია ვარ, ილა!!!  
შენ საიდან, საქართველოვ, ამოდენა შუღლი,  
არ გაწუხებს? წიწამურთან გახვრეტილი შუბლი?



### იამზე შავიძე

დაიბადა 1970წლის 11 აგვისტოს.  
დამთავრა ივანე ჯავახიშვილის  
სახელობის თბილისის სახელმწიფო  
უნივერსიტეტის ფილოლოგიის  
ფაკულტეტი. მუშაობს ილია ჭავჭავაძის  
სახელობის ხაშურის მესამე საჯარო  
სკოლაში ქართული ენისა და  
ლიტერატურის მასწავლებლად.

### უკეთესი

ლანდს ჰგავდა, ადამიანებში მოსიარულეს.  
სანთელივით მქრქალი და ცრიატი ჰქონდა სახე .  
ბავშვობისდროინდელი ნაიარევი მის უფერულობით გამორჩეულ გარეგნობას  
კიდევ უფრო თვალშისაცემს ხდიდა.  
დადიოდა უცნაურად, თითქოს გორაკებზე მიაბიჯებოს.  
არ უხდებოდა მისი სიარული თბილისის ქუჩებს.  
ჭამდა თევშთან ახლოს, თავჩარგული, ხარბად, თან უგრძნობლად.  
უცნაურად დაებინდებოდა ხოლმე თვალები.  
არ მიყვარდა ამ დროს მისი შეხედვა,  
არ ვიცი, რატომ.  
მისი ფერდაკარგული სახის შემხედვარეს გაგიკვირდებოდა,  
ისეთი სავსე ჰქონდა სხეული.  
იციოდა გულით.  
ხანდახან მიუწვდომელს მიწვდებოდა გონებით.  
გრძნობებში თავდავიწყებით გადაეშვებოდა.  
ზოგჯერ გულისრევის შეგრძნება დაგეუფლებოდა, ისე გაიტიტვლებდა სულს  
შენ წინაშე.  
ლანდს ჰგავდა, ადამიანებში მოსიარულეს.

## ჩემი ჰობი პოეზიაა

გული მიგრძნობდა, ჩემზე უკეთესი იყო.

ვერ კი ვხვდებოდი – რით.

თითქოს მე უფრო მიყურებდნენ ერთად ყოფნისას;

მასზე უკეთ დავმვრებოდი გონებისა და სულის კუნჭულებში;

კალამიც მე უფრო მომყვებოდა, ვიდრე მას;

სიტყვაც მიგნებული ვიცოდი.

არც გორაკები მეჩვენებოდა ფეხქვეშ სიარულისას.

სახეც არ მქონდა ცრიატი, უფრო თვალშიმოსახვედრი კავკასიური

სიმკვეთრით გამოვიჩრქოდი.

მაგრამ მაინც ვგრძნობდი, ჩემზე უკეთესი იყო.

არ მშურდა.

უბრალოდ ვერ ვხვდებოდი, რით.

პროვინციული უხერხულობით იწყებდა ურთიერთობებს.

გულისამრევი გულწრფელობით გადაგიშლიდა სულს.

შუადღისას უკვე ისე დაიღლებოდა,

ჭკუასუსტობის ელფერი გადაჰკრავდა დაბინდულ თვალებზე.

მე კი შუალამემდე მაზოხისტური სისასტიკით ვმუშაობდი. კვითხულობდი,

ვწერდი

უმალ დაემინებოდა.

მე კი კომმარები მტანჯავდა.

გაიღვიძებდა, ისეთი სიხარული ედგა თვალებში, უნებურად გული

დამიმძიმდებოდა ხოლმე.

მე კი გათენებაც არ მიხალისებდა ბებერ გამომეტყველებას.

ლანდს ჰგავდა, ადამიანებში მოსიარულეს.

დადიოდა უცნაურად, თითქოს გორაკებზე მიაბიჯებსო.

არ უხდებოდა მისი სიარული თბილისის ქუჩებს.

ხანდახან მიუწვდომელს მიწვდებოდა გონებით.

დადლილობისას ზოგჯერ ისე დაეზინდებოდა თვალები,

ჭკუასუსტობის ელფერი გადაჰკრავდა თითქოს.

ვგრძნობდი, ჩემზე უკეთესი იყო.

არ მშურდა.

.....

საოცრად მენატრება.

ცხრაწლის წინ გარდაიცვალა.

## ჩემი ჰობი პოეზიაა

არ უმტყუნია ალღოს ჩემთვის!  
მართლაც, უკეთესი ყოფილა ჩემზე!

### ახლობლები

მძაგს ბოვარის უმწიფარი, ბილწი ტრაგიზმი.  
ალბათ, ავტორსაც სძაგდა.  
ამიტომაც შექმნა შედეგრი.

.....  
ფიქრები მღრღნიან.  
უსაგნო სევდა მიჭამს გულს.  
უმისამართო, შეუცნობელი ეჭვი თუ უეჭვობა მამძიმებს.

.....  
ქალი და ბავშვი საოცრად ჰგვანან ერთმანეთს.  
ფარულად ვაკვირდები დედა-შვილს.  
სახის წყობასა და თავის ქალის ფორმაზე შეამჩნევ გენეტიკას.  
ბავშვი 2 წლამდე იქნება.  
დედის კაბის საკინძეს ჩაჰფრენია,  
ალბათ, კიდევ ძუძუს წოვს.  
დედა არ ეურჩება შვილს.

ქალის სიკვლევს პროვინციული იერი გადაჰკრავს,  
საგულდაგულო, მოწადინებული.  
დედა-შვილი საოცრად ჰგვანან ერთმანეთს.  
უსაგნო სევდა მღრღნის....  
ქალისა და ბავშვისკენ გამიბზის მზერა.  
ქალის თვალებში ნაჩვევი სიხარული ჩანს.  
კიდევ უფრო შემძაგდა ბოვარის უმწიფარი ტრაგიზმი.

.....  
ქალს ქმარი ჰყავს.  
მთელი დღის ნაშრომი გვიან ბრუბდება შინ.  
გაოფლილია.  
ენატრება ცოლი....  
ქალს ძუძუებიდან რძის სუნი ამოსდის.  
კაცს შვილი გაახსენა ამ სუნმა.  
ვნებიანი, მადლიერი და ნაზი ეალერსება ცოლს.  
ქალი კმაყოფილია.

## ჩემი ჰობი პოეზიაა

იგი „ბუნებითი ცოლია“.

ქმრის სუნი უყვარს.

მათ არ იციან თავიანთი მარტივი ყოფის მშვენიერება.

არც უსაგნო სევდა უჭამთ გულს.

არც ეჭვი თუ უეჭვობა უმღვრევთ ხასიათს.

არც მზერა აქვთ ეკლიანი.

მოსწონთ ყველაფერი, რასაც აკეთებენ.

თუმცა არ ფიქრობენ თავიანთი მარტივი ყოფის მშვენიერებაზე.

.....

გული გამითბა.

.....

მდაგს ბოვარის უმწიფარი, ბილწი ტრაგიზმი.

ალბათ, ავტორსაც სძაგდა.

ამიტომაც შექმნა შედეგრი!...





## ჩემი ჰობი პოეზიაა



### ხათუნა ჩიტაძე

დაიბადა ქ. ხაშურში 1977 წლის 17 იანვარს. წარჩინებით დაამთავრა ხაშურის რკინიგზის მეოთხე საშუალო სკოლა და თბილისის ინდუსტრიულ-პედაგოგიური ინსტიტუტი. მინიჭებული აქვს საქართველოს მხატვართა კავშირის ოსტატის წოდება (ნაქარგობა, ყასნალი,

ქსოვა). 1995 წლიდან მუშაობს მე-9 საჯარო სკოლაში ხელოვნების მასწავლებლად.

ჰქონდა რამდენიმე პერსონალური და შერეული გამოფენა ხაშურში, გორში, თბილისში.

ლექსებს წერს 5 წლის ასაკიდან. არის 2 კრებულის ავტორი. ჰყავს მეუღლე და ოთხი შვილი.

\*\*\*

მზე თმებზე მეხება

და მკითხავს:

- ჩამოქსოვ სადარდელს?

პასუხი მზადა მაქვს:

- თავს არ დამანებებთ,

სადამდე?...

უბრალოდ, ქსოვაში

ვიყენებ სადა ფერს,

რომელიც ძალზედ ჰგავს

სადაფებს!

... და ჩემთვის ვიტოვებ

სადარდელს!

\*\*\*

ვერსად ვერ გავყარე ეს სევდის აფრები!

ტალღები, - ფიქრები ეჭვის და ციების!

მითხარი, მითხარი თბილი და სამღერი,

ამ გულს საალერსოდ სულ აღარ მიელი?..

## ჩემი ჰობი პოეზიაა

მე შენით ვთენდები და შენით ვლამდები!  
ვნებდები ოცნებებს ფერადებს!  
ხომ იცი, ძვირფასო, მე თეთრი ტილო ვარ,  
სხვა ვერვინ მოხატავს და გააფერადებს!!!

### ყაყაჩო

ვიცი, ვიცი მე ყაყაჩოს  
ხვედრი, დარდი, ნაფიქრი.  
კი! სიყვარულს დაარქმევენ,  
მერე?.. - მერე დაფიქრდი!  
ისე უცბად მოცელავენ,  
ღიმილს არც კი აცლიან!  
უსათუთესს, წმინდა გრძნობას  
ერთ წაშში გააცლიან...  
პურის ყანას ეწირება  
სისხლისფერი სინაზე,  
დიდი დრო არ უწერია,  
როგორც წყლის წვეთს მინაზე!  
ეს „იყო და არა იყო“-ც  
სიმღერაა, არია...  
სულ მგონია, რომ ყაყაჩო  
მარტოსული ქალია.

### წვიმა ზამთარში

(ხალხურ კილოზე)

ზამთრის ბინდ-ბუნდში ტირის ცა,  
ვფიქრობდი, თოვლი მოვაო...  
სიმღერა მესმის მისი და  
წვეთებმა გამიყოლაო.  
მინდა მოვწვიტო ეს წელი!  
ტირიხარ, რატომ? - ო, ცაო,  
წვიმა რად მინდა, ვერ ვშველი  
ცრემლებს საკუთარს, როცაო!  
სიტყვა მომინდა მე შენი...

## ჩემი ჰობი პოეზიაა

ოცნებების ვარ მონაო,  
აზრი დამიფრთხა ურჯულო,  
თოვლიც გამიწყრა მგონაო!  
ზამთრის ბინდ-ბუნდში ტირის ცა  
ენძელა როდის მოვაო...

\*\*\*

ხელში ვიღებ მულინების  
გალიმებულ ძაფებს, ფერებს...  
სურათს ვხატავ : ყვავილებით  
შეზავებულ მწვანე ღერებს.  
მხიარული ტილო მოჩანს,  
ნახატს ქარგა აამღერებს!  
შეშურდება წრფელი გული  
ყვავილების მღვრიე ღელეს!  
ელიმება ჩემს დაქარგულ  
ნახატს ვერვინ გაახელებს!  
დაგიხატეთ ჭრელი ტილო!  
თქვენ ოღონდაც შეიფერეთ!

### მამულის საწუხარი

მარად მებრძოლი, შუბლს ჯავრი...  
თუმც, ველარ ვუწყვი, რა გვჭირს!  
მუდამ მაცვია აბჯარი,  
მაინც ვერ ვშველი ამ ჭირს!  
შენ უკვე არც არას ამჩნევ,  
მამულს იმედად რაც სურს!  
მე იალმაგი მაცვია,  
შიგნით გინახავ წარსულს...  
დიაცო, შენი ფარაგა  
ურცხვად გახსნილა ჩემ წინ!  
სულ დაგავიწყდა მამული,  
პაპას გულზე რომ ეწვის...  
შვილები, გასაშვილები,  
უცხო ქვეყნის კარს გიწევს!  
სადა ხარ, ჩემო ქართლის ძევ!  
თუ გულიც აღარ გიცემს!

## ჩემი ჰობი პოეზიაა

რატომ არ ფიქრობ, რომ ხვალ, ზეგ  
ნგრევად იქცევა ზხარი!  
იცოდე, გიხმობს მძლეუთამძლე,  
შენი მამულის ზარი!

### ქართლს

კი, მართალია,  
მე ვარ შენი ერთი ყვავილი...  
მაგ უზარმაზარ ზურმუხტ ველზე  
ამონახეთქი!  
მარად მცინარი,  
უამრავ ფერად ყვავილებს შორის!

და თუ დავჰკნები,  
ჩემი ქვეყნის ველზე დავჰკნები!  
რადგან ოცნებაც ჩემი ეს არის...  
რომ შევძლო შენთვის ყვავილობაც...  
და მიძინებაც...  
კი, მართალია,  
მე ვარ შენი ერთი ყვავილი...  
მაგ უზარმაზარ ოქროველზე  
ამონახეთქი!  
შენთვის მცინარი...





### ჟუჟუნა ცენგირაშვილი

დაიბადა 1949 წლის 1 იანვარს.  
ქარელის რაიონის სოფელ დირბში.  
ბავშვობიდან წერს ლექსებს.

გამოცემული აქვს ერთი პოეტური  
კრებული „უნაპირო სევდა“. ჰყავს მეუღლე,  
ორი შვილი, ორი შვილიშვილი და ერთი  
შვილთაშვილი

### ფრონის ხეობა

ფრონის ხეობა ხელთუქმნელი ხატია ვ  
ჭყუმალაობდა ფრონის წყალში ჩემი ბავშვობა,  
იქ, სერიანზე ეკალ-ბარდზე ნაჩხვლეტი თითი  
ფირუსულებს და ია-იებს ფერებს მატებდა.

გვირგვინად მდგარი ჩემი დირბის მკვებდა  
ჰაერი,

გადმოვყურებდი დვანს, ტახტისძირს, ბრეთს და  
დიდმუხას,

სალოლაშნიდან ავნევამდის დარბოდა თვალი,  
ჩემი ხეობის გულში ჩაკვრა ნამდვილად მსურდა!

ახლა გავყურებ თეთრად ნათხარ სანგარს თუ  
ყორეს,

ჩემს სამაჩაბლოს მტრებმა ზღუდედ რომ შემოავლეს,  
ორგულმა „ძმებმა“ დაგვინგრიეს სალოცავები  
და უწმინდესი საფლავები გადაგვითხარეს!

ნაცრად გვიქციეს რუდუნებით ნაშენი კვარა,  
ავგიყარეს და ლტოლვილებად გვიქციეს ხალხი,  
მტკივა ტკივილი ჩემი მიწის, ჩემი ხეობის,  
გულზე შავ ნისლად დამწოლია სამშობლოს ჯავრი!

## ჩემი ჰობი პოეზიაა

### ანდერძი გურამს

მზეს, მთვარეს და ვარსკვლავთა გუნდს  
შენ გაჩუქებ ყველას ერთად ,  
მაღლა ცაზე ჩამოგიბამ  
ცისარტყელას საქანელას.  
ფეხთ დაგიფენ მინდორ-ველებს  
ამოქარგულს ია-ვარდით,  
საქართველოს შენ გიტოვებ,  
გაუფრთხილდი, დაიცავი!  
მორაკრაკე ნაკადულებს,  
აქაფებულ წყალ-ჩანჩქერებს,  
სულყველაფერს შენ გიტოვებ,  
სულყველაფერს შენ გაჩუქებ!  
შენ გიტოვებ, ჩემო გურამ,  
ჩემი გულის, სულის ნაწილს,  
საქართველოს გაუფრთხილდი,  
მოუარე, დაიცავი!

### პატარა შვილთაშვილს - ნიას

მოზრმანდი და მზე ჩამიდე გულში,  
პაწაწინა ანგელოზო, ნია!  
ახლა ბებო კი არა ვარ მარტო,  
დიდი ბებო და დიდედა მქვია!...  
სიყვარული დამაფინე გულზე,  
ბედნიერი გამეზარდე, ნია!

### სევდა

გულსაბნევივით მკიდიხარ გულზე...  
ჩემო სევდავ და ჩემო ტკივილო,  
შენ - აფხაზეთო და სამაჩაბლო,  
რამდენჯერ უნდა გამოგიტირო?!  
თუ უნაპირო გამრიყავს სევდა  
და ამოხდება ამ გულს ჩივილი,  
ისევ შენა ხარ, ისევ შენა ხარ -  
დიდი დარდი და დიდი ტკივილი.

## ჩემი ჰობი პოეზიაა

მტკივა სამშობლო შემოდენმილი,  
გულში ხანძარი როდემდე მენტოს,  
გამიმთლიანე, გამიძლიერე,  
ჩემი სამშობლო, მაღალო ღმერთო!

### აპრილი

გაიბუტება ლორთქო აპრილი,  
რადგან გაყვები თავნება ქარებს,  
ვერ დავიოკებ გიჟურ სურვილებს,  
მივეახლები ხასხასა ყანებს.  
თმებში ჩავაწნავ ცისფერ დიდილოს,  
თავზე დავადგამ ყვავილთა გვირგვინს,  
ასე გიჟი და გადარეული  
ვერ დავიოკებ ამომსკდარ ქვითინს.  
ნუ დამიძახებ, -ლურჯო აპრილო,  
არა, მე შენთან არა ვარ ვალში,  
დედის მანტია თუ მომხურე,  
სამაგიეროდ დედა წამართვი.  
ისევ გაყვები თავნება ქარებს  
ცისა და მიწის გიჟი მაყარი,  
იქნება ვპოვო სულის საოხად  
თავშესაფარი, - მშვიდი საყდარი.

### ყაყაჩო

შავწამწამა, შავხალეა,  
ალისფერო ყაყაჩო!  
ამშვენებ და ეფერები  
ზურმუხტისფერ ყანასო,  
მაყრიონად გვირილაა,  
სოსანი და დიდილო,  
გიმღერიან მწყრის გუნდები  
„ქვიტკირ, ქვიტკირ, ქვიტკირო“  
დღით - მზე გადგამს  
ოქროს გვირგვინს,  
ღამეს - მთვარე გიქარგავს,  
ალიონი გეფერება,  
ცვარი გულმკერდს გინამავს.



### ფიქრია ჭულუხაძე

დაიბადა 1985 წლის 16 ოქტომბერს, ქ. ხაშურში. დაამთავრა ილია ჭავჭავაძის სახელმწიფო უნივერსიტეტის აღმოსავლეთმცოდნეობის ფაკულტეტი ქართული და ებრაული ენების სპეციალობით, შემდეგ ამავე უნივერსიტეტის მაგისტრატურა ანგლისტიკა-ამერიკანისტიკის სპეციალობით. ბავშვობიდან წერს ლექსებს.

### ნისლები

მიუწვდომები, მალღები,  
არ შემომყროდნენ მაინცა,  
ეტევებოდნენ ლაღები,  
ეურვებოდათ საითაც,  
უვნებო მქონდა ტანი მე,  
როგორც დაცლილი სავაზნე,  
წავყვივი, წავეტენინე,  
მათ უგზობას დავეგზნე.  
ღალატიანი ნისლები  
არა ყოფილან სანდონი,  
ნუთუ არ ვესაკლისები,  
რად წარმიკვეთეს სასონი?  
თვალნი ოცნებით მიცრემლეს,  
სული მიწეწეს რა მცირეს, -  
თვითონ შეერთვნენ სივრცეებს,  
მე, აქ, მიწაზე გამწირეს.




## ჩემი ჰობი პოეზიაა

### სამყურა

ემუქრებოდა სამყურას  
წყალი გაჭრილი ველად;  
წამალს ვუპოვი საწუხარს,  
მინც დაგიჩენ ჩემად!  
გვერდს დაქადნებით უვლიდა  
მრისხანე, ქმნილი ხელად  
სამყურამ სამი ყურიდან  
ერთიც არ შეიბერტყა.

\*\*\*

მთიდან წავიდა ნამცეცა თოვლი,  
უკანასკნელი გაჰყვა წინართ,  
კიდევ კარგი რომ წავიდა, თორემ  
სულ მარტო იყო დედამიწაზე.



## ჩემი ჰობი პოეზიაა



### მაცვალა ხაჩიძე

დაიბადა 1948 წლის 25 იანვარს. 1965 წელს დაამთავრა ხაშურის პირველი საშუალო სკოლა, 1982 წელს კი - ივანე ჯავახიშვილის სახელობის თბილისის სახელმწიფო უნივერსიტეტის ფილოლოგიის ფაკულტეტი, რომლის დამთავრების შემდეგ მუშაობდა ხაშურის მხარეთმცოდნეობის მუზეუმში ჯერ მეთვალყურედ, შემდეგ სამეცნიერო-საგანმანათლებლო განყოფილების უფროსად, მუშაობდა რაიონული გაზეთის რედაქციაში, ჯერ კორესპონდენტად, შემდეგ რედაქტორის მოადგილედ; სხვადასხვა დროს მუშაობდა პარტიის რაიკომში, გამგეობაში სხვადასხვა თანამდებობაზე. ენის სახელმწიფო

პალატის სამმართველოს უფროსად; ძეგლთა დაცვის განყოფილების უფროსად, ამჟამად მუშაობს მხარეთმცოდნეობის მუზეუმში დამთვალეიერებელზე ორიენტირებული პროგრამების მენეჯერად. ლექსებს წერს ბავშვობიდან.

### მარგინალიები

\*\*\*

თვალი მუდამ სინათლეს ეძებს,  
გონება - ჭემმარიტებას,  
გული - გულს, ხელები - სითბოს.

\*\*\*

მქონდა ჟამი სიყვარულისა,  
მერე დუმილისა,  
ახლა სინანულისა  
და არასოდეს სიძულვილისა.

## ჩემი ჰობი პოეზიაა

\*\*\*

შეჭირხლულია ჩემი სულის ყველა სარკმელი.  
ამაოდ მითვალთვალებთ.

\*\*\*

ვით სერაფიტა სარკოფაგში გამომწყვდეული,  
მეც ჩემს სხეულში ვარ უვადოდ გამოკეტილი.

\*\*\*

ვიღაცამ გულზე დამადგა ფეხი  
და დამისვარა ლურჯი ღიღილო,  
მას შენდევ დამაქვს სევდის საკანი  
შავი და ცივი, ვით მარმარილო.

\*\*\*

გულში დავიტეი სამყარო,  
მზით და სიყვარულით სავსე ვარ.

\*\*\*

ყველა ადამიანში არის მზე, თუმცა,  
ყველაში ერთნაირად როდი ანათებს.

\*\*\*

დაბადებიდან ყოფიერების ბოძზე მიმაბეს,  
ამაოდ ვლამობ ცაში აფრენას.

\*\*\*

დრო კრიალოსანივით მარცვლავს წუთებს  
და მოკლდება წუთისოფელი.

\*\*\*

დავხეტიალებ ჩემი ქვეყნის კიდით -კიდემდე და  
ვეძებ დიდი წინაპრების აჩრდილებსა და ნაფეხურებს.

\*\*\*

ფიქრი მუდამ თავხედია,  
არაფერს გეკითხება და არასოდეს გემორჩილება.

## ჩემი ჰობი პოეზიაა

\*\*\*

გუშინ ჩემს აივანზე ბუდე გაიკეთეს მერცხლებმა და  
მარტოობას ვედარ ვგრძნობ, ჩვენი ოჯახი შედგა.

\*\*\*

მკვახე სიტყვა ტყვიასავითაა, გულს ფლეთს.

\*\*\*

შენს ცხოვრებას შენ ვერ დაგეგმავ, მით უფრო სხვისას.

\*\*\*

დაბადებასა და გარდაცვალებას შორის გადებული ტირე - კაცის მთელი  
ცხოვრებაა.

\*\*\*

ბედნიერება წყლის ჭავლივითაა, მუჭაში ვერ მოიმწყვდევ.

\*\*\*

ძერა მუდამ საკბილოს ეძებს. ბულბული - ვარდის ბუჩქს.

\*\*\*

ეჭვნების წკარუნით ჩაიარეს ცხენებმა, დავინახე, ჩემი ახალგაზრდობა ეტლს  
მიჰყვებოდა.

\*\*\*

მე არ მიძებნია მეგობრები, ჩვენ გზაჯვარედინზე შევხვდით ერთმანეთს და  
ასე შევრჩით ბოლომდე.

ჩავბუდარავდი ჩემს უმზეო ფიქრის ხაროში, ნუ შემაწუხებთ!

\*\*\*

ახლა დავრწმუნდი, ამაოა თურმე ყოველი, თუ სიყვარულით არ იღვიძებ  
ყოველ ცისმარე.

\*\*\*

მარტოსული კი ვარ, მაგრამ ნუ შემიბრალებთ, ცოდო ვარ  
სიბრალულისათვის.

## ჩემი ჰობი პოეზიაა

\*\*\*

ჩემი სამყარო - სევდის საკანი მუდამ თან დამაქვს კუს ზაკანივით.

\*\*\*

ჩემი ცრემლის და სისხლის ნაჟური საღბუნად დააფინეთ მამულის წყლულებს.

\*\*\*

მე -ეს ჩემი სულია,  
სხეული - ჩემი ნაცრისფერი მოსასხამი.





**მანანა ხრიკაძე**

დაიბადა 1951 წელს ბორჯომის რაიონში,  
1968 წელს დაამთავრა ხაშურის რკინიგზის  
სკოლა,

1970 წელს - თბილისის საფინანსო  
ტექნიკუმი.

1978 წელს - ივანე ჯავახიშვილის სახელობის  
თბილისის სახელმწიფო უნივერსიტეტის

ეკონომიკური ფაკულტეტი.  
მუშაობდა სხვადასხვა ორგანიზაციებში ეკონომისტად.

**რეკვიემი სიყვარულს**

ზეცა ბინდ-ბუნდში ჩამოჰგავს გლოვას,  
სულთქმა რიალებს ცრემლების ღვრაში.  
და რეკვიემის მძიმე აკორდი,  
ობოლ ბავშვივით ცახცახებს ქარში.  
მოდიან მოაქვთ უნდო ხელებით  
მქისე სინდისით, მჭლე გვირგვინები,  
მძუნაობს მათი იაფი მზერა  
და მათი უჭვთო ჩანადიმები.  
არავინ ნანობს ფიწრიან სულში  
ცხრაკლიტულები როგორ მიტეხეს  
მერე სინაზეც, შურის ზვარაკი,  
შეუბრალებლად გადამიჩეხეს.  
და ბორჯნული მდუმარედ ვუმზერ,  
სიავით ნაჩხ მარტვილ ნაწილებს  
და მიუსაფარს კუბოს კარამდე  
ქურუხიანი მწუხრი მაცილებს.  
თოვდა და თოვდა, სულის ნაფლეთი,  
მიწას ჩავფალი, ვით თოთო ბავშვი  
და რეკვიემის ბოლო აკორდი,  
დაობლებული შემომრჩა ქარში.

## ჩემი ჰობი პოეზიაა

\*\*\*

ასეა ბედის მუხთალი ხმოზა,  
დიდებას ბოჭავს არდაცალეზა.  
ნეტავ, რა არის უმეტეს ტკზობა -  
დაზადეზა თუ გარდაცვალეზა?  
მანამ კი ვერცხლის თვალხარბი მონა,  
უფლის სავანე, ცათა მუქეზა,  
გზად მოზიმზიმე უმადურთ კონა  
თუ კვირინელის შემსუბუქეზა.  
და შემოქმედის იდუმალ ზრახვას  
რას მიუხვდეზა მცირე ან დიდი,  
როცა შაბათის ურიათ მარხვას  
გადაცრეცს უფლის შარავანდედი.  
და მცირდეზოდა მარტვილის ადლი  
და მამა-ღმერთსაც ასე ენეზა,  
ჯვარს მიუძლოდა იესოს მადლი  
და ჯვარცმის წილი ბედნიერეზა.

## გვიანი ელეგია

მთვარის ნამიან და ბეც კივილზე  
მკერდს იკაწრავენ მიდამოები  
და ზესთა ლტოლვას მზერას უკენკავს  
ჟამი საცნობი ამაოების.  
და მე მგონია, ჩემი არსეზა  
ღვთის ნებით კი არ დაზადეზულა,  
რომ შეუცნობელ სამყაროს სული  
აქ უნებურად დავანეზულა.  
და მკრთალეული კვალს ვეცეცები,  
სადაც პირქუში სუფევს წყვედიადი,  
უღრანი ყოფის აზდაუზბდაში  
გზააზნეული ავბოდიადლი.  
და ვით ბზარიან მრუდე სარკვეში  
ანარეკლეზი ტრიალდეზიან,  
მადლის ლანდეზი, წაღმა ნაკვეთი,  
ცხადში პირუკუ ფორმის ხდეზიან, -  
ვგრძნობ, გაოგნეზულს, როგორ და რითი

## ჩემი ჰობი პოეზიაა

ავად მევსება ხელისგულები  
და შეუცნობელ სამყაროს მკვიდრნი  
ნიშნისმოგებით თრთიან სულები.  
და მეჩვენება ცით მოკვეთილი,  
მიწის ლაბირინთს როცა ვშორდები,  
თვითრბული და ნაალაფარი,  
გრძნეულთ სამყაროს ვემშვიდობები.

### ჩემს ზოდიაქოს - „მშვილდოსანს“

მობურულ ცაზე ქადილით ელავს  
ზესთაზის ფიცით დანაბარები.  
და ნაქარიშხლარ ახოვან მხრებზე  
აბჯრებს ირგებენ ცხენფაფარები.  
და მოკუმტებულ კაბადონებზე  
ფლოქვთა გრიალი ქუხს დაუნჯებით,  
ფარულ განზრახვას დახარბებული

ფრთებს გამართავენ ისართ ბლუჯები.  
და მოთქარუნე კენტავრთა რემა  
ღრუბელს გაჰკვეთავს, როგორც ბრმა ტყვია  
და მშვილდოსანთა ნაიარევი,  
ნაომარ ზეცას ელდად ატყვია.

\*\*\*

იმ მიზეზიან დლიდან  
რა ბედად გამებუტე,  
შეხედე, ცვივა ციდან  
ტყემლების სისათუთე.  
მზემ სხივით ამოჭყიტა  
ცისარტყელების ბუდე,  
რამ ჩააშვავოს, ნეტავ,  
ეს მარტობის ზღუდე.  
კვლავ მოთმინებით ვიტან  
შენს ბავშვურ სიჯიუტეს,  
მე მაინც: - „ჭიტა -ჭიტა“,  
შენ? ისევ - „ბუტე-ბუტე“.



## ჩემი ჰობი პოეზიას



### ლალი ჯაფარაშვილი

დაიბადა ხაშურში. დაამთავრა ხაშურის პირველი საშუალო სკოლა, შემდეგ საქართველოს პოლიტექნიკური ინსტიტუტი. გამოცემული აქვს სამი ლირიკული და ოთხი საბავშვო ლექსების კრებული. მიღებული აქვს მაცვალა მრევლიშვილის და შიო მღვიმელის პრემიები. დაჯილდოვებულია ქრისტიანული პოეზიის დიპლომით. მუშაობს მოსწავლე-ახალგაზრდობის რესპუბლიკურ სასახლეში

შემოქმედებითი სტუდიის პედაგოგად. არის მწერალთა კავშირის წევრი.

### ზღაპარ იყო

(გუთნისდედას)

შენთან ერთად უნდა მეხნა, პური უნდა მომეყვანა,  
დიდგალვაში დამეტირა ჩაწოლილი მწიფე ყანა.  
მკათათვეში, თაკარაზე, გამეფინა ოქროკალო,  
შენთან ერთად მედილინა „ჰოპუნა“ და „არხალალო“.  
მარილიან ხელისგულზე მეგრძნო ხარის ენის ხაო,  
ნასეტყვ ზვარში მეღრიალა, - ზეცამ რისთვის შემრისხაო!  
შავმიწისთვის უცნაურად შემედიმა ნაგვემ-მასვრალს,  
მზეს დაეწვა ჩემთვის კანი, ხომრაკს უნდა დამეაშრა.  
ხელისგულით მომესინჯა დაკოჭრილი შენი ხელი,  
და უბრალოდ კი არ მეთქვა სიტყვა მოსაფერებელი, -  
კვირამალზე მექადაგა, შემეყარა ერი, ბერი,  
ვით წმინდანის, - შენს სახელზე, ჩამომექნა ცხრა სანთელი.  
ცხრავე ერთად, შენს მარანში, წმინდა ალით დამწვარიყო,  
სიტყვა შენი, საქმე შენი, ზღაპარ იყო, ზღაპარ იყო.

## ჩემი ჰობი პოეზიაა

\*\*\*

გაჭყარტულ ბუხარს ჩამოჰყვა ოხვრა!-  
ეს, შემოდგომის შრიალი ისმის...  
ტყეში, ფოთლების ხატულა ნოხმა,  
ხვედროვანი გადიკრა ნისლი.  
ღრუბელმა შთანთქა კაციც და მზეცა,  
ბუნებამ ველარ გაუძლო ამდენს  
და შემოდგომის მწუხარე ზეცამ  
პირი მოუხსნა დაგროვილ დარდებს!

### ამაოების შეცნობის მერე

რა გამჭვირვალე გახდა ყოველი,  
თითქოს რენტგენის თვალი ჩამიდგეს,  
სიმშვიდის მიღმა ღელვას მოველი,  
მეხთატეხაში - მზიან ამინდებს.

იმედი ისევ გულივით ფეთქავს,  
რომ დავივიწყო მიწის ტორტმანი  
და მრუმე ნისლებს, წვეთებთან ერთად,  
ზეცაში მიაქვთ კაცთა ცოდვანი...

დროჟამის უფსკრულს ვაფარებ ზღაპარს, -  
სიბრძნე-სიცრუით დაცვარულ ფერებს,  
შავ-თეთრი ხდება სიცოცხლე, რადგან,  
ამაოების შეცნობის მერე!

### ბროწეულის ყვავილობა

თიბათვის დამდგეს, მაისის ბოლოს,  
ბროწეული რომ ამოანათებს,  
დაეწინწკლება მარწყვი და ჟოლო  
მზეზე გაწოლილ მწვანე წარაფებს  
და სულის სარკმლის იალკიალი  
ჰგავს მირონცხებით ღმერთთან ერთობას,  
როცა შეიცნობ ამ მთის, ამ ბარის  
და დედაენის ერთადერთობას! -  
გათანგულს ქართულ სიტყვის ზარბოშში,

## ჩემი ჰობი პოეზიაა

გამოგაფხიზლებს გაზრდილი ფიქრი,  
რომ დედამიწა, ამ სამყაროში,  
უნათესავო ბავშვებით მიქრის!  
რომ ცხადზე მეტი აუხსნელია,-  
რაც, შენზე და ჩემზე ძლიერი,  
რომ დღე და ღამე პასუხს ელიან  
დასაბამიდან დასალიერით.  
სიცოცხლე - თვალის დახამხამება  
და ვერშეცნობის მრუმე სამარი!....  
რომ სიხარულის ლაღმა ქარებმა  
სულ დაივიწყეს შენსკენ სავალი!...  
ღვთის ნებით, ფიქრი, ფიქრს რომ მოება,  
ისევ გიბრუნებს მწვანე წარაფებს!  
და ვიღას ახსოვს ამოება,  
ბროწეული რომ ამონათებს!

## ბავშვებს

მრეშმა წაშალა სულის საგზალი,  
ცის ბილიკით რომ მოჰქონდა ნიავს  
და ახლა, ყველგან, დღისით თუ ღამით  
მხოლოდღა ქვენა ქარები ქრიან!...  
ვინ გადამალა კრიალა ზეცა,  
სიმაღლის ნატვრა, სიშორის ხიზლი?...  
ურჩხული საშიშ საცეცებს კეცავს  
და შორიახლო მაცდურად გვივლის!...  
- ვერ შეგატოვებთ ამღვრეულ ღვარებს,  
დაბოლილ ფიქრებს, უაზრო მზერას...  
-ბავშვებო, ჩქარა გამოდით გარეთ, -  
ცის მოსამებნად მიმყავხართ ყველა!

## სიკეთე

-ხელში ამიყვანე, - სიკეთე მეხვეწება,  
-მძიმე ხარ-მეთქი, - თვალს ვარიდებ,  
-ამიყვანე! - მდულარებას აფრქვევს სიკეთე,  
მე მხოლოდ ვჩანვარ კუთხოვანი და უხერხულად სატარებელი,

## ჩემი ჰობი პოეზიაა

ხელს თუ შემახებ, განათდება შენი სამყარო,  
დამიჯერე და შემახე ხელი,  
ერთი სული მაქვს, ამოვავსო ჩაბნელებულ კედელ-ყურეს სიცარიელე!  
-აი, ასე! - უკვე შენში ვარ, ადამიანო, ბროწეულისფერ დარბაზების  
ერთადერთი მბრძანებელი და მეპატრონე.  
ნება-ნება მივირთმევ შენი გულის ნაჟურს, ვხდები ულევო  
და ვლიდინებ ჩემს უძველეს საგალობელს, კარგად მომისმინე:  
მთაში მიწურია ერდოჩამოშლილი,  
ბარში მოხუცია ხელებდაკოჭრილი,  
ხნულში ნიკორაა ბედზე აღრენილი,  
კვალში პატრონია სახრეადერილი,  
იქით ტადარია ტრაპეზგადარცული,  
თავის პლანეტაზე ნაღვლობს უფლისწული...  
შუქი ენატრებათ წმინდა კელაპტრისა,  
კაცი კაცითაო, შენ კი ნეტარ ვისად?  
შენ კი სხვიად ვისად, სითბოდ ვისად მოხველ?  
ვისთვის ამზეურებ სიხარულის ნოხებს?  
-ადექ, გაემზადე, საკეთილოდ სხვისად,  
შუქი ენატრებათ წმინდა კელაპტრისა!



სურამი

## ჩემი ჰობი პოეზიაა



### ლეილა ჯახველაძე

დაიბადა ქარელის რაიონის სოფელ ავლევეში. პროფესიით ბუღალტერი. ლექსების წერა ადრეულ ასაკში დაიწყო. პირველად ლექსები გამოაქვეყნა 2005 წელს ლელა ფრონელის ფსევდონიმით გაზეთ „ქართლის ქრონიკებში“. პირველი ლექსების კრებული “ცისკრის ქარაგმა“ გამოვიდა 2010 წელს. ორასზე მეტი ლექსის ავტორია.

### უფალო!

ვიწამე...

ველოდე,

ვეძიე,

ვეწიე!

უფალო, შენმიერ

სიტყვას ჩავეძიე,

მიწაზე ბნელოდეს,

სინათლეს ველოდე,

მჯეროდეს,

მწედ ოდეს

მწვდებოდე...

უფალო, შენმიერს, -

უცილო მშვენიერს,

-არამც! კაცთაგანის

ნაბომებს, ბედნიერს!...

-მზე მიბნელდებოდეს,

ისე ვბერდებოდე, -

## ჩემი ჰობი პოეზიაა

მე ბედს ვჯერდებოდე,  
მხოლოდ შენმიერს...

\*\*\*

მზე - ზედაპირი,  
მთვარე - სარჩული,  
აქ - დედამიწის  
კაბა კვართული,  
ბრწყინავს  
მამული -  
ჩანგ-გამართული,  
მაქვს  
სამღერალი  
ენა - ქართული!.

\*\*\*

ფარავანო,  
ვერ ფარავო...  
მაგ დარდს  
როგორ დაფარავო?  
ხერთვისს ციხე დაცემულა,  
ქარი  
როგორ დაქარავნობს...  
ფარავანო,  
მტკვარს გაჰყევი,  
თქვი  
საქმენი საარაკო...  
ძველ დიდების  
ამბავს გკითხავთ  
ხერთვისისას  
- საარავო...

## ჩემი ჰობი პოეზიაა

### ალარ დავიგვიანებ

წმინდა ნინოს სავანე...  
ბოდბის მზე იღვენთება;  
აქ, უღრანის სანახებს  
დავაბედე ხეტება.  
-ალარ დავიგვიანებ!  
წყაროს ცივი ფეთება  
მერმისს მივალიანებს  
(ფიქრი მიჰყვა ლიანებს)...  
სიო ფრთებით მეფერა,  
მზე სწვავდა მაყვლიანებს.  
-აქ რომ მადლი ტრიალებს, -  
მტერი გაგვიტიალდეს!...

### სამაჩაბლოს ცისარტყელა

შვიდივე ფერი დავიტირე შვიდ დაფეთებით,  
შვიდივე ფერი, დამსხვრეული კიდე ოცნების,  
მშვიდად გული ვერ დავიტიე შვიდნაფერები...  
შვიდივე ფერი დავიტირე შვიდ დაფეთებით,  
და ლაჟვარდებში ვეხეტები დანაფეთები,

ვგრძნობ, ცისარტყელა ნამეტია შვიდ საოცრების.  
შვიდივე ფერი დავიტირე შვიდ დაფეთებით,  
შვიდივე ფერი, - დამსხვრეული კიდე ოცნების.



ჩემი ჰობი პოეზიაა

# **My hobby is poetry ( In Georgian )**

## **Periodical Literary Miscellany No 8**

გამომცემლობა



სარჩევი

ეკა ბაქრაძე	3
ციცინო ბურნაძე	8
ნანი გაჩეჩილაძე	14
კლარა გელაშვილი - კვინიკაძისა	17
გივი გელაშვილი	21
თევდორე გოგოლაძე	28
ეთერ გონგლაძე - ცხოვრებაშვილი	32
ლილი გრიგალაშვილი	35
მანანა დანგაძე	38
შოთა დარბუაშვილი	41
იზო ელიაშვილი	46
დარეჯან თაგვაძე	50
რევაზ თუმანიშვილი	53
მიხეილ თუმანიშვილი	57
ციური ინასარიძე	61
მარიკა კვინიკაძე	63
ერეკლე კორკოტაშვილი	66
რევაზ კოშკაძე	73
ფატი კურტანიძე	75
მზია მაღალდაძე	78
გიორგი მეტრეველი	82
ნინო მეყანწიშვილი	86
მურად მთვარელიძე	89
ლერი ნოზაძე	94
ნატო ღონიკიშვილი	99
მარინა ღონდაძე	102
ალიკო ღონდაძე	105
იამზე შავიძე	108
ხათუნა ჩიტაძე	112
ჟუჟუნა ცენგირაშვილი	116
ფიქრია ჭულუხაძე	119
მაყვალა ხაჩიძე	121
მანანა ხრიკაძე	125
ლილი ჯაფარაშვილი	128
ლეილა ჯახველაძე	132